


(શુક્રેતુવાર અઢવી ઢેઝીન)

જનવરી-જૂન 2025

વારસા

61

(For Private Circulation Only)



IMTD
SPECIAL ISSUE



First Meeting of New Executive Committee of AIKS



*Rajinder Pandita, President, Sunil Koul
General Secretary, Roop Krishen Bhat Editor Vaakh*

जनवरी-जून 2025

वार्षिक 61

(शुब्रेतुवार अदबी मैगज़ीन)

एडिटर

रूपकृष्ण भट

सलाहकार मंडल

रतन लाल शान्त

अरविंद शाह

सुनीता रैना

व्यवस्था

सुनील कौल (प्रबंध)

आल इंडिया कश्मीरी समाज

ए.आई.के.एस. कैम्प ऑफिस : बी-36, समावार परिसर
जी.के.-1, नई दिल्ली - 110048

वाख- 61

(शुब्रेतुवार अदबी मैग्ज़ीन)

जनवरी- जून 2025

पब्लिशर

आल इंडिया कश्मीरी समाज, H.No 308(LGF)Sector 35,
Ashoka enclave part III, Faridabad-121003
email:hqaiks@gmail.com

एडिटर

डा० रूपकृष्ण भट A 19, कैलाश अपार्टमेंट्स, सेक्टर 4, पलाट 2,
दवरका, दिल्ली 110078 फोन 9868555535
email:roopkbhat@gmail.com

Circulation Incharge - J&K : Aryan Ramesh फोन : 0941918513
NCR Delhi : Bharati Raina Kaul - 8130538867

पत्रवाहक जम्मू: रिकू कौल, फोन 9419136369, 7006467174

हक्क महफूज़

यथ मैग्ज़ीनस मंज़ लेख वर्गारु, इसतिमाल करनु ब्रोंह गछि लिखोर्य, तरजमुकार तु ए आई के एसुक
इजाज़थ ज़ोरुर ह्यनु युन।

कुनि ति (छाप सपुद्यमुतिस)लेखनस मंज़.जॉहिर करनु आमचि रायि सुत्य एआई के एस या एडिटर सुंद
इतिफाक आसुन छु नु ज़ोरुरी।

कवर पेंटिंग: Kashmir Shaivism by Subash Razdan

म्वल : (देश) अख अंक: 150 रु, सालानु: 300 रु, त्रे वेंरी: 500 रु

(विदेश) अख अंक: 5 डालर, त्रे वेंरी : 25 डालर

इशतिहार: अँदर्यम कवर : 8,000 रु, पूर सफु: 4,000 रु, ओड सफु: 2,000 रु

चवबाग सफु: 1,000 रु

चंद सोज़नुक तु इशतिहार खॉतर पताह

Punjab national bank A/N 0151000100442202

IFSC Code PUNB0015100 Branch Vinaynagar, Delhi

डी टी पी: आशा भट

UG 3, Plot 20, Nidhi Pride, Ext 1, Shalimar Garden, Sahibabad – 201005
8826187876, ashabhat975@gmail.com

यथ अंकस मंज़....

पनुन्य कथ	रूप कृष्ण भट	05
लेख		
❁ रछन दग : सॉन्य माजि ज़ेव	प्रो.रतन लाल शान्त	08
❁ रावन त्योल	प्रेम नाथ 'शाद'	14
❁ मूती लाल क्यमू-कॉशिरि रंगमंचुक शहनशाह	रूप कृष्ण भट	18
❁ कॉशिरि शॉयरी हुंद सूरतिहाल नमतु योर कुन	शफक्त अलताफ	20
गाशिर्य मुनार		
❁ औंकार नाथ कौल :	डा. रूप कृष्ण भट	27
अफसानु		
❁ ऑनख	रतन लाल शान्त	33
❁ त्रैयि त्रुह क्रोर दिवता	मखनलाल पंडिता	37
❁ नॅ सोरवुन सफर	अमर मालमोही	39
❁ ग्वफ	गौरी शंकर रैणा	44
❁ हरदु वाव	रूप कृष्ण भट	48
❁ देद	रिंकू कोल	52
❁ यिम छि नु तिम	देबा नज़ीर	53

❁ यूज़ एण्ड थ्रो	विजय सागर	54
------------------	-----------	----

शॉयरी

❁ नज़्म (कति कोत)	कुन्दन	59
❁ जु गज़ल	मोती लाल कौल नाज़	60
❁ नज़्म (बु तु चु)	मजरुह रशीद	62
❁ नज़्म (प्रज़नथ)	रतन लाल जवहर	62
❁ गज़ल	प्रेम नाथ शाद	63
❁ जु गज़ल	सुनीता रैणा पंडित	64
❁ गज़ल	अशोक गवहर	65
❁ नज़्म	ब्रज नाथ बेताब	66
❁ जु मज़हॉयु नज़्म	ओमकार नाथ शब्म	67
❁ नज़्म (स्वय ज़मीन सुय आसमान)	शहनाज़ रशीद	68
❁ नज़्म (अठ तु अटहूर)	रविंदर रवी	69
❁ नज़्म (डुबुडास)	इन्जीनियर विनोद	70

लीला

❁ पादि कमलन तल	वैष्णु राज़दान	72
❁ चु माता कासतम गम	वैष्णु राज़दान	73

स्वखन डूस

❁ शहीदन हुंज़ रजिस्टर	रतनलाल शान्त	75
-----------------------	--------------	----

शूर्य अदब

❁ तॉज़्य बटुन कान	म.क.रैना, मुम्बई	79
-------------------	------------------	----

तबसरु

❁ रामजुवस पादि प्रणाम	रूप कृष्ण भट	85
❁ अकिस शरियरु सुन्द जिंदगी नाम	गौरी शंकर रैणा	88

श्रद्धांजली

❁ बुजकिशिरी; अख बेमिसाल	गौरीशंकर रैणा	95
-------------------------	---------------	----

अदाकारा





पुन्य कथ



वाखस सुत्य वाबस्तु शखसन तु परनवाल्यान गछि यि शुमार वुछिथ हॉरीनी ति तु खवशी ति। हॉरॉनी अमि किन्य ज़ि वाखस मंजय ठंजर आव तु यि किथु गव बेयि शोरू। तु खवशी अमि किन्य ज़ि वाख हैकन बेयि पौरिथ। वाख ६० द्राव २०२३ई मंज तनु प्यठु अज़ताम लोग अथ अमि किन्य ठंजर तिक्याज़ि कौशिर लेखन वाल्यन तु परन वाल्यन द्वाशवन्य दरैन्य हुंज दिलचस्पी छे द्रह खोतु द्रह कम गछान शायद छु वुमरि हुंद तकाज़। असि मंज छि जवानसाल लिखॉर्य नें आसनस बराबर यिम ज़न चावु सान लेखुहन तु ज़िठ्य ज़िठ्य छि द्रह खोतु द्रह छवकान तु डवकान। ति कॅरिथ छिनु वारयाह सॉन्य लिखॉर्य देवनागरी पॉठ्य वुनि ति लीखिथ हैकान हालांकि वु छुस सारिनय तँकीद करान ज़ि यस कौंसि हँदी लेखुन पुरन तगान छु सु हैकि मँहँज द्रन त्रैन गंटन मंज कौशरि बापथ इसतिमाल सपदन वाजनि मात्रायि हैछिथ। यि छेनु बॅड कथा कांह वारयाहन छु गरि लैपटाप (लैपटॉप) तु तथ मंज हैकन 'कल्लद' छददुर्द्धु लोड कॅरिथ। बु छुस मजबूरन नस्तालीख लिपी प्यठु म्वाद जमाह करान तु सु देवनागरी मंज फिरान तु वाख तयार करान। वाखुक अख शुमार तयार करनस छि अलु पलु ज़ु रैथ लगान पतु येलि नु अथ परनवॉल्य तु कदरदान आसन सॉरुय महेनत छे यि दॅप्य ज़ि ति ज़ायि गछान। यि छे अफसूसनाक कथ ज़ि वाखुक्य एल्लम्हूंगु छि द्रह खोतु द्रह कम गछान। अँस्य छि वारयाह आलतू फालतू खरुचु करान मगर मैगज़ीन या रिसालु खॉतरु छिनु मोमूली चँदु दिथ हैकान। अमि अलावु छे वाखुक्यन नॉशरन याने 'ख' वाल्यन हुंज ति कोतॉही यिम छिनु वाख परन वाल्यन ताम वखतस प्यठ वातनॉथि हैकान य्वसु ज़न शरुमनाक कथ छे तु वारयाह परनवॉल्य छि अकसर मे शिकायत

करान हालांकि वाखकिस रसायनस या ख्खद्धंल्लद्धहह मंज छुन म्योन कांह रोल ।
 बेहरहाल व्वन्य य्वसु नैव घ्ख ण्दस्सद्ध चुननु आयि तिमव कोर मे तौकीद जि
 वाख गोछ बैयि प्रॉन्य पॉट्य नेरुन तु मे तुल यि शुमारु जल्द से जल्द शाया करनुक
 दस । व्वमेद छम तिहुंद रोजि वाखस कुन खास तवजह बरकरार तु तोहय हैकिव
 वाख पॅरिथ तु अथ मुतलक रूजिव पनुन्य राय बराबर सोजान ।

यि शुमारु छु खास तिक्क्याजि यि यियि अंतरराष्ट्रय माजि जैवि हुंदिस द्वहस
 प्यठ सरि आम करनु । अथ मंज छे लेखन हुंज स्यठा ज़्यादु रंगारंगी । स्यठा अँहम
 लेख, अफसान, शॉयरी, तबसरु वगैरु छि अथ मंज शॉमिल तु यि छु मोमूलकि
 वाख शुमारु खोतु हना बोड पहन । मे छे आशा जि तोहय कॅरिव यि पसंद तु अथ
 प्यठ सूजिव पनुन्य राय ।

हालहालय गुजरेयि कौशिर अख बेहलि पायि फनकार ब्रज किशोरी जुतशी
 य्वसु ज़न पनुनि दिति किन्य तु अदाकौरी किन्य स्यठा मशहूर ऑस । यथ शुमारस
 मंज छु तिमन प्यठ अख लेख ति शॉमिल । अँस्य छि वाख परिवारु तरफु तिमन
 श्रदांजली पेश करान तु दयस मंगान जि तिमन दिन स्वर्गस मंज जाय । येमि वाखुक
 कवर डिजायन छु मशहूर तु मोरूफ फनकार श्री सुभाश राजदान सॉबन तशकील
 द्यतमुत । यि पेंटिंग छे कौशरिस शैव दरशनस प्यठ तिहुंजव बेशुमार पेंटिंगव मंज
 अख बेहतरनी पेंटिंग । बु छुस तिहुंद शुक्र गुजार तिमव द्युत असि यि वाख किस
 कवरस प्यठ छापनुक इजाज्थ ।

ऑखरस प्यठ छुस बु बैयि अकि फिरि सारिनुय कौशर्यन अपील करान कि
 वाखस रोजन लोल बरान तु पनुन पनुन आशिरवाद थवन बरकरार ।

बु छुस यथ शुमारस मंज शॉमिल सामग्री बापथ तमिक्क्यन तमाम लेखार्यन तु
 अँदीबन हुंद दिलि मशकूर जि तिहुंद्यव फन पारव सुत्य शूबरोव मे अँज्युक यि शुमारु ।

रूपकृष्ण भट

एडिटर

रछन दग : सॉन्य माजि ज़ेव

- प्रो.रत्न लाल शान्त

जबान छे बदलान। बदलुन छे तिहुंज अख खॉस्यत। कांह ज़बान अगरय रवयि त्यूत बदलि जि प्रज़नॉव्यथुय हैकुहोन नु, हॉरान छुनु गछुन तिव्याज़ि ज़बान छे कलचरुक अख बावनहार आलु। लगातार तबदीली मतलब लगातार इसतिमाल युस हँथ्यारुक्य पॉठ्य अम्युक गाचि तु अमिच पेन तेज़ थवान छु। कलचरुक बदलुन छु अमिकि जिंदु रोज़नुच गारंटी। ज़बान छे अम्युक अख अँहम जुज़ तु लगातार इसतिमाल छु ज़बॉन्य हुंज जिंदगी। कॉशिर ज़बान बचावनुक तु रँछरावनुक ज़्वन छु असि अमिकिस इसतिमालस मंज़ कमी सपदनु किन्य प्योमुत तिव्याज़ि असि छु पय जि इसतिमालुच कमी छे अथुर ख्वस अथ अँदर्य अँदर्य खेयि तु अमिक्यन ज़ॉव्यलेन पनन सूर करि। ग्वडु ग्वडु ऑस्य अँस्य यि मस्तु हुमिस येमिस पुशरावान तु बारि त्रावान मगर व्वन्य छुनु चारु अथ सनुनस तु चरचनस। चकि छे अख अँहम कथ यि जि असि छु कॉशिरि कलचरुक व्योद तु वयिवुन र्वयी नहनावनु यिनुक खतरु द्रॉठ्य यिवान। अकि तरफु यि हकीकत तु बेयि तरफु अथ सनुनुक रोहजान तु जुस कम गछनुक पनुन नँ हैकन पाय। म्वखसर अँस्य छिनु अथ अलाकस कुन कदमुय त्रावुन येछान।

ज़मीनी हकीकथ क्या छे ? येमि असि ज़ेव अँन्य अँस्य क्याज़ि छि तमि माजि ज़बॉन्य तु माजि कलचरु निशि दूरान ? शायद छु अख बोड वजह अथ ज़बॉन्य हुंदिस देश कालस मंज़य मूजूद। जिंदगी सान जिंदु रोज़नु खॉतरु छु सानि ज़बॉन्य येमि बडि मुलकुचन बजन ज़बानन खास्कर औरदूहस तु हँदियस लरि लोर कॉयिम रोज़नस तु यिमन सुत्य पकुनस आमादगी तु तयॉरी हुंद इज़हार करान रोज़न ज़रूरी। कँह तवारीखी पज़र ति छि अथ कोबूल करुन्य। अमि वँर कूशिश

मगर तथ मंज वरतावुन या तु तोह तंबली नतु सुस्ती युथ जि वख गव चलान तु
 अँस्य रूद्य तँती। यि गोछनु सपदुन तिव्याजि आजाँदी पतु आयि मुलकस मंज
 समोजी क्यो इकतिसाँदी मसलव सान व्यवस्था राँयिज करनु युथ जन कलचरल
 मसलन हुंद हल तु जमहूरी अमलि सुत्य अख प्वखतु व्यवस्था यियि राँयिज करनु।
 ल्वकचन या अलाकाँयी ज़बानन सुत्य आव नु कुनि ति सौथरिस प्यठ अलग
 कुसमुक स्लूक करनु। मगर यिमनुय पेयि पनुन्य अलग तु मखसूस रुहजान तु वतु
 छारनि तु तय करनि।

सानि रियासच हुंजव दवयव जिछव ज़बानव काँशरि तु डोगरी कजि यिमु वतु
 बिलतरतीब औरदुहस तु हैंदियस नखु डखु। बँडय सुंदि स्वहबतुक्य छि फॉयदु।
 व्वन्य गव दरारु ति हैकि वाँतिथ अगरय रफतारस मंज पथ गछव। औरदुहकि
 सोहबतु वोत काँशरिस फॉयद। यि ल्वकुट ज़बान गँयि जदीद अमली प्रावुन
 हॉसिल करनस मंज कामयाब तु अम्युक दामानु गव वसिह। मगर अख सौत सौत तु
 अवुछ वोजूदी दरारु वोतुस युस मकानचि लबि गॉमुचि बाँरीक रुमि हुंद्य पाँठ्य
 तमी दवहु बोज़नु यियि येमि दवह अँदर्य आवस्योमुत देवार लरि सान पथर पेयि।
 शॉयरन वन्योव : अशरत खतराह है दरिया में फना हो जाना, मगर आँखरस छु
 दँर्यावुय वोजूदस रोज़ान कतरु छुनु अथी यिवान। खॉर यथ हकीकतस हमेशि
 मुतबाँदिल विकल्प म्वयसर मगर तमि खॉतरु पेयिहे असि ज़्यादु ईमानदाँरी सान
 जखुन। असि ओसनु सिर्फ मजबूरियन तु बेकस्यन हुंद वास्तु द्युन बँल्कि
 दँस्यतियाब अमली तु सयनसी तरीकन हुंद फॉयदु तुलुन। अज़ काँशुर रँछरावनुक
 ज़ोरूरथ तु व्वपाय दवशवन्य मस्लन प्यठ सरनु सौंचनु विज़ि छु असि यिमन
 हकीकतन फ्युरद्युन ज़ोरूरी।

मसलुच नँवयथ छे द्वन टाकारु शकलन अंदर लबनु यिवान। अँल्यमी तु
 अवॉमी। वारयह इनफिराँदी तु इजतिमाँई कूशिशि सपज़ु वुन्युस ताम तु अज़कल
 ति छे कुनि नतु कुनि सौथरिस प्यठ चलान जि काँशिर ज़बान गँछि गरि परिवारु
 नेबर ति अमली दुन्याहस मंज ति लागिकार बनन्य। ज़मानु छु सयनस तु टेकनालजी

हुंद मगर अँस्य हेकव नु अथ मंज काँशरयुक कांह मुमकिन रोल सूचिथ। मुलकुचव बजव ज़बानव ति छि बन्य अथ माँदानस मंज पनुन्य हँथ्यार त्रॉव्यमुत। 47 प्यठ 60 — 65 ठस ताम ओस येति वुछु काँयिम। पतय ह्योतुन सु स्वतुन तु व्वन्य छु तम्युक इमकानय खतुम गोमुत। त्रु ज़बॉन्य फारमुला ओस अख ईमानदार तु बागिबोरुत इकदाम। तिमनुय पंचाहन वॅर्यन दोरान ह्योतुन कोम सयनस तु टेकनालजी हुंजि बेमिसाल दोरि मंज शॉमिल गछुन। अथ दोरि सुत्य जुवुन या पनुनिस कलचरल इज़हारस फॉयदुमंद बनावनुक ग्वरदु ओस तमि विजि बजन तरकीयाफ ज़बानन। तिमव कॅर काँबिल ऑल्यमन हुंज जमाँच, डिकशनरी, किताब लयब्रेरियि तयार। काँशरिस यूनिवरसिटी डिपाटमेन्टस अंदर ति सपुजि यिछु कैह ल्वकचि म्वकचि सरगरमियि। व्वमेद ऑस अकाँय जि सानि ज़बॉन्य ति बनन जदीद जिंदगी हुंद्य अमली ज़ोरूरथ पूर करनस मंज मददगार साँबित। यि कूशिशि ऑस अख अमली रव य्वसु अमि ब्रोंठय दँस्यतियाब अंगरीज़ी रवि मुताँज़ी पकनुक ख्वाब हैथ सफरस द्रायि। ह्वपॉर्य ऑस ज़ोरूरतन अथ रोट करन वाजन्य अंगरीज़्य हमेशि तयार तु इसतिमाल करन वाल्यन वेज। अमिक्य फॉयदु ऑस्य कम खरचस या मुफतुय हॉसिल सपदान। नँतीजि द्राव यि जि सानि ल्वकचि ज़बॉन्य गँयि वतन खुर आमतिस मुसाँफिर सुंद्य पाँठ्य दरमांदु। कलचरकि लेहाज़ु नँज्यदीख ओरदू, हैंदी, किनु जदीद जिंदगी जुवनु खॉतर ज़ोरूरी अंगरीज़ी, अमली खज़ानु हुररावनुक या खरुच करनुक सवालुय गव पथ। स्कूलन मंज ओसुन काँशुर अवलु प्यठ पाँच्यमि ताम वातुन ह्योतमुत सु गव व्वन वसान तु अंगरीज़्य गव जमाँच जमाँच खसान। हैंदी रियास्तन मंज गव अंगरीज़ी अवलु प्यठय रॉयिज तु तिमु बजि ज़ख़ीम तु ग्वबि तर ज़बॉन्य, तकनीकी डिकशनरियि गँयि अलमार्यन तु फयलन हुंजि गरदि तु लछि हवालु। व्वन्य छुनु कांह मुकाँमी कलचरुक त्युथ मसलु ति ज़ेरि बहस यिवान यथ नु इनटरनेटस निश जवाब आसि। अमि खॉतर छु लाँजमी जि अँस्य करव पनुन्य ज़बान तु सोरुय प्रोन ऑलिम इनटरनेटस हवालु बज़रयि अंगरीज़्य।

काँशरि ज़बॉन्य हुंद्य वोजूदी मसलु छि बेयव न्वकतु नज़रियव किन्य ति बेहस तलब। यिहुंद अपरोच छु लोकल तिक्याज़ि यिहुंज़ प्रक्रथ छे सिर्फ़ येतिचि जोग्रॉफी तु तवारीखस मातहत। व्वन्य छे सानि अमली ज़ोरूरतु महदूद तु अँस्य करव नु इनकार ज़ि यिमु छे ओरदू तु हँदी पूर करान। यि छे तिछय हिश सूरतिहाल ज़ि पोछ छु मेज़बान सुंदि गरुक ति खरुच तुलुन हेवान। यिथु कन्य हँदी ओरदूहस प्यठ अंगरीज़ियुक तसलुत लबनु छु यिवान। बँल्यकि यि छुनु बासान काँशुर बचावनुच्यन कूशिशान ति कांह थ्वस अनान। अथु रोदुय छु करान। तैलि कुस मसलय छु ?

मगर मसलु छु नफसियाँती युस आँखरस वोजूदक्य सवाल पॉदु करि। युथ सवाल छु कलचरस सुत्य वाबसतु युस सॉनिस जिंदु रोज़नस तु लसनस बसनस माने दिवान या निवान छु। मसलु छु कमतरी हुंदि एहसासुक। कांह ज़्यादु लगहार ज़बान याने ओरदू, हँदी, अंगरीज़ी पानुनावुन्य छु शुभ ति तु लाभ ति, मगर यि असि निश ग्वडय मूजूद छु तथ लथ दिथ नु कैह। युथ एहसासि कमतरी छु खतरनाख तिक्याज़ि यि कोर असि पानय पानस मंज़ पॉदु, काँसि व्वपरन नँ। असि ज़ाव शुर। लोल सान रोट नालुमति, मगर बोलनोव हँदी या ओरदू।

मुनतक क्या ओस ? स्कूलन मंज़ बाकुय शुरयन सुत्य गिंदनस तु व्वथबीठ हैछिनस लग्यस यि। याने असि कोर फरुज़ ज़ि कलचर छु अँमिस हैछुन ति गरि नेबुरय, गरुक कलचर क्या तु क्युथ ? गरुक बोल बोश, लोल, टाछिन्यार, मोल मोज, महावर, प्रछु, इज़हारचि कूशिशि, ज़ानुन मानुन, व्यवहार वरताव..... यिमन कथन क्या मतलबुय छु ? शुर बन्या बाँचन दरमियान सोथ या कैंदुल किनु फुटमुत ठोठ, अथ सवालस क्वस अँहमयथुय छे। सिर्फ़ तु सिर्फ़ छु अकोय पज़र। बाकुय गँयि संसक्रती, याने सनसकार, याने लगातार पान तु दैमाग सगुवुन तु फवलुरावुन। तथ क्या व्वन्य सनुन ? ख्वश हॉली खोतु माँन्य असि ख्वश नुमाँयी। मगर बु छुस मानान ज़ि असि छोंड अख सँहल ख्वदकँशी हुंद सफर। वुनि छि अँस्य अमिक्यन खोफनाक नँतीजन हुंद दरशुनुय करान, पूर तसवीर छे बाकुय।

स्व तसवीर आसि बेबुथ, बेज्यव, यथ नु नावुय कांह सूंचिथ हेकव ।

अगरय असि सूरतिहाल तबदील करनुच नियत आसि तेलि क्या करव अँस्य ? यिछ कांह ति कूशिश हैकिनु हेरु प्यठु शोरू करनु यिथ मस्लन अँल्यमी या तौलीमी सोथरिस प्यठ, तिक्याजि स्व आसि सिर्फ बज़ह दौरी । यि कूशिश छे असि गरव प्यठु शोरू करुन्य । असि छे काँशिर माजि ज्येव ज़रूर मगर हकीकतन छे असि यि “माजि हुंज ज़ेव” बनावुन्य । ग्वडु तिमन माजयन महज़ूज कलचरुक तु बरतौरी हुंद एहसास पाँदु करुन यिमु अडु काँशिरिस तु अडुपाँर्यमिस माहोलस मंज़ अडकजि हिशि लसान बसान छे । यिमु छे सानि कोरि तु न्वशि पँचुहि (25) प्यठु चतजी (40) वँर्यशि ताम तु यिमु छे पानु ति सिर्फ ओरदू या हँदी हुय बोलान । काँशुर छे समजान मगर लोंग ल्योच काँशुर । बोलुहान मगर पछ छखनु जि सँही छा बोलान, मुकमल कथ छा ज़ौहिर करान किनु नँ । यिहुंद्य शुर्य छिनु काँशिर्य तिम छि ज़ेनु प्यठय ओरदू, हँदी बोज़ान तु बोलान (परनुक लेखनुक छुनु सवालुय) रूद्यमुत । यिम छि दँह वुहर्य ताम । मगर यि हिस् बागय हैकि नामुकमल ति आँसिथ । वारयाह सौन्य बचि छि कालेज गछान तु सिर्फ हँदी — ओरदू ज़ानान । तिमन छेनु माजय याँच बँल्यकि नानि ति हँदी बोलान ।

यि करुन छेनु सँहल कथा ? मगर अँस्य छा येत्यन सिर्फ सँहल कथ करनु बापथय समेमुत्य ?

मे छु येमि कथि हुंद ऐहसास जि अँस्य छि बिज़ौती परन लेखन वॉल्य, थ्योरी बनावन वॉल्य । गरव तु यिछव मीटिंगव नेबर छु असली दुन्याह । ज़बान छे अवामुल नासस मंज़ इसतिमाल सपदान तु तँती ज़ेवान मरान । मगर सानि ओसूली कथु छे ज़ोरूर कुनि नतु कुनि जायि हरकत पाँदु करान । तँथ्य व्वमेज़ मंज़ छे असि कथ करुन्य । बतोरि फरुद तु बतोरि तनज़ीम हेकव बार बार यि मसलु तुलनु सुत्य अथ खामोश सँदरस कनि फोल लॉयिथ तु मलर पाँदु कँरिथ । अदबी तनज़ीमु हेकन सिर्फ अख नज़रियाँती तु मारल मदद फराहम कँरिथ । अलग पाँठ्य हेकन शॉयिर, अफसानु निगार, ड्रॉमा नँवीस, ब्राडकास्टर पनुनि टेलन्डुक इसतिमाल

वॅरिथ, सोशल मीडिया जॅर्ययि (कम अज़ कम जोमिस मंज़), कॉशिर बतोरि माजि ज़ेव ज़ेरि बॅहस अँनिथ। जोम्य अलाकस मंज.रोज़न वाल्यन हुंद मसलु छु व्वन्य अख ख्वद कफील बन्योमुत। सॉन्य नॅव पुय छे नागरी ख्रतुक फॉयदुमंद इसतिमाल वॅरिथ नॅ सिर्फ कॉशरि मिरासुक बॅल्यकि अँज्यचन कॉशर्यन लेखन तु सौंचन त्रायन हुंद हरतर ज़ॅहनी फॉयदु खॉतर इसतिमाल करान। अथ मोज़ूहस प्यठ ज़्यादु वननुक छुनु येत्यन मोकु मॅहल, मगर कॉशुर रॅछरावनुक छु नागरी खत अख कॉफी फॉयदुमंद वॅसीलु बन्योमुत।

० ० ०

नोट : यि लेख आव समनबल 2022, मंज जेमि बॅहस्यति key note address पेश करनु।



देवनागरी तु कॉशुर

वॅंशीरी नेबर हेकि कॉशरि खॉतर देवनागरी अख अँहम लिपि बॉनिथ। देवनागरी लिपि मंज छु कॉशुर परनु तु लेखुन सॅहल। वॅंशीरि नेबर कॉशुर परनु तु लेखनु खॉतर छे दिलचस्पी बडावुन्य तु बरकरार थावुन्य ज़रूरी। अमि खॉतर हेकि वाख अख अँहम वसीलु बॅनिथ। यि गोछ सारिनुय गरन मंज वातुन। वाख पॅरिव तु परनॉयूख बाकी ति। देवनागरी लिपि मंज कॉशुर लेखनु खॉतर वॅरिथ यिमेन निशानन हुंद इस्तिमाल:

ॐ	तुर, कुर, पुर, गछु	ॐ	तुर
ई	गॅर, नॅर, अॅर, हॅज		गॉर, नॉर, दॉर, ऑठ
ॐ	बेह, चे, मे, पेठ	ॐ	दोर, तोर, नोर, होल, दोल, चोल



रावन त्योल

- प्रेम नाथ 'शाद'

रावन दोद या रावन त्योल छुनु सानि खॉतरु काँह नोव लफुज़ बॅल्यकि काँशरि लफुज़ राशि मंज़ स्यठाह व्योद। व्वंगव अम्युक इज़हार तु अनहार छि ब्योन ब्योन। काँसि छु काँह टोठ चीज़ा रावान या काँह कूमती जादाद अथु गछान तस छु यि रावनुक गम वदनावान तु बाज़े पलव चटनस वातुनावान। अमापोज़ अमि दगि हुनदि एसासुच शिदत छि कैह कालु पतु हमान तु इन्साँनी यादु वॅतरिस मंज़ सरसॅरी तोर जाय रॅटिथ वक्तुक्यन आवुलुन्यन मंज़ तहलील गछान। येमि रावन तेलिच बु कथ करु तमिक्य अनहार तु अतवार छि तीत्य खोफनाक, अफसूसनाक तु अलमनाक ज़ि कलम छु काँपान तु दिलुक दुब दुब तेज़ान।

1990 तस मंज़ यथ तूफानस मंज़ सॉन्य गुल पोश तु मशहूरि आलम वादी हयनु आयि सु ओस काँशरि तवारीखुक तु काँशरि कोमुक सु अलमिया येम्य हसीन सॉबन हुंद्य ताजमहल मेचि मिलुनॉव्य। कॅशीरि हुंदयन मूल निवासी बटन प्यव मजबूर गॅछित पनुन गरबार पैंड पुरन पनुन्य हकहमसायि तु सारिवुय खोतु टॉठ माँज कॅशीरि त्राँविथ बानुहाल बालु अपोर जोम तु हिन्दोस्तान क्यन मुखतॅलिफ शहरन मंज़ नामुवाफिक रिहायशी सूरॅति हाल मंज़ पनाह हयोन तु जलायि वतनी हुंज़ ज़िंदुगी गुज़ारुन्य।

वारयाहन मुसलिम तु सिख खानदानन ति पेयि यिमवुय हालातव किन्य तरकि सोकनत करुन्य। कबरिसतान रूदय फॅहलान तु च़ेतायि रोज़ दज़ान। काँसि ज़ीहोश फरदस येलि जुव तु यज़त दावस लागि सु करि ज़ोरूर अमि निशि बचनु बापथ व्वठ छ़ाठ। नतु कुस अखा त्रावि पनुन गरु, ज़्यनु जाय, पनुन जायदाद तु पनुन स्वख तु बनि वतु व्यलॉय। येति अगर काँसि जानावरस तेज़ हवा रिंगि सुत्य ओल नहवॅन यियि सु छुना बाकु छ़टान तु लंजि लंजि फीरिथ व्वतल बुजि तु छ़ोछ़ि

कँतुरच करान । तवहाल छनु इन्सान संज कथुय ।

जलायि वतनी मंज यिमन मुशकिलन, मुसीबतन तु जहरेलु तजरुबन तमिस सीनु प्यव दियुन तिम छि बेशुमार । यिमनुय, क्रेठयन हालातन मंज जुवान गछन व्वन्य त्रे दँहिल्ये अमापोज यि रावन दोद तु पोत याद छे विजि विजि सीनु चटान तु ओश हारुनावान । यि रावन त्योल छुन त्यूत मौली न्वकसानन हुंद येहसासुय योत यि नफसियाँती इन्तिशार तु जजबॉत्य बे कँसी हुन्द अमबार बँनिथ परबँतुक्य पॉट्य ब्रॉठ कनि इस्तादु छु गछान । समोजी रिशतु तु इन्साँनी कदरन हुन्द छलु छाँगरि गछुन छु वॉनिज कूरान तु दम फँट्य करान तु शिदुत सान यि येहसास मनान जि असि छु ति सोरुय रोवमुत यि असि वाँसुवादव प्यठ प्रोवमुत ओस ।

माजि कँशीरि येमि ज़नुम दयुत तु फँफलॉव्य, पनुन गरु, स्वखु आँगुन यथ मंज ख्वखश कँरिथ कदम कडुन हयोछ तु जवान स्पुदय, पनुन्य हक हमसायि यिमन सुत्य दानु मिलवन ऑस । येमि ज़ून देदि मोहन लालस पननि बबि द्वद दयुत । येमि राधामालि रँशीदस खोनि रँटिथ गूर गूर कँरिथ नेन्दुर पॉव । येमिस चूनी कोरि माहराजु आव तु मुसलमान हमसाँय बायव दँर्य गँडिथ वछि वॉनिजि वनुवुन कँरिथ माहराजस तु साल्नर इसत्यकबाल कोर । अली महमद द्राव माहराजु बँनिथ होवुर तु बटु हमसाँय बायव कोर डून्य बादाम तु शीरीन्य छँकिथ ऑही काँछिथ र्वखसत । यार दोस व्यसु बैतरि यिमु पानुवॉन्य शादि तु गमस, द्वखस तु खाँदस खुन्दरस चुकि सान अकार बकार यिवान ऑस्य गँय छेनु, पछतु परतीथ, ज़ानुन मानुन, शरम हया हिशि बे बहा कदुर, कँह मुशरतकु तु कँह ब्योन ब्योन, रीच तु र्यवायँच, सॉन्य बँड्य द्वह ईद, हेरथ तु नवरोज सोरुय गव अख अँकिस निशि जुदा । ईज द्वह सुब्हाँय बटन हुन्द गर गरु ऑलु बादाम तु नाबद ह्यथ मुबारकस गछुन । ईज न्यमाज पँरिथ पानु वॉन्य नालु मँत्य करुन्य । हेरुच द्वह सुब्हाँय मुसलमान हमसायन तु यारन दोस्तन हुन्द सलामि युन । तौईफु दारन मंज छान यिवान ख्राव ह्यथ, गूर यिवान द्वदुवॉर ह्यथ, खार यिवान श्राकुपुच ह्यथ । कान्युल यिवान काँगुर ह्यथ । नॉविद यिवान ऑनु हावान । बॉड तु मसखर ऑगनस मंज डोल स्वरनयि बमस प्यठ पॉथुर चारान तु वुछन वाल्यन ठाह ठाहु कँरिथ

असुनावान । तु पतु तोमुल डून्य तु सरुच रँटिथ असान तु गिन्दान वापस नेरान । यि सोरुय छु याद प्यवान तु जिगरस छे श्राकु वसान ।

सॉन्य तीरथ तु दरगाहु चार, शेखुल आलम (रह), नुन्दु रेशुन आसतानि आलिया, बाबा रीशी सुन्ज दरगाह, मकदूम सॉबुन्य ज़ियारत, येति गॉर मुसलिम ति येछि पछि हॉज़िरी दिवान, दशि गंडान तु मुराद मंगान ऑस्य । तुलमुल तु खुवुक्य दीवी असथापन यिमन मुसलिम बरादँरी यज़तु तु येहतिरामु सान रॉछ रावट करान तु वुछान वाछान ऑस्य । अति बटु यात्रियन पोश, व्यनु, द्वद, कन्द, नाबद तु बाकी पूजायि सामान मयसर थावान । कुनि दिवय तु कुनि व्वरुस । कुनि इमतियाज़ वराँय नज़रो नियाज़ त्रावान । दरगाह डेडि तल खाकु पूर्य रँटिथ ड्यकस तु सीनस मथान तु इतिमिनान प्रावान ।

सोन अदब तु सकाफत, सॉन्य कॉशिर माजि ज़्यव रावुन्य गयि प्रज़नथ रावुन्य । पंचत्रह वरी वाँसि ताम सॉन्य कॉशिर पुय छेनु कोशुर ह्यकान बूलिथ ।

कॉशिरि लफज़ राशि मंज़ लोग्य तु गोब्य लफज़, कॉशिर्य महावँरु, प्रचु दँपित्य गँय गॉब । सॉन्य बुजर्ग मरुद तु ज़नान यिम उरदू हिन्दी ऑस्य नु ज़ानान गँय हयबुंगु तु दमपँदय । लल द्यद तु शेखुल आल्मु सुन्द ज़मज़मय हयोत, लोल मुहँबत तु बाँयचारुक दरस, सूफी सन्तन हुन्द आशीरवाद, अहद ज़रगर, सम्मद मीर, महूज़र तु आज़ाद सन्द्य लोलु नगमु नॉदिम सन्द्य नात तु मनकबत, कृष्ण जू राजदान तु स्वामी परमानन्दनि बखति लीलायि । सुब्हाँय सुब्हाँय यपॉर्य मँदरन हुन्द गंटायि सदा पूजा पाठ तु आरती तु हुपॉर्य मँशीदन मंज़ अज़ान, न्यमाज़ तु दोरूद खानी हुंद ग्रज़ । अथ थोद तुलिथ कुल आलमस बापथ दुआ मंगुन । गॉमी अलाकन मंज़ बटन तु मुसलमानन हुंद लसनुक बसनुक वखरु अनहार । रँलिथ मीलिथ ज़िरात कमावुन । यिवनि सोंतु ग्वन्गुल करनु विज़ि, डून्य, खन्ड तु तोमुल बाँगरावुन । थँजकाद तु न्यन्दुकाद लागुन, चारवाँय रछिन्य । अख अँकिस अलज़ुन पलज़ुन । नु शिक्व नु शिकायत । पानुन्यार तु मिलुचार । भाँडु जेशनु, प्रोव तु तीलु ऑठम हिव्यन समागमन मंज़ मुशतरकु पॉठ्य शोमूलियत करनुच रिवायत । कूत बावि इनसान ज़ि वक्तु फिर्य क्या क्या न्युव अथु मुहित ।

कुल आलमस मंज मशहूर जनति बेनँज़ीर कशीरि हुन्द रूह परवर आबो
हवा, शीतल द्वह तु रॉचु, रंग बॅरंगी तु अँतरि ख्वशबोय छॅकरावान पोशिचमन,
विरकिम्य तु टेकु बटनि हुन्द जहार। योसमन थर्यन हुन्द बहार, स्वन्हॉर्य सँदिजि
फुलय, नीर्य मरगु सरसब्ज तु शादाब जंगल, बोनि शैहजार, डलशिकारि सॉल,
पम्पोशन हुंज तारख मालु व्यतस्तायि हुंज स्वखु सॉव खॉनी, निशात, शालुमॉर,
गुलमरग, पहलगाम, रंब्ब्यआरु तु आबशार, सोंतु सखर तु हरदु बाँबर। रंगदार
अम्बुर्य चूठय, नाख टंग, गिलास तु बादाम बाग, सोंतु गगरायि पतु जमीनि
फॅट्यमुत्य ह्यडर तु कनुगुछ तु बैयि वारयाह छि व्वन्य कमिताम दासतानुक्य
बाकु हिव्य बासान। वन्दु रॉचन हुन्द शी शी करुवुन हवा। फम्बु सेरि ह्यू वसुवुन
शीन, सफेद मखमल दस्तार गँडिथ कुल्य तु कॅट्य, र्वपु जुम्कु लॉगिथ अलान
लंग लंजि प्रवु त्रावान शीनु संगर, पशियमन अवेज़ान श्रन्य श्रन्य करुवुनि शिशार
गाँटु, वोलुतु कॅरिथ नु ओबुर छॉविथ नारु बॅरुच चार काँगुर, मुनुल फेरन नॉल्य,
गलोबन्द, वॅलिथ तु ब्ययि वारयाह रोव।

यि सोरुय ओस सोन असासु तु बेश कुमत मीरास। यि ऑस स्व अरूजथ य्वसु नु
रवपयन मॅल्य ह्यनु यियि। यिमु आसु तिमु कदरु यिमन प्यठ काँशरिस नाज़ ओस।
कॅशीरि मंजु नीरिथ रोव यि सोरुय जन्तु गव कतरु आगरु निशि छ्यनु तु ज़िन्दगी गयि बे
मानि। यिहोय छु सु रावन त्योल युस नु काँह जिंदु जुवु मॅशरॉविथ हैकि।

रावन त्योल रूदय ललुवान तु कलमस रूज़ ज़ीर लगान :-

रावन त्योल ललुवान वुन प्योस

असुवनि हवँजि ओश त्रावुन प्योम

○

रॅछरिथ ओसुम जिगरुक खून

वॉरान वति छॅकरावुन पयोम

○

विजि वावन छॅकरोवुस “शाद”

शोक शहर मंन्सावुन पयोम

मूती लाल क्यमू-कॉशिरि रंगमंचुक शहनशाह

- रूक कृष्ण भट

पदमश्री मूती लाल क्यमू कॉशिरि रंगमंचुक शहनशाह गव 15 अपरेल 2018 द्रह जेमि स्र्वगवास। अँथ्य सुत्य वोत तसुंद 60 वॅरयनहुंद अदबी तु सकाफती सफर अंद तु कॉशुर ड्रॉमा गव अँकिस थँदिस तु बहलि पायि कारकुनस निशि महरूम। कयमू सुंद कॉशिरिस रंगमंचस द्युत बहिसयति अख अदाकार डायरेक्टर, प्रडूसर, ड्रॉमानिगार तु ड्रॉमा तँहरीक हुंद अलम बरदार छु बेमिसाल तु शुर्य पानु प्यठु स्र्वगवास गछनस ताम रूद सतुंद ड्रॉमाकिस माँदानस मंज अख ज्यूठ सफर स्यठा दिलचसप। तँम्य कोर बहिसयति अख बाल कलाकार पनुन ड्रॉमा सफर शोरु तु कॉशिरिस ड्रॉमा तँहरीकस सुत्य सुत्य सपुद अँकिस कामयाब हिदायतकार, ड्रॉमा नॅवीस तु अदाकार संदिस रूपस मंज बालेग। अथ ज़ीठिस सफरस दोरान लीख्य तँम्य च़तजीह खोतु ज़्यादा मुकमल ड्रॉमा। तँम्य बनाँव ड्रॉमा पनुन्य करमु भूमी ति तु पेशि ति।

कॉशुर बाँडु पॉथुर फांफलावनस तु यि थँदिस अयामस ताम वातनावनस मंज छु तसुंद बोड बारु द्युत। बाँड तु तिहुंद फन कोमी सतहस ताम वातनावनस मंज छु तिहुंद बोड बारु हिसु। तिमव दिच़ बाँडन ड्रॉमायी सलॉहयच़ बडावनु खॉतरु तरबियत तु तिम कॅरिख तकनीकी ज़ॉव्यजारव सुत्य वॉकुफ तु ज़ॉन्याब।

कयमू रूद जमू कश्मीर कलचरल अकादमी हुंद ओहदुदार तु बहिसयति अडीशंनल सेकरिट्री गव रिटायर। अथ दोरान कॅर तिमव कॅशीरि मंज ड्रामा फनस सुत्य सुत्य बाकी अदबी तु सकाफती काम्येन व्वसजार दिनस मंज काफी कॉम तु कॉशुर कलचर कोरुख मशहूर तु मोरूफ।

तिमव छि दरजनवाद ड्रॉमा किताबु लेछिमचु छाय, डख येलि च़लन, शाह पॉथुर अकनंदुन, तोतु तु ऑनु, नगर वुदॉस्य, नुनोव, वगॉरु वारयाह मशहूर छि।

क्यमूहन छे ड्रॉमाहव अलावु बैयि ति वारयाह किताबु लेछिमच। यिहुंज अख हिंदी नावल पशुगाथा छे बडु जान नावल यथ मंज इसतिहारव तु तशबि हिव्य रंगय समोजी तु सयौसी बिदतन तु मामलन परदु तुलनु आमुत छु। यिहुंज किरदारनिगौरी छे स्यठा दिलच्सप तु आम फॅहम। यिमव छि तवारीखी किरदार ति पनुन्यन ड्रामाहन हुंदय किरदार बनयौयमित तु राजतरंगनी हुंदि हवालु छिख वारयाह किरदार पनुन्यन ड्रॉमाहन ईन्द्य पौथुर बनौव्यमित।

क्यमूहस छि वारयाह यनामु क्यो ऐजाज दिनु आमत्य यिमन मंज साहित्या अकादमी अवार्ड, संगीत अकादमी अवार्ड ति शॉमिल छि। तिमन छु भारत सरकारन पदम श्री ति दयुतमुत। पनुनि माजि ज़ेवि अलावु ल्यूख मितव हैदी, औरदू तु अंगरीज्य ज़बानन मंज ति। तिमव छि हतु बॅदय लेख तु परचु लीख्यमुत्य। कॅशीरि हुंद्यन तु कॅशीरि नेबर वारयाहन रिसालन, मैगज़ीनन मंज छि तिहुंदय लेख छपेमुत्य। तिमन मुतलक छि मशहूर अदीब प्रोफसर रतन तलाशी वनान “ यि छे बडु अॅहम कथ जि क्यमूहन थॅव तिथि विजि ड्रॉमा लखनुच रेवायथ कौयिम येलि अॅस्य पनुन्यन मूलव निशि दूर पेमुत्य अॅस्य।” अफसानु निगार क्यो नकाद प्रोफेसर रतन लाल शांत छि वनान “ क्यमू ओस अख थदि पायि ग्वनमात मशरिकी तु मगरिबी ड्रॉमा तरकीबी हुंद माननु आमुत मॉहिर।” क्यमू छु पानस मुतलक वनान, “जिंदगी हुंद्यन पंचाहन वॅरयन रूज़स रंगस सुत्य वाबस्तगी, च़तजीगन वरॅयन कॅरुम कौशिरि कलचरुच खॅदमत अदबस, संगीति नाटकस, तु फननि लतीफस सुत्य थौवुम वुमरि वाबस्तगी।

क्यमू सुंद नेचुव रवी क्यमू छु बालीवुडस मंजड डयरेक्टर तु कौशिरिस रंगमंचस सुत्य ति छु वाबॅस्तु। क्यमू सुंज कूर छे संगीत तु फनुच व्वस्ताद तु तसुंद ज़ुर कूनाल क्यमू छु बालीवुडस मंज एक्टर।

क्यमू ओस अख जान, मायि बोरुत, जिंदु दिल तु रुत इनसान। बु ज़ानुहॉन सु पॅत्यम्यव लगबग च़तजीहव वॅर्ययव प्यठ। तसुंद सोहबत तु संग ओस लूबवुन तु खवशनसीबी। येलि येलि ति ड्रामा फनुच ज़िकिर व्वथि मूती लाल क्यमू यियि आदरु तु सतकारु सान याद करनु। भगवान दियिन तस वेषनु बवनस मंज जाय।



काँशरि शॉयरी हुंद सूरतिहाल नमतु योर कुन

- शफक्त अलताफ

शॉयरी छे हर विज़ि व्वंदुक्यन अँदरीटन, ज़िंदगी हुंदयन तलख तजरुबन तु इसरॉरी हेसागँही बेतरि हुंज़ मोसर तु ज़बर बापथ बखशिनस सुत्य सुत्य तफरीकुक अख कारगर वसीलु ति। योदवय दोर कांह ति ओस इनसान रूद पनुन्य तजरुब बावन, मन रंज़नावन, बोस लौचरावन तु मज़ाज़ु मँदरावन म्वखु शारन क्वम कॅरिथ। यथ मॉदी छुट छुट तु टेकना — लोजी हुंदिस दोरस मंज़ छे शॉयरी हुंज़ वेछय ज़्यादय पहान चॅर बासान तिक्याज़ि यथ आलमी तु मयार बंद गामस मंज़ छु इनसान तनहॉयी तु इनतिशारुक्य कालु शहमारन च्वपासे वोलमुत तु तस छुनु शॉयरी वरॉय बेयि कांह म्वकलन पाय अथि यिवान। काँशुर शायरी छे नु कांह हॉदयसॉती अमल बॅल्यकि रूद अम्युक फिकरी तु अमली तसलसुल वाँसि वादव प्यठु अँज्युक ताम जॉरी। काँशुर शॉयरी रूज़ तख्युली तु जमालयॉती व्वथु वाशर प्रावनस सुत्य सुत्य प्रथ दोरकि समाजुक अकास बॅनिथ काड कडान।

वोन्य गव सानि हमकाल काँशरि शॉयरी ओन मज़ाज़ु मुदा, फिकिर, असलूब या वनव तखलीकी वेवहार किन्य रेवायचन निश लोब रूज़िथ तु अख नोव शॉयरी मनज़र नाम दीद मान। शॉयरी हुंद रुहजान रूद प्रथ विज़ि सान्यन लेखार्यन प्यठ गॉलिब। येम्युक फ्रोस नतजि यि द्राव ज़ि लल दैद तु शेखुल आलम प्यठु अँज्युक ताम आयि शॉयरी हुंज़ु मुनफरद तु नाकॉबिल तकलीदु आवाज़ु ब्रॉहकुन यिमेन मंज़ हबु खोतून, अँरनि माल, रहमान डार, रोसुल मीर, शमस फेकीर, परमानंद कृष्णजुव राज़दान, माशटर ज़िंदु कोल, रसा जावदॉनी, मँहजूर, आज़ाद, दीनानाथ नॉदिम, रहमान रॉही, अमीन कॉमिल तु गुलाम नबी फिराक बेतरि वेदय नाव छि।

सनु शेठु प्यठु नमतस दरमियान रूदय नु सॉन्य अकसर शॉयिर कुनि खास नज़रिहस तु अँकीदस आवेज़। अमि दोरचि शॉयरी हुंज बुन्यौदी खसूस्यित ऑस अम्युक तजरुबौती किरदार तिक्क्याज़ि यिमन तजरूबन मंज़ ओस आलमी सोथरुच समौजी तु फिकरी तबदीलियन हुंज़ पोत छाय। यिमव इनकलाबव कोर कॅशीरि सान सोरुय बर सगीर मुताँसिर तु इनसान सुंद सोरुय सोंच बदल्योव, तु अम्युक असर प्यव काँशरि शॉयरी प्यठ ति। काँशरि शॉयरी हुंद्यन प्रान्यन अलनकारण, इज़हारन, वनत्यन तु कदरन खलाफ गॅयि ननि वानु बगावत शोरू। तखलीक कारव कोर मँहसूस जि हकीकत ज़ाननु म्वखु छुनु कांह ज़ाबतु बंद या ग्वडय वॉयिथ कांह फलसफी नज़रियि ज़रूरी बॅलकि ज़मान तु मकान किस मखसूस सूरत हालस मंज़ आवरस मखसूस फरदु सुंद मखसूस तजरुबु हावनु सुत्य हौकि प्रथ सातु बदलवनि हकीकत हुंज़ ज़ान या वनव अथ सुत्य कांह तालुक कुनि हदस ताम सपदिथ। अमि नवीन तु जदलियाँती फिकरि हुंद तर द्राव यि जि “मे छम आश पगुहुच” (नॉदिम), “नीलनाग” (कॉमिल), “बुलबुलस कुन” (फिराक), “स्वनु लाँकि प्यठ” (रॉही) “बालु क्वल” (अरजन देव मजबूर), रेशमान (गुंलाम नॅबी ख्याल) हिशि नज़मु पेयि थनु यिम अँस्य आलमी शॉयरी लरि लोर थॅविथ हेकव।

नमतु योर कुन रूद सान्यन शॉयरन समन बल। 1990 मंज़ वोथ सियाँसी कॅनज़ियि येमि किन्य सान्यन प्रान्यन तु न्वयन शॉयरन छलु छांगुर गॅयि तु तिम हेक्य नु अख अँकिस रोबरो पनुन्य शार पॅरिथ। अमि किन्य रूदय सॉन्य व्वथुवन्य शॉयिर तु कलमकार मुकौमी शारु रेवॉयचन तु फहम अदराक निशि बे खबर। अम्युक मनफी असर प्यव तिहुंद्यन तखलीकी अदब पारन प्यठ ति। नमतु योरकुन काँशरि शॉयरी हुंद सूरति हाल हेकव अँस्य मूजूद हालातव तु ज़मानचि मूजूदगी सुत्य प्रज़नॉविथ तिक्क्याज़ि अम्युक तौलुक छु तखलीक कारस अँदय पॅख्य क्यन हालातन तु जिंदु इनसानन हुंज़न ज़हनी तु फिकरी कॉफयातन सुत्य। तखलीक कार सुंद ज़मानु हेकव नु तसुंजि तखलीकि निशि ब्योन कॅडिथ। सान्यन

अँज्यक्यन शॉयरन मुकाबलु गँयि सान्यन व्वसतादन तु बुज़रग शॉयरन हुंद्य कलामु तिंहज़िय हयॉती मंज़ मकबूल तु परन वाल्यन या बोज़न वाल्यव वॅर्य नु तिम पसंदय योत बॅल्यकि रूद यि कलामु तिहुंदयन इजतिमॉयी जज़बन तु तजरुबन हुंज़ ति नुमायंदगी करान । नमतु योरकुन थ्वस ति शॉयरी लेखनु आयि तथ मंज़ छि मजमूयी तोर कॅशीरि हुंद्य नास त्रास वाकु तु ना मसॉयिद हालत दरशावनु आमुत्य । अज़ कालुक्य हालात छि छरा अज़ कालुक्य हालात यिम पथ काल क्यव तु आयंदु कालक्यव हालातव निशि छेनु गॅछिथ अँकिस लेखॉरिस तेज़ रफतॉरी सान वॉनाख तु खोफल आवलिनिस मंज़ त्रावान छि ।

अँदर, छि सॉरी बॉच गरुक्य अज़ ति जुवान
नेबरु छि मोसूम तापु चंज़न मंज़ जान दिवान
ख्वश यिवुन्य वावन सोंतु ग्वलाबन फेशा द्युत
हाय बहारव किथुकन्य दराहम खून चैवान

—यूनिस वहीद

प्रथ दोरचि शॉयरी हुंद तोलुक छु ज़िंदगी हुंद्यन यिथनुय ल्वकटयन बडयन मसलन सुत्य रूदमुत । सानि अँज्यचि शॉयरी मंज़ छु यास, तलवास, तु त्रास नोन तु टाकारु । सोन शॉयिर छु येमीय समाजुक हिसु तु तस छि अज़कालुक्य सयॉसी, जगरॉफी तु अलाकॉयी हालात अगादि गॅछिथ तोस तुलान तु सु छु कॅशीरि हुंद होलनाक, मनज़र पनुन्यन शारन मंज़ नकशावान । खून रीज़ी, छेन, थपल हूसी, लूटमार, बदअमनी, इखलॉकी तु रूहॉनी कदरन हुंज़ मसमॉरी हिव्य मामलु छि सान्यन अँज्यचयन शारी तखलीकन हुंद बुन्यादी मोज़ू ।

अख पॉज़ होरु योर नचान ओस मोर ज़न
अख ज़ोन वदान तु बासान चोर ज़न
अज़ तापु आंगुना छु, यि राथ ओस वीरिवार
प्रथ काँसि थोवमुत छु अँछन तोर ज़न

हकीम मनज़ूर

जमाना अख शॉंगिथ अँस्य छि शबि बेदार
 नँ मसजिदुय न मंदरुय नँ अस्तानय कांह
 मरीद पानु तु मुरशिद ति पॉन्य पानय अँस्य
 नियाज़ नज़रु रटान दरदु आलवान हुंज़ दग
 चु यिज़ि शाम डॅलिथ सॉन्य किन्य वुछख पानय
 नँ बु छुस बु न छाय तु न अकुस

नसीम शफाई

स्व तापु ब्रेह जि होखिथ आयि नागुबल सॉरी
 वुहाल म्यॉन्य शिहिल्य कुल्य तु यारुबल सॉरी
 मे छम न तपाह जि कतन्य छुस दितम मे गाशि द्वछा

मजरुह रशीद

अख कथ छे वनन्य ज़ोरूरी येत्यन जि शॉयिर छे नु तनहॉयी मंज़ काड कॅडिथ
 हेकान । बकोलि ईलयट काँसि शॉयुर सुंज़न तखलीकी कुवतन हुंद अंदाज़ु हैकि तेली
 सपदिथ येलि तस अंदु प्यठु आँखरस ताम शॉयरी रेवायचन हुंद आँनु ब्रॉंह कनि आसि ।
 रेवायत पसंद तु हम अहद शॉयरी हुंज़ि अमलि मंज़ हरगाह सॉन्य अँज़्क्य कैह नुमायंदु
 शॉयिर मसरूफ रूदय मगर ति कॅरिथ ति छि तिम पनुन्यन शारन मंज़ नॅव तु सॉदरवार
 इसतियारु कामि लॉंगिथ अख नॅव शारु ज़बान दर्याफत करनचि कूशिशि मंज़ महव ।
 रेवाँयती शारु लॅहजि, मिज़ाज़ु, फज़ा, तु इज़हार तरक कॅरिथ ओन तिमव पनुन्यन
 शारन मंज़ न्वयर । यिहुंज़न नज़मन मंज़ छु मूजूद ज़मानुक्यन तकाज़न मुताबिक
 शॉयरी ज़बान तु हयत तजरुबस सुत्य हम अहंग करनुक शोवूर नोन ।

वोथ वाव तु ओबरस गछि छलि छल
 खसि सिरयि वुनल चलि बालव पेठ्य
 ओरु त्रट वछु
 गेगु तामथ खोत पोन्थ
 सॅहलाबन छिन डॅहय डास वॅरिथ
 इनसान कयो हयवान योरु वालान

कम बाग तु जंगल नैगलावान
गरु लुहरावान लुख चॅलरावान

रतन जवहर

फितनु गर आदम
आगरय नॅय आसिहेन प्रोवमुत वोजूद
तम्बलेमुच आसिहे मा चूँठय कुजि तल तापु यटुच
तंबुर किथु बनि हे अलाव
सबील कॉबिलन फसाद
जालिहे आदुम्य वोजूद

— शाद रमज़ान

अँज्यक्यन सान्यन वारयाहन शॉयरन छु साडन शैन हतन वॅरयन कॉशरि
शॉयरी हुंद पूर वकूफ । तिहुंदिस कलामस प्यठ छु वोस्ताद कॉशर्यन हुंद असर
अयान । तिमव वरतोव तिहुंदुय लॅहजि आहंग, रदीफ कॉफियि तु लय ति ।

शालमारुक सरवुशुहुल याद प्योम
ताम शीतल शांत रोतुल याद प्योम
वीरि वारुक क्रुलुमूरन हुंद गगूस
आलु नेरुन छालि बुलबुल याद प्योम
चेरु कुजि तिहरिस दुजॉलिस कुकलि ओल
तोति मंज़ ऑनमुत द्रमुन याद प्योम

प्रेम नाथ शाद

येति श्रोन्य गछि ताज़ु अमारन हुंद
येति नगमु ग्यवान शोहजारन हुंद
येति सबज़ारुक्य वलि जामु फसुल
तति ग्यविज़्यन फवलवन्य म्यॉन्य गज़ल

सुनीता रैना पंडित

वुछान वुछान पथ त्रोव शुहुल
 ग्रेशमु चंजि वेपरोव शिहुल
 सथ गज येलि असमान सपुद
 खलकव अदु चेत्रोव शिहुल
 मीलु कन्यन प्रछयतव सा हे
 मंज वति मा कुनि रोव शिहुल
 विरवारन हुंद रावन त्योल
 सेक्यल्यन मंज रँछरोव शिहुल

प्यारे हताश

यि छु असि सारिनुय पताह जि नमतस मंज गँयि कँशीरि मंज तिथ्य
 दिलदोज़ हालात पौदु यिमव किन्य काँशिर्य बटु बालु यपोर चँलिथ आयि। अथ
 बे वतनी मंज रुज यिमन सारिनुय चँलिथ आमत्यन लुकन पनुनि वतनुच दग यि
 दँप्य जि ति वछ कोरान। नमतु योरकुन कोर केंचव काँशर्यव शॉयरव कँशीरि
 हुंद मूजूदु सियाँसी, इखलॉकी, तु रूहॉनी बहरानुक हाल तनुज तु ज़राफतक्यन
 इजहारन मंज फनकाँरी सान पेश। अजनँब्यत, कुन्यर इखलॉकी कदरन हुंज
 नापायदॉरी छे नेरन शबिहन, अलामचन तु इसितारन मंज बावनु आमच। सॉन्य
 अँजिच महाजिर शॉयरी छि सयाँसी हालातव सूत्य मुताँसिर गाँमत्यन काँशर्यन
 लुकन हुंज अकाँसी। काँशर्यन बटन कँशीरि हुंद रावन त्योल तु कँशीरि मंज
 तिहुंज व्वपरॉजी छु महाजिर शॉयरी हुंद गॉलिब मोजू। सॉन्य महाजिर शॉयिर छि
 पनुन्यन शारी तखलीकन मंज कँशीरि हुंद सासु बोद प्रोन मिलु चार तु बाँय बंदुत
 वापस यिनुच आश थँविथ।

काश बु ति अख जानवारा आसुहा
 माशि मॉरिथ नेरुहा
 तावनुनि बाजॉर्य चूरी शी कँरिथ
 दूर आकाशस अंदर वुडव कँरिथ

बालु थॉगिस प्यठ बे प्रोक व्वशाह कॅडिथ
नागु त्रेशा चैथ स्वंदर रेश्य वारि
सडकनुय हुंद फोफ खामोशी वुछिथ
तिहरि तिहरेय वुफ तुलिथ
पनुने लरे प्यठ कन दरय
अॅक्यसुय गरय करहा करार

अरजन देव मजबूर

द्वदु हेडुर येलि अगवा कोरुख
सु गव कोल तु ज़ोर तु आरु हचव चेशमव ओस वुछान
ज़नतु वनान मॉल्य सुंज़ क्वछि त्रावहा नु
युस अजय छु यस प्यठ नु अज़ताम काँसि फताह मीज
दवदु हेडुर
ज़नतु वनान ओस मंज़लय निकु छुसना

बाल कृष्ण सॅन्याँस्य

व्वंदस मंज़ चूरि कोताह थवि इनसान
अॅछन मंज़ दग जुदोयी तिहुंज़ छे पेडान
बु छुस होंज़स तु रादस मंज़ चम्योमुत
छवटान अकि अंदु तिथय बेयि तरफु ज़ेठान

ब्रजनाथ बेताब





औंकार नाथ कौल

- रूप कृष्ण भट

प्रोफेसर औंकार नाथ कौल
जायि सिरीनगरु प्यठु लग बग पंचाह
मील दूर क्वलगाम ज़िलु किस बुगोम
गामस मंज़ ७ जनवरी 1941 इसवी
मंज़। बुगोम छु क्वलगामि प्यठु पांछ
किलोमीटर दूर। आतिच आबोदी छे
लग बग पांछ हथ गरु तु ज़्यादुतर लूख
छि ज़ोमीनदोरी करान। देर्यावि माव
खसु वेश्व देरयावु मंज़ु नरान छे, छे
अमि गामु मँज्य वसान। कौल सौबन्य



गरिक्य ऑस्य मावि बँठिस प्यठ बसान। कौल सौबन्य पिताजी पंडित प्रेम नाथ
कौल अर्पन ऑस्य अकि खानदोन्य तु बजा गरुक्य जानीशीन। यिम ऑस्य थदि
पायिक्य शॉयिर। यिहुंज शारु सौबरन आदन याद प्योम छे छपेमुच। यिमव कोर
भगवत गीतायि लीलायि रूपस मंज़ कॉशिरिस मंज़ तरजमु युस ओरदू क्यो
देवनागरी द्वशवन्य लिपियस मंज़ छप्योव। यिहुंदि खानदानुक नाव तु पछान ऑस
दूर दूर अलाकन ताम मशहूर तु वेज़। परिवार ओस स्यठा बोड नँतीजन गुज़र्योव
यिहुंद ल्वकचार अँकिस आम स्रवदिगरु किस शुर्य सुंद्य पॉठय येति नँ रखन
वालयन हुंज कँमी ऑस तु नँ गिंदन बाजन हुंज वेछ्य। यिम रूदय ल्वकचारस गामु
माहोलु सुत्य मुताँसिर।

गरस मंज़ ओस नु सिर्फ अदबी माहोलुय योत बँलकि अख दारिमक्य माहोल

ति। येति कौशिर्य रेवौयती गरन हुंद्य सनस्कार मूजुद ऑस्य। यिमव कॅर अदबुच खँदमत अँथ्य असरस तल। यिहुंद वनुन छु, “बटु गरन मंज ओस सुबहन शामन आरथी करनुक तु लीलायि ग्यवनुक रेवाज। मशहूर लीलायि आसु शामन शुर्य बँड्य यिकवटु ग्येवान। सॉनिस गरस मंज आसु मशहूर शॉयरन मसलन परमानंद, कृष्णजुव राजदान, प्रकाश राम, वेष्णुजु राजदान नि तु म्यॉनिस वॉलिद सॉबनि लीलायि ति ग्यवनु यिवान।”

कौल सॉबस ऑस्य गरस मंज ज़िठ्य व्वमु जी या औंकार नाथ तु ल्वकुट्य बाँयरज वनान। चूंक गरस मंज ओस परनुक लेखनुक जान माहोल, यिहुंद चाटुहाल गछुन ओस लॉज्यमी। यिमव पॅर इबतिदौयी तौलीम पनुनिसुय गामस मंज। अमि पतु कौरुख मैटरिक क्वलगामि, एफ, ए अननतनागु तु बी, ए सिरीनॅगरु एस.पी कालजि। पतु कौरुख कश्मीर यूनिवरसिटी मंज हेंदियस मंज एम.ए 1964 मंज। यिमव कोर के, एम इनसटिचूट आगरा कमपरेटिव लिट्ररेचरस मंज पी.एच डी तु 1969 मंज गॅयि यिम अमरीका। अति कोर यिमव लिंगविसटिकस (लिसानयात) मंज एम.ए तु पतु आयि वापस हेंदुस्तान।

कौल सॉबन कॅर मरकज़ी सरकारस तँहत, एजिकेशन मिनस्ट्री हुंदिस शुमौली ज़बानन हुंदिस अलाकौयी मरकज़सस (एन,आर,एल,सी) मंज बहिस्यति प्रंसिपल 1971 प्यठु 1987 ताम नोकरी। अमि पतु रूदय यिम लाल बहादुर शास्त्री नेशनल एकेडमी आफ एडमिनस्ट्रेशन मसूरी मंज ज़बानन हुंदिस डिपाटमेंटस मंज बहँस्यति प्रोफेसर क्यो हेड सतन वॅर्यन। 1994 मंज गॅयि यिम सेंट्रल इनसटिचूट ऑफ इन्डियन लैंगवेजस मयसूरस मंज बहँस्यति डिपटी डयरेक्टर तु अति रूदय नोकरी हुंदिस ऑखरी मरहलस ताम। यिम गॅयि 2001 मंज बहिस्यति डयरेक्टर रिटायर।

अँलमी तु अदबी कारनाम

लग बग पंचाहन वॅर्यन प्यठ मुश्तमिल कौल सुंदि अँलमी तु अदबी कारनामन हुंज ग्रंद छे स्यठा ज़ीठ। अथ दोरान छि यिमन पंचाह (50) खोतु ज़्यादु किताबु तु

डवड हथ (150) खोतु ज़्यादु तँहकीकी परचु लीख्यमित्य। यिम छि द्वन कुसमन हुंद्य अदबी तु लिसाँनी। यिम छि वनान, “म्याँनिस लेखनस परनस मंज छु ग्वड कालु प्यठय गरुक्य तु समोजी माहोलन असर त्रोवमुत। शोक तु ज़ोक पौदु करनस मंज छु गामु माहोलुक अख म्वलुल हिसु। म्याँन्य वॉलिद सॉब ऑस्य शॉयिर। गरस मंज ऑस्य औरदू ज़बॉन्य हुंद्य अखबार तु रिसालु वातान। प्रानि किताबु आसु देंस्याब। मे बडयोव लेखनुक शोख।” (आलव 2002)

तँहकीकी काम्यन मंज छे ग्वडनिच संजीदु कॉम, “कॉशिर्य तु हैंदी रामायनन हुंद तकाबली जॉयजु”। अथ मंज छु यिमव कॉशिर्यन तु हैंदी ज़बानन हुंद्यन अँहम राम कथा शॉयरन तु तिहुंजन तखलीकन तकोबली मुतालु कॅरिथ यिहुंद हिशर तु ब्येन हॉविथ द्युतमुत। यिमव छे नरेंदर दुलय सुत्य रॅलिथ पंजॉब्य ज़बॉन्य मंज “कश्मीरी साहित्य दी तारीख” लीछमुच यवसु पंजाबी युनिवरसिटी छपॉव तु कोरसस मंज शॉमिल कॅर। यिमव छि राम कथायि, कृष्ण कथायि, सूफी शॉयरी, लल देद, नुंद रयोश, हबु खोतून, मँहजूर, दीनानाथ नॉदिम, परमानंद, कृष्णजुव राजदान वगॉरु मोज़ूहन प्यठ तँहकीकी मज़मून लीख्यमित्य। यिमव यिमन किताबन प्यठ तबसरु कॅर्य तिमन मंज छे महमद ज़मान आजुरदा सुंज “एसे,” चमन लाल सपरु सुंज “दीना नाथ नॉदिम”, बदरी नाथ पारिमू सुंज “एसंत आफ दि सेलफ”, एम जे अकबर सुंज “बियोंड दि वैली”, शॉमिल। तखलीकी सॅथरिस प्यठ कॅर यिमव कॉशरिस तु हैंदी ज़बानव प्यठ शॉयिर तु अफसानु सिनफव सुत्य शोरुआत। लेखनस मुतलक छि यिम वनान, “बु क्याज़ि छुस लेखान? यि छे अख बॅड मजबूरी येमि मंजु नँ मे अज़ ताम फुरसत मीज। ज़िंदगी छे वखतस ताबेह, वखुत छु ज़िंदगी पकुनावान। वखुत गुज़रुन छु ज़िंदगी गुज़रुन तु ज़्यादु तर छे म्येकनिकी अंदाज़ ज़िंदगी पकान यथ मंज न पनुन कंट्रोल छु। नोकरी हुंज ज़िमवॉरी पूर करान, परुन तु लेखुन रूद मे यि म्येकनिकी ज़िंदगी बसर करनुक अख हिसु। बु रूदुस लेखान। वारयाह तँहकीकी मज़मून छपेयि, किताबु छपेयि तु नॅव्य नॅव्य मोज़ू आयि ब्रॉह कुन। कॉशरिस मंज तदरीसी म्वाद

तयार अलावु लिसॉनयती एतबारु रूज़ मे खॉहिश ज़बॉन्य प्यठ कॉम करनुच ।
म्यॉन्य खॉहिश ऑस कॉशिरिस प्यठ कॉम करुन्य । यि बनेयि अख मजबूरी ।
(आलव 2002)

यिमव छु कॉशर्यन अफसानन हुंदि तरजमुच अख स्बरन “कशमीरी कहानियाँ” हेंदी ज़बॉन्य मंज़ 1992 मंज़ छापमुच । यिमव लीछ पानु ति ग्वडनिच अफसानु स्बरन “मुलाकात” (2001) हेंदी पॉठ्य यथ मंज़ 55 मिनी अफसानु छि । यि किताब आयि पतु कॉशरिस तु औरदुहस मंज़ ति तरजमु करनु । यिहुंज़ दारयिम कॉशिर अफसानु स्बरन छे “ऑखरी फॉसलु” । पनुन्यन अफसानन मुतलक छि वनान, “पनुन्यन अफसानन मुतलक केंह वनुन छु मुशकिल बेयि ति तिमन अफसानन यिम ज़न केंचन वाकन, चिहयन, किरदारन सुत्य वाबस्त आसन -यिमन मंज़ छि तिम अफसानु ति यिम र्यवॉयती रदजु बंदी मंज़ छि नु यिवान ।

लिसॉनयॉती कॉम :

कॉशरिस लिसानियातस मुतलक आयि संजीदु पॉठय तँहकीकी कॉम कुनवुहमि सेंदी हुंदि ऑखरु प्यठ करनु । वारयाहव यूरपी अँदीबव तुल अथ कामि ग्वडु दस तु कॅरुख वारयाह कॉम । मगर ग्वडु अनवारि हुंज़ ग्वडनिच तु थैकुन्य लायक कॉम ऑस पंडित ईशवर कोलुन्य संस्कृत पॉठय ग्रॉमर “कशमीरी शब्द अमरेत” यि ग्रॉमर बन्योव ग्रयरसन सुंज़ि कामि हुंद अख अँहम वसीलु । तनु प्यठु अज़ ताम आयि कॉशरि ज़बॉन्य हुंदिस प्रथ कुनि पँहलूहस प्यठ तँहकीकी कॉम करनु । यथ मंज़ कॉशर्यन तु गॉर कॉशर्यन द्वशवनय हुंद हिसु छु । वुहमि सेंदी हुंदिस दौयमिस हिसस मंज़ वँथ्य ख्वश किसमती किन्य वारुह कॉशर्य लिसॉनी मॉहिर यिमव पनुनि माजि ज़ेवि प्यठ हावुन्य तु बावुन्य लायख कॉम कॅर । यिमन सारिन्य अँदीबन, तँहकीकारन तु लिसॉनी मॉहरन मंज़ छि सरि फिरिरिस प्रोफेसर ऑंकार नाथ कौल । यिमव छे कॉशरि ज़बॉन्य हेंदिस प्रथ कुनि पँहलूहस प्यठ कॉम कॅरमुच ति सोरुय येतिनस फिरुन छु नु मुमकिन मगर केंचन खास खास काम्यन हुंद ज़िक्र करुन छु लॉज़्यमी ।

प्रोफ कौल संज ग्वडनिच किताब छे लिंगविस्क स्टडीज़ इन कश्मीरी — 1977 अमिक्व अँहम हिसु छि नवुन फ़ज़, वर्ब फ़ेज़, एडजकटिव फ़ेज़ वग़ौर। अमि पतु कॅर यिमव अमरीकी माँहिरि लिसॉनयात पीटर हुकस सुत्य मील्लिथ एसपेकटस ऑफ कश्मीरी लिंगविस्टस — 1984 किताब ऐडिट। अथ मंज़ छि वारयाहन ऑल्यमन हुंद्य परचु शॉमिल। यिमव कॅर्य कॉशरि ज़बॉन्य हुंद्य दरसी म्वाद तयार यिम छि एन इनटेनसिव कोरस इन कश्मीरी — 1985, एन इनटर मिडियेट कोरस इन कश्मीरी — 1994, ए डिक्शनरी आफ कश्मीरी प्रोवरबस, स्पोकन कश्मीरी — 1987 वग़ौर।

प्राफ कोलन कॅर वारयाहन गॉर कॉशर्यन स्कालरन सुत्य ति कॉम यिम छि पीटर हुक्स अलाव, बोरिस ज़खारीन, काशी वॅला। रुथ लैला शमित, लुदमिला खोखोलोव। काशी वॅली सुत्य रॅलिथ ल्यूख यिमव कश्मीरी ऐ कागनिवि लिंगविसटिक ग्रामर तु “माड्न कश्मीरी ग्रामर। रुथ लैलायि सुत्य रॅलिथ ल्यूख यिमव, कोहिसतानी ति कश्मीरी, सोशियो लिंगविसटिक सरवे आफ कश्मीरी, दारदिस्तान रिविज़िटिड। यिमव कॅर, कश्मीरी लैंगवेज, लिंगविसटिकस, कलचर नावु अनोटेडिड बिबल्योग्रफी ति तयार।

यिहंजुन बाकी काम्यन मंज़ छे इफेकटिव कोमिनिकेशन सिकलज़, टापिकस इन हेंदी लिंगविसटिकस, स्टडीज़ इन कश्मीरी लिंगविसटिकस, माडर्न हेंदी ग्रामर, ए निवज़ पेपर रीडर इन कश्मीरी, लंगवेजस आफ जमू एंड कश्मीर ति शॉमिल। मे कॅर यिमन सुत्य “लंगवेजज़ ऑफ पंजाब” तु “लंगवेजज़ ऑफ हरियाणा” ति एडिट। प्रोफसर कोलन कोर स्कुथ एशियन लंगवेज रिविव (SALR) रिसालु लग बग त्रहन वॅर्यन एडिट। यिमव कोर कॉशुर अदबी मैगज़ीन “वाख” दॅहन वॅर्यन एडिट य्वसु थेकुन्य लायख कॉम छे।

ऐज़ाज़ तु एवार्ड:

प्रोफसर कोलस छि वारयाह ऐज़ाज़ तु एवार्ड मील्यमुत्य यिमन मंज़ भारत सरकारुक सी,एच,डी 1975, इनटरनेशनल सुसयटी फार आर्ट कल्चरुक

1996, भारत सरकारक गॉर हँदी भाषी वल्यन हुंद अवार्ड 2003, कृष्ण राजदान सरस्वती अवार्ड - 2004 । यिहँदि नाव छप्योव बावथ कलचरल सुसाईटी प्रोफसर कौल न०- 1997 तु भारतीय भाषा संस्थान मयसूरन “पेपरस इन एपलियड लिंग्विस्टिक्स नाव — अख सपेशल वोल्चूम फार औंकार कौल- 2001 ।

प्रोफसर कौलन लीछ पनून्य स्वानेह शकलि मंज “विसफरिंग वार्डस-ए मेमायर — 2017 खस लूकव स्यठा पसंद कर । अथ मंज छि यिहँदि ज़िंदगी हुंद्य अँहम वाकु क्यो तफसील दरुज तु मुखतैलिफ अँदीबन सॉथ्यन तु अँहम इनसानन हुंज यिमन मुतलक राय दरुज । प्रोफसर रतन लाल शांत छि यिमन मुतलक वनान, “ कौल सॉबनिस गॉर लिसॉन्याती अदबस म्वलऑकवन करनु ब्रॉह छु असि एहसास गछान ज़ि अँस्य छि अँकिस आलमी स्यथरुकिस् मॉहरिस् ब्रोंठकनि खडा, यसुंद दयुत मुलकस मंजय योत नु बँलकि नेबरु ति थ्यकनावनु आमुत छु ।

अँलमी तु अदबी प्रोग्रामन मंज शरकत करनुकि गरजु छि तिम वारयाहन मुलकन फीर्यमुत्य यिमन मंज अमरीका, रूस, बरतानिया, एसट्रेलिया, फांस, जापान, कनाडा, बेलजियम, थयलैंड वगॉरु मुख शॉमिल छि ।

3 मई 2018 गँयि प्रोफसर औंकार कौल दिलि मंज तँवील बेमारि पतु र्वगुवास तु कौशिर ज़बान तु लिसॉन्यात गव अँकिस मायानाज़ अदीबस तु रुतिस इनसानस निशि महरूम । औंकार कौल सुंद दयुत तु नाव रोज़ि हर हमेशि ज़िंदु तु अमर ।





ऑनख

- रतन लाल शान्त

बस युथुय सिरीनगर शहरस चायि, सु ह्योतुन बेकरार गछुन, सु छु गरा देंछिन्य तय गरा खोवर्य दार्यव किन्य वुछान। खबर क्याहताम छांडान, परजनावनयच कूशिश करान, खबर क्याहताम लबनु खॉतरहि पनयनि ज़ लर्यव बाज़रव दुकानव तस वति पकविन्यव लूकव पैठय तेज़-तेज़ फिरनावान। अँमिस देंछिन्य खोवर्य सवारि आसु बज़ॉहिर अँम्य सुंद यि मचर वुछिथ केंछाह हॉरान तु केंछाह तंग आमच मगर तिमव आसिहे यिति च्यूनमुत ज़ि नफर छु या तु वारियुह कॉल्य या ग्वडनिचि लटि कंशीरि आमुत। तिमु आसहॉन दपान मु कॅर्यूस कॅह, पननिस कॉसि आसि वॅन्य दिवान। तिमव आसिहे यिति वुछमुत जौमि प्यठु योत ताम ओस यि दोह्य द्रहस छवपु कॅरिथ तु बेहरकथ बिहिथ। न कॅरन कॉसि सुत्य कथय न वोथ सीटि प्यठु ब्वनय ज़ांह। कॉसी वौनुस न कॅह।

अँती दिच तँम्य बडि हटि ड्रायवरस क्रख - रुकाव सॉ व्वस्ता, मे त्राव सॉ येती।

सु गव यखदम बसि प्यठु ब्वन वॅसिथ तु गव अँकिस पी-सी-ओ दुकानस खँसिथ। पांचन देंहन मिनटन कॅरन फोन करनच कूशिश, मगर नम्बर ओसुस नु रलान। किनु रलान ओसुस ति सुय ओस च़टान? अख कथ ति कॅरन नु।

तँमिस गँयि कनन आवाज़ मैटाडोरुक (सिटी बसि हुंद) कंडक्टर ओस हख दिवान — रयन्यवोर, रयन्यवोर...

व्वन्य गव सु हुशार हयू। सु ह्योतुन दुकान प्यठु ब्वन वसुन। दुकानदारन होवुस फोनकिस मीटरस कुन इशारय। तँम्य कजि रवपयि च़तजी कौंटरस प्यठु त्राँविथ गव ब्वन वॅसिथ तु स्योदुय गव रयन्यवॉर्य मैटाडोरस खँसिथ।

मैटाडोरस मंज़ ति ह्योक नु सु कचि बिहिथ। बेयि छु तिथय कॅन्य सीटय प्यठु

वॅथ्य वॅथ्य गछान तु दॅछिन्य खोवर्य दार्यव किन्य वुछान। ओवरलोड खडा सवार्यव मॅज्य कलु कॅडय कॅडय ति सीटन प्यठु बिहिथ सवार्यन प्यठु नोम्य नोम्य। शायद ओस मैटाडोरस मंज न काँसि फुर्सथ न ओस काँसि परवाय जि यि नीम बुजर्ग क्याह वति वति शुर्यन हुंघ पॉठय वोथ्य वोथ्य गछान।

अँती दिचन ओँद्यकी पॉठय ड्रैवरस बडि क्रख — व्वस्ता, लोतय पहान। मे त्राव साँ येती।

यिथु कॅन्य बडि क्रख बूजिथ दिचु इयवरन यखदम ब्रेक। सु वोथ थोद तु गव सवार्यव मॅज्य व्वन वॅसिथ। सु खॉली बैग त्राव्योन गाडि हुंजि बीरि बीरि मंजय, युस गरि नेरनि विजि द्रहय फेकिस अलौंद त्रावान ओस। पॅत्य किन्य लॉयिस कॅम्य ताम क्रख ति बैग द्युतनस दारिथ, युस तॅम्य द्रशिवन्य नर्यन प्यठु रोट।

सु चाव ओँकिस कोचस तु छु पकान।

सु छु पकान, रुकान तु कुनि मकानस ब्रॉह कनि खडा गछान।

सु छु कुनि दुकानस खसान, दुकानदारस थलि थलि वुछान। दुकानदार येलि इशारस मंज प्रछान छुस क्याह गछी, सु छु मोयूस ह्यू गॅछिथ वानु प्यठु व्वन वसान कदम दिवान।

सु छु तिमन तंग कोचन ति अचान यिमन अमि विजि खालय कांह पकान आसान छु।

सु छु तिमन बाज़रन मंज खडा गछान येति व्वसु द्रव्सु तु बीरु छे तु दकु सुत्य छु सु गरा दॅछिन्य ति गरा खोवर्य लायिनु यिवान।

अँती गयि तॅमिस कनन फोनच रिंग। सु गव ओँकिस नज़दीकी पी-सी-ओहस खॅसिथ। टेबल प्यठु तुलुन अख रसीवर तु लोगुन कनस। वानुवॉल्य होवुस इशार सुत्य चंदस कुन जि रिंग छय मोबाइलस गछान। हॉरॉनी मंज फॉलेयि हिशि तॅमिस बुमु। दॅस्ती कोडुन चंदस अँदर फोन तु लोगुन कनस — हैलो। तॅम्य परज़नॉव आवाज़। यि ओँस ओँमिस ज़नान बोलान।

... हे चु कति साँ छुख। फोन क्याज़ि ओसुय बंद थोवमुत। डायल करान

करान आयम आंगजि गसनु । मेय वोनमुत ओसमय अज यिजि सूली पहान । गरि नीरिथ छुय नु चे पतु गरच यादय रोजान ... यिमन आव नु कुकू जी वुनि ति गरु वापस । कोलन हसॉ । पंदाह गंटु गॅयख तु वुनि छुख नु किंही ननान । ज़न तु बुढिथ गव बिचोर । मॅहॅल छु सम्प्योमुत । पुलीस ति आव बैयि छुयि यादय, अपॉरी गॅछिजि ऑनकु वॉलिस ज़रूर तु काकनि हुंद ऑनख हेज्यस....

सु प्यव ज़नस । आ काकनि ओस सुबहनस ऑनकु वरॉय आंगनस मंज दब लोगमुत । ...हमसायन ओस लॅडकु राथ शाम् प्यठु गॉब ।

अंतौ पैयि तॅमिस पानस प्यठ नज़र । बैग फेकिस त्रॉविथ द्रायोव सु सुबहस गरि ... अज ति द्वहदिशिक्य पॉठय ... अमा सु कोत वोतमुत...

सु छु अँद्य पॅख्य नज़र त्रावान । सु छा तौतुय वोतमुत योत सु द्वहय गछान छु किनु कोत । ... तस हेतिन कनन अंदर ज़नानि हुंद्य यिम लफज़ु ग्रजन्य ... पंदाह गंटय ... क्याह तस गॅया पंदाह गंटय गरि द्रामतिस — पंदाह गंटय गॅया तस ... यथ मॅहलस, यिमन कोचन बाज़रन तु लूकन ताम वातनस, यिम नय तस परज़नावानय छि ... न न पंदाह गंटु गॅयि कोल हॅदिस कुकू जियस ... मगर पानु कोत आव सु योर... क्याह करनि क्याजि ... किनु ... यि मा छु ... हांह ..

तॅमिस ह्योतुन चकर युन । सु ब्यूठ वानु पॅजि अँकिस प्यठु ।

तॅम्य दिच पानस दुनन । व्वन्य ह्योतुन गोरु सान च्चवापॉर्य वुछुन । सु कति छु वुन्यकिस । मगर तॅमिस पय छे । सु अय यिमन सारिनय लुकन ज़ानि... यिमन क्या सना गोमुत... तस कुन न वुछानयकांह... ज़न नु ज़ाननुसय...

तॅम्य छुन चंदस अथि । अति आस नु ऑनख अथी । सु आसि मैटाडोरस मंज प्योमुत । दप्योन वारु वुछख तु बदि कडख यिम अकि अकि ... ह्यौवु ...

तॅमिस पैयि हंगु तु मंगु अँकिस नॉरस कुन नज़र, युस अँमिस ब्रूठय किन्य नस्ति स्योदुय द्राव । तॅमिस बासेयस द्वशिवुन्य अँछन अंद्य अंद्य ज़न दित ज़ून पेमच । आरु क्वंडल हिव्य ऑसिस । जन ति शीशव रोस्त ऑनख लोगमुत ओसुन । व्वन्य वुछ तॅम्य बैयिस नफरस कुन । तस ति बासेयस यिथि आरु क्वंडल

अँछन पेमत्य । ज़न ति ऑनख । बेयिस ति बेयिस ति... यि क्याह सारिनय ज़न
बदलय ऑनख हिव्य लॉग्यमत्य । यिमव किन्य मा छिनु यिम वुछानुय कैह.. किनु
तँमिस छु नु पानुसुय ऑनकु वरॉय लबनु यिवान कैह...

तँम्य दोप यि गँयि म्याँन्य हालथ तु काकुनि क्याह वॅनिजि... ओह काकन्य...
ओह कुकूजी....

तँमिस हेतिन व्वन्य ऑरख फटुन्य । व्वन्य कपॉर्य नेरि येमि बाज़रु न्यबर ।
दौपुन प्रछना काँसि, मगर कस । तँम्य त्रोव व्वश... वाह्य, संद्या वख ह्योतुन
वातुन... ज़नानि हुंज़ कथ ऑसुस कनन अंदर ग्रज़ान... गरि नीरिथ छय नु गरच
यादुय रोज़ान ।

तँ मे वचि अँछ ... भगवानु मे वातुनावतु कुनि पॉठ्य गरु ।

ललु वाख

सोबूर छुय ज़्युर मरुच तु नून्य,
खेनु छुय ट्योठ तु खेयस कुस ।
सोबूर छुय स्वन सुन्द दूरुय,
म्वल छुस थोद तु हेयस कुस ।।



त्रेयि त्रह क्रोर दिवता

- मखन लाल पंडिता

जोम यिथ पयव शाम लालस गोड़न्युक वासतु खॉराती लाल दुकांदारस सुत्य। खॉराती लालन ओस किरयानस सुत्य सुत्य व्वन्य दोद ति थोवमुत यथ सॉरी ऑस्य तॉरीफ करान। अमि सब ओस सुबुहकिस पॅहरस तुसंदिस वानस पयठ रश रोजान। यिथकन्य असि आदथ छु सॉरी ऑस्य लोटु बॉह कुन कॅरिथ 'गोडु मे गोडु मे' करान आसान। मगर तॅम्य करनॉव्य तिम लॉन तु पननि वारि ओसुख लिटरनि मगु सुत्य दोद फिरान। दोदु खॉतरु ओस शाम लालस दोहय तॅसंदीस वानस पयठ गछुन पयवान तु लॉनि रूजथ दोद अनुन पयवान। वारु वारु तुलुन बाकयु सोदा सलफ ति तॅस्य निशि। खॉराती लाल ओस रुत नफर तु ग्राकन सुत्य ओस असवुनि हॉजि पेश यिवान। तसंदि खोश खोलकु ओस शाम लालस सु पननिसुय गामुकिस अमु वॉनिस हुवुय बासान। यिथ कॅनि बढ्योव तिमन पानु वॉन्य सख यखलास।

अकि दोह येलि गरमु क्राय ऑस तु वति पकनस ऑस सुबहॉय ऑरकु छटु गछान, शाम लाल दराव खॉराती लालस निशि दोद तु गर सामानु अननि। लॉन ऑस ज़ीठ तु खॉराती लालस ओस वुनि अथु आवुर। लिहजा खोत सु वानस पयठ। बुथिस तु नरयन व्वथरॉविन कमीज़ि दामनु सुत्य ऑरक, पखस तल ब्योठ पान शयहलावनि योतान्य बीरु हमययि। अथु मोकलिथ पिलु नोवनस लोटु तु सुती व्वोनस, 'गरम छु सख'। तस ऑस खबर खॉराती लालस गछि तसुंद मोसूस तु वन्यस, 'आ गरम छु सख'। मगर तॅम्य वोनुस नु किंहय। सु कॅह वनु नावनु खॉतरु व्वनुस तॅम्य बेयि, 'खबर कमन पापन हुंद डंड, भगवान गौव च़खि अँसय लॉगिन यिमन तापु चंजन यथ नु असि हॉल ऑस।'।

खॉराती लालस ति आयि मसा मसा ज़बान । तँम्य वोनस, 'पंडत जी ! सोय सारनयु छु रखान सु गछया च़खि,' 'तयेलि मा छु असि कांह दिवताह च़खि गोमुत, 'तँम्य व्वनुस असवुनि बुथि । 'तथ हयेकय नु बु कैह वॅनिथ,' खॉराती लालन वोनस तोरु असान असान । 'दिवता छुख नाव मगर च़कि छि असी हिव्य । कुस नु कार छु कोरमुत तिमव । गोतम रेश खयेवुन रॉच़ पहरन फयेख ।'

'सु गोछ़ ना यॅदुर पदवी निशि बदर करन ?' तँम्य वोनस ।

'कयाह वनव कांह मा आसयस च़यथ रखान, यिथ कॅन्य अज़ छि यिथयन रखान ।'

'पोज़ छु, तोबु ! तोबु ! दपान तैयित्रह करोर दीवता छि ।

यिम कम्य आदमन गॅज़रॉव्य । अगर नाव हयेनि बयेहमिव वुंबुर गछि अँथ्य सुत्य ।'

खॉरॉती लालन कॅरुस बैयि असनु हना, दोपनस, वुछ कथ छुख सन्योमुत । मे गछन खॉलिस त्रैय खोश रवजुन्य । अवल गो श्री गनेश जी, सु छु थरुक मॉलिख दोयिम माता सरसोती स्व छे अकलि हुंज़, त्रैयिम गॅयि माता लखमी स्व छे दनुच । त्रयि त्रहन करोरन दिवताहन क्या छु असि करुन ?'

शाम लालस बासयोव खॉराती लाल छु पोज़ वनान । यिमय त्रैय गछन खोश रोजुन्य यिथ कॅन्य अँमिस छि । वान छुस सामानु सुत्य टिपिथ, अकलु ति छस सही कॉम करान तु कामि निशि छस नु फुर्सथ ति कैह । दोद ओसुस लोटस फिरिथ, तथ दिचन थफ तु दराव तापु च़ंजि मंज़ वापस । वति रूजस नु खबरुय ज़ि ताफ छु आँदयकि खोतु त्यज़्योमुत ।





नँ सोरवुन सफर

- अमर मालमोही

तापु क्रायि मंज्र छेनिथ थँकिथ वोत मोहन लाल डेरस प्यठ वापस तु ऑरख
व्वथराँविथ दिचुन कूलरस कुन नज़र । युस अँकिस मैग्रंट सुंदय पॉठ्य पँक्य पँक्य
ज़नतु त्यूत थोकमुत ओस ज़ि तोछ सूरिथ ओसस बासान पनुन पान रोटु गोमुत ।
कूलरस ओस पोन्थ मगर वोलेटेज ऑसस नु तु अमि किन्थ ओस नु पम्प कॉम
करान । पम्प ज़नतु मैयग्रंट सुंद दैमाग यथ कुनि कामि कारु तु सोंचु रुस जंग
लोगमुत छु । तँम्य त्रोव व्वश तु कूलर सलयि करेन एडजसट तु सोरुय हवा कोरुन
पानस कुन । कँमीज़ पॉजामु कँडिथ ब्यूठ फकत अंडर शॉटि तु काठि मंज्र । ज़नान
आयस त्रेशि गिलास ह्येथ तु सिर्फ अख दाम चेथ येलि यि बुसर हिश बासेयस,
गिलास थोवुन पथर तु ऑसस अजीब ज़ावयि बनाँविथ वुछुन आशिनि कुन तु तमि
दोपनस, “अज़ द्युत नँ मकानु वाजनि शीन ।”

मोहनलाल लोग त्रेशि गिलासस वुछनि । त्रेश ऑसस सख तु कँहरि दरवेश
बरजान दरवेश मुताँबिक तुलुन गिलासु तु चोन अँछ वँटिथ ।

“गछ बाज़र अनतु शीनु किलो खंड ।” शुर्यव मॉन्थ नँ अज़ यि त्रेश
बिलकुल चैन्य ।” ज़नानि वोनुस ।

मोहन लालस ओस मकानु वाजनि प्यठ सख शरारत मगर करिहे क्या । गॉर
श्वूरी पॉठ्य पानस केथारसिस (cathorsis) करनु मूजूब वोन तँम्य मकानु
वाजनि बदरव तान्य “गोस क्या शिकम लँदनि, द्युतुन क्याज़ि नु शीन ।”

“दोपुन फ्रिजस छु शीन म्वकल्योमुत” आशिनि वोनुस ।

“अवु फ्रिजस पैयस त्रट तु अँड पैयस पानस” मोहन लाल लोग वनुनि “चकि
मान हीलु अँस्य जल जल येति कडनुक्य । खबर कुस बेमु आसेस योर अनुन ।”

“अखतुय वोननम अज्ज ति ज्जि डेरुक क्या कोरव" ज़नानि वोनुस ।

“अँमिस क्या गाश छुना" मोहन लालन वोन ज़नानि कुन । “बुछान छेना ज़ि बांगि नीरिथ छुस बु चांगि अचान । चोन गछयस वनुन ज़ि मकानु छंडुन छेमु चोट फिरन ।”

“बु क्या वनस । च़ करतु पानय मकानु वॉलिस सुत्य कथ ।” ज़नानि दयुतुस मशवर ।
सु क्या करि । यिम छिनु असि हिव्य मरुद ज़ि ज़नानि थवन ऑसस थोप । प्यठु छु सु ज़्यादय स्योस ।”

“च़कि मान अख हमॉम्य तु ब्याख दमॉम्य ।”

तँम्य व्वथरॉव्य बेयि ऑरख तु बी, डी ज़ॉलिथ वोनून आशनि कुन । “
दरअसल छु सोरुय सोन करमु खुर नतु कति अनि हे सरवन्य कालु ज़ांड ज़ोट दिथ
स्वरगु दारु मंजु कंडिथ असि यिमन सेकि सँहरावन तु कनि मॉदानन बागि ।”

तस प्यव गरु याद तु अँछ वेंटिथ लोग ज़न्तु ज़खमन मिज़राब दिनि । रछ खंड
हयुव आस करार ।

“नेम्य त्रेश चेखु ।” ज़नानि प्रुछुस ।

मोहन लालन मुच़रावि अँछ तु प्रछुन ज़नानि “खबर स्व प्रॉन्य ददरि बून्य
आस्या मूजूद किनु नँ ?”

“बु छसय प्रछान नेम्य त्रेश चेखु तु च़ु छुख ददरि बोनि वँन्य दिवान” ।

“हये चॉरी च़े क्या छुय मोलूम स्व बाडवदार बून्य क्या छे ।”

यि बूज़िथ वोनुस आशनि च़खि सान । “च़लनु प्यठु वोतुय यँहॉय बून्य थेकान
.... वोथ थोद अन बाज़रु शीनु किलो खंड । शुर्य छि त्रेशि खॉतरु फहु फहु करान ।”

“त्रेश” मोहन लालन वोनुस ज़नतु कुनि सिरुच बावथ करान । तथ बोनि तल
बिहिथ ऑस सॉरुय त्रेश च़लान । तवय ऑस्य लूख तोर तँहर, खिर तु दवदु वुगरु
निवान । दपान यि बून्य ऑस लागनु विज़ि लल देदि तु नुंद रेश्य सगवमुच़ । कम
साद, संत, दरवेश, फेखीर कलंदर तु सँन्यॉस्य ऑस्य वुमरव प्यठु अथ बोनि तल
थख दिथ अमि किस शौहजारस फरहत तु मोदरेर बखशान । दपान कैह काल पतु

गँयि अथ हंगु मंगु ग्वडॅस तल दॅदुर पॉदु तु यि गँयि हनि हनि बडान मगर पॅत्यम्यन चतजहीन पंचाहन वॅर्यन कोड अमि ददरि ज़्यादय वाश। बून्य रूज़ तोति सर सबज़ तु शादाब। कुस ज़ानि कपॉर्य कपॉर्य ऑसिस मूल। वुह वॅरी ब्रॉह गव अजीब वाकु। अख मसखरु आव बोनि निश तु लोग गगरन छांडनि। तिमन दवहन ओसुस बु ल्वकुट। अँस्य सॉरी शुर्य लॅग्य तस असनि। खबर सु कमन गगरन ओस छांडान। खबर व्वन्य मा आसि स्व बून्य होछयमुच़ या वॅस्य पेमुच़।

“बलाय तथ बोनि।” आशिनि दोपनस। “मे कुस शैहजार कौरुस, म्यान्यन शुर्यव वुछ ति नु। दपान छसय शीन अन तु शुर्य चैन त्रेश। मगर चै छुय अमि बोनि ज़नतु जोद कौरमुत।”

“बोनि मु वन बद रद। मे छुय तमि बोनि हुंद शैहजार बाज़े रुमस रुमस बसान। अगर मे यि बास आसिहे नु बु आसुहा खबर कर सन सिट्रीकु सुत्य मूदमुत।”

“येलि ति चु अमि बोनि हुंज कथ छुख करान मे छु चोन देमाग ठीख आसनस प्यठ ति शख सपदान मे वनतु बन्योवयि कुनि कमरु” आशिनि प्रछुस।

“अँकिस जायि छु अख कमरु य्वहोय मानतु गरिकिस ठोकुर कुठिस योत। हेरि खँतिस मंज़ छुस किचन। बाथरूम बेतरि छुस व्वनकनि। ब्रॉह कनि छस वरंडा रछा ति।

“किरायि छस सथ हथ रवपयि।”

“शलुफ छिसा” ज़नानि प्रछुस।

“शलुफ छिस। मगर कमरु छु ल्वकुट” मोहन लालन वोनस। व्वन्य कति बनन रवख ज़नानि वोनसु। सोन ताकथ मा छु सास, बँदय किरायि दनिस ज़ि नॅखरु करव। प्यठ छे येमिस डॉनि सुत्य दवहय बुथ्य लागय करुन्य “चु यि मे सुत्य तु बु ति दिमु तथ कमरस नज़र।”

दोयमि दवहु नियि तॅम्य स्व पानस सुत्य कमरु वुछनि। स्व ऑस कमरु वुछनु खोतु यि वुछनि आमुच़ ज़ि मकानु वाल्यन छा फ़िज तु तिम दिनु तिमन द्वहय शीनु बवुल खंड। येलि नवि मकानु वाजनि तस यि वोन “जितनी चाहो बर्फ़ लेलो” तस आयिनु पछ तु मकानु वाजनि यक तरफ बेनि तोन करनुक वादु कॅरिथ दिच़ तमि तिमन रेतुच किरायि पेशगी।

सामानु गंडान, वटान तु शेरान प्यव मोहन लालस सु दवह याद येलि हमसायव बकोलि तिहुंदि तॅम्यसंज ज़िंदगी बचावनु खॉतरु तस गरु त्रॉविथ तस जलाय वतन सपदनु खॉतरु इसरार कोर । सु लोग तिमन बे पछ़ हालातन मुतलक सोंचनि । येलि बचाव, वथ, ज़िंदगी, मँज़िल सोरुय अख अनज़ान सडख ऑस । शायद ओस सु वॅरयी द्रकि प्यठ सवार । सु क्रूठ, ज्यूठ म्यूठ तु अंज़ान सफर कोर कुन ओस । स्व गुनसि हिश पुरपेच तु खमदार वथ ऑसा पुर स्कून ज़िंदगी कुन गछ़ान किनु अँकिस इजतिमाँई मोतस कुन । यि फॉसलु करुन नँ ओस मोहन लालस खॉतरु सँहल त नँ फरज़ । योदवय सु गरि खॉली अथव च़ोलमुत ओस मगर जोम वॉतिथ ओस सामानु समुन हयोतमुत । अज़ताम शेन वॅर्यन मंज़ ओस तस सति लटि डरु बदलावुन प्योमुत । प्रथ डेरु तबदीली ऑस अख नॅव च़लु लार । अख नौव मयग़ेशन, अख नॅव जलायवतनी, अख नौव रावुन । रावुन, रावुन तु रॉव्य रॉव्य रावुन । जलाय वतनी तु रावनुक अख अछ़यन अमल । तिमन पापन हुंद डंड यिम काँसि ति ज़ांह ति कॅर्यमित ऑस्यनु ।

यि सूंचिथ कॅर तॅम्य सामानस नज़राह । वुन्यकिस ऑस्य तिम अँकिस ज़ीठस तु तंग कोचस मंज़ रोज़ान । रेडु वातिहे नु ओर । सु वोथ सुबहॉय तु लोग सडकि ताम सामानु सारनि । ज़नान थॅवुन अथ रॉछ । दवयि गंटु वातनोव तॅम्य सोरुय सामानु सडकि प्यठ । शुर्य ज़ु तु ज़नान अत्यथ थॅविथ गव पानु रेडु छ़ांडनि । रेडु वॉल्य येलि सामानु वुछ़ तॅम्य कॅर लफ़ज़ गरदॉनी तु मोहन लालन सूंच ज़ि अथ तॅतिस तापस मंज़ बैयि रेडु छ़ांडनु खोतु छ़ु बेहतर सामानु बरुन तु डेरस प्यठ वातुनावुन । संदूक ज़ु, त्रै, हना बिस्तुर पलव, कैह खॉली टीन फोलडिंग ब्यड, बानु, मसालु डबु तु फ़ैन बरनु सुत्य आव रेडु बॅरिथ तु कूलर बोरुख प्यठु कनि । रेडु वॉल्य गंजि अडु गरि मडु गरि रज़ु । मोहन लालन वोन आशनि शुर्य ज़ु ह्यैथ मैटा डोरस मंज़ नॅविस डेरस प्यठ वातुन । रेडु वॉल्य वोन तस खोवरि तरफ़ पायि दानस प्यठ खसुन तु सु खोत पानु दॅछ़नि तरफ़ । दॅछ़न खोर थोवुन पायदानस तु खोवुर बमस प्यठ । मोहन लाल रूद ओड बिहिथ तु ओड व्वदन्य । गुर लोग रॅहदार पकनि ।

मोहन लालन कॅड बीडी तु दुह त्रावान बास्योस ज़ि व्वन्य ओस सु प्राणि शिकसु मंजु नीरिथ कथ ताम नॅविस मंजलस कुन पकान । मील च्वम्बरु पॅकिथ चाव गुर सडकि प्यठु अॅकिस कोचस मंज । कोचि ओस कुशादु तु रूड्य ऑसुस त्रॉविथ । ब्रॉह पहन ऑस गज़ वुहमरु ज़ीठ व्वदुन्य डकुर । अथ नखु त्रोव रेडु वॉल्य गुरिस छांटु दब तु सु लोग चुपंजल दवनि । अॅथ्य मंज आयि कत्यथ ताम रज़ नीरिथ तु कूलर प्यव बोन तु लोग डुलनि । मोहन लालन वोन रेडु वॉलिस रेडु रुकावनु बापथु मगर कूलर पेनु तु डुलनुच आवाज़ बूज़िथ खेयि गुरय ख्रख तु बे कोबू पॉट्य ज़न तु लोग वुडनि, बाकुय सामानु ति लोग पथरि प्यठ डुलनि तु छॅकरनु यिनि । रेडु वॉल्य दिच गुर कोबू करनु खॉतरु व्वठ मगर लाकम चॅजिस अथ मंजु नीरिथ । हयोर वॉतिथ ऑस रेडस मंज फकत बिस्तरु पलव जोराह तु मोहन लाल पान चोमरॉविथ । ब्रॉह पहान ऑस अख टूक खडा । य्वदवय गुर पानय ठॅहर्योव मगर अकिस दुकानदार सुंद्यन ऑट्य त्रवडन वोत न्वखसान यिम तॅम्य टूकि प्यठ वॉलिथ सडकि प्यठ थॅव्यमित ऑस्य । मोहन लाल रेडु वोल ज़ॉनिथ लॅग्य जु चोर नफर तस चोब दिनि तु तीतस कालस वोत रेडु वोल ति ओतनस । तस सुत्य क्याताम कथ कथ कॅरिथ लॅग्य तिम मोहन लालस न्वखसान पूर करनु खॉतरु वनुनि, मगर मोहन लालस ओस नु किहींय बोजुन तगान । तिमव वुछ तस पानय चॅदस तु कॅडहस रूपयि ब्वदुर य्वसु जु दवह ब्रॉह तस तनखाह मीजमुच ऑस । अजि रूपयि तुजख तु अजि थ्यव्यख तस वापस चंदस, मगर तॅम्य वोन नु तोति कॅह । सु ज़न ओस रोबूद गोमुत तु तस ओसनु तमि नस सीरि हुंद एहसास ति य्वसु तस फेरि फेरि वसान ऑस । ब्याख दुकानदार आव तस त्रेश ह्येथ, मगर सु लोग हंगु मंगु ठा ठा कॅरिथ असनि । अमी विज़ि वॉच तॅम्य सुंज आशेन्य ति शुर्य ह्येथ तोर । तमि व्वथुर तस रथ मगर मोहन लालन दयुतुस दकु तु खंगालु त्रॉविथ वॉननस । “वुछ वुछ स्व दवदुर बाडव बून्य दॅज — दॅज सॉरुय मूलु प्यठु तिहरिस तान्य मूलु प्यठु तिहरिस तान्य” ।



ग्वफ

- गौरी शंकर रैणा

ग्वफ ऑस ज़ीठ। तस बास्योव ज़ि ग्वफ छि ज़्येठान। अथ ज़न ओसनु ऑन्थुय। सूंचुन ज़ि अमिस पज़िहे पानस सुत्य अख नफर अनुन। त्रेशवन्यी नफरन क्याह ओस लोवर कोवि मंज़ करून। टीमुक ज़्युठ आसनु मूजुब ओस अम्य तिमन हेदायथ दयुत्मुत। “आप उस lower cave में जाओ। मैं खुद इस ऊपर वाली में जाता हूँ”। “येस सर” वनिथ द्रायि तिम तु चायि बॅन्यमि ग्वफि। यि ओस कुनुय ज़ोन अथ ह्येरमि ग्वफि मंज़। अमिस युस बेदू — बल्ब हैल्मटि सुत्य लॉगिथ ओस तॅम्युक गाश प्यव लबि प्यठ। अम्य दिच अथ तवारीखी लबि नज़र। बैग मंज़ कोडुन अख ल्वकुट अवज़ार तु तोछुन अथ लबि। अति आयि अख छल वसिथ। यि छल थॉवन अकिस नविस मोम जामु लिफाफस मन्ज़ बन्द। प्यठ लोगनस अख **sticker** तु तथ प्यठ ल्यूखुन खबर क्याह क्रेहनि मार्कर् सुत्य। सूंचुन ज़ि पनुनि लेबि मंज़ वॉतिथ करि अथ radiometric dating तु लग्येस पताह ज़ि यि ग्वफ काँचाह प्रॉन्य छि। Archeological सर्वे हंदय डाइरेक्टरन ओस अमिस साइटि प्यठ नेरनु वक्तु वोनुमुत, “The age of the stone must be determined numerical age of the earth materials is important to know the history,” अमिस ओस पनुनिस डाइरेक्टर prof. Shekarस प्यठ केंछाह गोसु ति तिक्याज़ि ज़ु रयेथ ब्रोंहुय ओस यि अजंता गोमुत तु **low light** मंज़ ऑसिन तति ग्वफि हेन्ज़न लबन प्यठ बनेयमचन पेंटिंगन फोटो तुल्यमित। तिम फोटो छपेयि दिलि हुन्दयन तमाम अंग्रीजी अखबारन मंज़। अमिस आव नेशनल म्यूजियमकिस हालस मंज़ अख ल्येखचर दिनु खॉतरु ति वननु। यि स्पुद स्यठाह मशहूर तु प्रोफेसर शेखरस ति खोत बोश। अम्य सूंच — सेमनार रुमु मंज़ु न्येरान

— न्येरान फेचेयि मेय्य ज़ि वोनमस, सर अगर कश्मीर का कोई प्रोजेक्ट हो तो मुझे दे दीजिये गा।

म्ये क्याह ऑस पताह ज़ि यि कडि अमी दोह शामस आर्डर।"

यि पोक ग्वफि मंज़ ज़रा ब्रोंह पाहन। बैगु मंज़ु कोडुन कैमरा तु तुल्यिन लबन फोटो। कैमरा कि फ्लेश पतु गव बेयि अख फ्लैश हयू पॉदु। अम्य दिच वारु नज़र। युथुय अख बीम, ज़नतु लेज़र बीम हयू च़ाव ग्वफि हुन्दि गॅल्यि किज। न्येबुरु आसु वुज़मलु तु गगरायि गछ़ान। अम्य ज़ोन न व्वन्य ग्वफि मन्ज़ ज्यादु कालस रोज़ुन मुनासिब। अम्य सूच क्याह अभिनव गुप्त ति ओसा यिछ़ी हिशि ग्वफि मंज़ पनन्येन च़ाठन सुत्य च़ामुत तु पतु द्रावय न वापस।

खॉर, अमिस पज़ि व्वन्य न्येरुन। अँम्य कोड़ पननि चन्दु मंज़ स्दंगु यि ज़ाननु खॉतरु ज़ि अमि संदि टीमक्य नफर कत्यथ छि वुनकेनस ताकि सुलि गरि न्येरव तु वातव पननिस कैम्पस प्यठ। मगर अम्य थोव स्दंगु बेयि चन्दस मंज़ वापस तिक्याज़ि अति ऑस नु signalय। अमिस पज़िहे walki talkie हुन्द set सुत्य अनुन। यी सोंचान — सोंचान गोंड अम्य पननिस hiking बूटस, डयोल गोमुत फीतु। येमि सातु यि बूठ मॅल्य हयेनि यि डीकेथलान — स्टोर ओस गोमुत तमि सुत्य ऑस अमिस शक्ति सुत्य तु पतु कोर यिमव डिनर ति न्येबरय। डिनर करान — करान प्रुछ तमि अमिस, “कॅचन दवहन हुंद टूर छु?”

“म्ये छु पानसय ताम। यीतयेन दोहन बु रोज़ुन यछु तीतेयन दोहन हयेकु कॅशीरि मंज़ रूजिथ”

“तोति?”

“म्ये छु बासान 20-25 दोह”।

“टीम कोताह बोड़ छु?”

“च़ोर — पांछ नफर। अच्छा वन च्ये क्युत क्याह अनय”।

“किहिन नु राजेश। येति कमि चीज़च कमी छि। अगर टाइम मेल्यी तुलमुल गछ़ज़ि।

“आ! आ! ति छु म्ये ज़ेहनस मंज़”।

शक्ती ऑस अमिस गोडनचि लटि भीमबेटका केवि मंज़ समख्येमुच। तँम्यि ऑस पनन्य थीसिज़ रॉक – आर्टस प्यठ सबमिट कॅरमुच तु यि ओसुस गाइड़। पतु बनेयि यिम दोस्त तु पतु ज़ु बॉच।

यि ओस ग्वफि हन्दिस् देवारस सुत्य ड़ोख दिथ खड़ाह तु अमिस बास्यव hiking बूटस योहय पोन्थ ह्यू अछान। अम्य त्रोव बैट्री गाश बोनकुन तु वुछिन दोशवय ख्वर पॉन्यिस मंज़। पोन्थ ओस बूट ह्योर कोठयेन ताम वातुन ह्योतमुत। अम्य सूंच यथ ग्वफि मंज़ आसि ज़रूर काँह क्वल। यि क्वल काँचाह सॅन्य आसि तम्युक अंदाज़ु लगावुन ति छु मुश्किल। यि ह्योतुन ग्वफि मंज़ वापस न्येरुन। पोत फेरान – फेरान पेयि अमिस तिम जटाधारी याद यिम यिछन ग्वफन मंज़ रोज़ान ऑस्य तु ज्ञान प्रावान ऑस्य। अमिस प्येव सु बोड़ आई.आई.टी प्रोफ़ेसर ति याद युस, सोरुय कॅन्ह त्रॉविथ, वुनिक्येन ति उतराखण्डचि अकिस ग्वफि मंज़ छु रुजिथ। काँचाह शाँती! अमिस ति बासेयि यथ ग्वफि मंज़ यहय शाँती हिश। यि ओस मुलकुच्येन वार्याहन historical तु archilological ग्वफन चामुत मगर युथ ह्यू अहसास सपुद न अमिस कुनि ति जायि। अम्य बूज़ कुसताम अजीबय शूँ! शूँ !! क्या क्षमा, दिमु, बुद्धि शुनि तु अक्रोदुक अहसास छा यिछनुय ग्वफन मंज़ वोतुलान!

यि रूद ग्वफि हुन्दिस् गलिस कुन पकान। गॅल्युक गोलु ओस योहय सपेद बिंदु ह्यू बोजनु यिवान. श्वेत बिन्दु! यि रूद अथ्य बिन्दुहस कुन पकान। बिन्दु गव बड़ान तु यिति ह्योतुन गॅलिस निश वातुन। गॅलिस नजदीक वातवुनुय आयि अमिस बुथिस रूद छिक् लायनु। न्येबर् ओस अछेयन रूद प्येवान। यि पोक रचिहेना बेयि ब्रोंह पाहन। चंदु मंज़ कोडुन पनुन मोबाइल तु फोन मिलुनोवन पनुनिस सॉथियस, युस अमिसन्दि दीमुक अख ज़िमदार मेंबर ओस। फोन रल्येव। सिगनल ऑस यिवान।

“हैलो सुदर्शन, मैं राजेश बोल रहा हूँ।”

“हाँ सर ! आप कहाँ पर हैं ?”

“मैं cave की entry के पास हूँ।”

“ सर जल्दी नीचे आईये। हम आपका ही यहाँ बेस के पास इंतज़ार कर रहे हैं। जैसे ही हम अपनी केव से बाहर निकले वैसे ही ज़बर्दस्त पानी बरसने लगा। सर, मुझे लगता है कि हमें तंबू के बजाय शहर में जा कर किसी होटल में रहना चाहिए।”

“ठीक है, मैं आ रहा हूँ। Rain coat पहन लेता हूँ।”

“आइये सर, आइये!”

अम्य कोड़ बैगु मंज़ुरेन — कोट तु लोगुन। पतु पोक बेयि ब्रोंह पाहन तु दिचुन च्वपार्य नज़र। हर तरफ़ ओस पोन्यी — पोन्य। येति मा ह्योतुन बेयि सतीसर बनुन। जलोदभव मा छु बेयि पौंदु गोमुत ! अम्यचयून ज़ि पॉनिस मंज़ ख्वर त्रावुन छुनु ठीक। यि रूद अती ग्वफि हुंदिस गलिस प्यठ सोंचान ज़ि पोन्य कर सना वसि !



ललु वाख

संसारु नॉम्य तौव तँचुय,
मूढन किछुय तावनु आय।
ज्ञान-मुद्रा छय यूगियन किछुय,
सु यूग कलि किन्य परज़नु आय।।



हरदु वाव

- रूप कृष्ण भट

अज ओस सुबु प्यठय आसमान चौरिथ ज़न। तापु ज़ुच ति ओस नु प्यमुच।
 वावु रिंगाह ओस सुबु प्यठय चलान। व्वन्य युथुय दिगर ह्युव वोत, वावस लेंज
 तीज़ी हिश। ज़ौनु दद वेंछ कौनी प्यठु व्वन तु बीठ ब्रांदस पनुनिस प्यठ असमानस
 कुन वुछनि। दानि ओस च़ेपि, तस लेंज फिकिर हिश ज़ि हरगाह वाव तेज़योव तु
 रूद लोगुन तैलि क्याह बनि। ज़ौनु दद ओस वावस सख खोचान, सु ति हरदु
 वावस। हरदु वाव छु मिनटस मंज़ जंगली नारुक्य पौठ्य फौलान तु फसलस,
 कुल्यन कट्यन, जायन क्यो इनसानन लुरपार करान। अख नज़र ओस
 असमानस कुन करान तु अख नज़र खलस कुन। खल ओस वुनि खौली। सोरुय
 दानि ओस वुनि डलसुय मंज़। स्व गयि बेकरार हिश। यि ओस तस बोड ऑब स्व
 ओस यकदम व्यसरान। मगर करि हे क्याह तस ओस गोडु प्यठय गुदरिथ आमुत,
 दपान येस्य बैनिथ यियि सुय ज़ानि। अँथ्य सौंचस ओस ज़ि तस पैयि आंगनु अपारि
 सेदि स्योद वेशि मालि हुंज़ि जायि कुन नज़र। तस ज़न लेंज वॉलिंजि कुनी थफ।
 दानि क्यो खल मँठिस। येलि येलि ति तस अथ जायि कुन नज़र ओस प्यवान, तस
 ओस्य अमि जायि हंघ बंद दारि दरवाज़ु खेनि ज़न यिवान। दँछुन अथ थोवुन बुथ्य
 लबि दिथ तु बीठ सँजीदुगी सान वेशिमालि हुंदिस दरवाज़स वुछनि। दरवाज़ु हंगस
 न्यँबरिमि तरफु ओस ज़लुर्य ज़ौज लेंजमुच तु बैनिमि तरफु दासस सफेद ह्यडर
 हिव्य फेंड्यमुत्य। हाँकलि ओस ज़ंग लोगमुत तु लेंकरि दरवाज़स हेरु प्यठु व्वन
 ताम ओस ज़न तु मैचि लिवुन खौतमुत। अमि जायि हुंज़ खसतु हालथ ओस
 टाकारु पौठ्य हौविथ दिवान ज़ि यि छे वारयाह कालु प्यठु बाँचव वरौय।

ज़ौनु देदि त्रोव व्वशा तु गँयि कमन ताम ग्वतन। तस गँयि वेशिमालि हुंज़ु
 क्रकु कनन, “हता हता यि कडखा दरवाज़ु टंगु, अथ कथू छुख सवारि खौतमुत।

चे बनी ना बेयि कुनि जायि गिंदुनु ओरु योरि यिथ छुख अँथ्य दरवाज़स नॉल्य गछान।" वैशिमाल ऑस यिमु क्रकु पोशिनिस ल्वकटिस नेचिविस आशूहस दिवान आसान। मगर मजाल ओसा आशूहस क्या गिछहे यिमव क्रकव सुत्य कांह असर। सु ओस ज़्यादय खँहलान तु दरवाज़स कुरकुच मुहुल बनावान। वैशिमाल ऑस अथस क्यथ लूर तुलान तु तस लार करान। आशू ओस दव तुलान तु आंगनुकिस डून्य कुलिस निश वातान। पनु वँथरन कुन ओस ऑखिथुय पिलव करान। वैशिमालि ऑस ज़्यादय रेछ व्वथान। स्व ऑस बराव दिवान। “व्वन्य आखा डून्य कुलिस कुन वलनु। नतु छा बा महलुक्य शुर्य कम कँह। तिमन बँड बलाय तिमव छाबा अथ अख डूना ज़ुरनोवमुत। यां गँछ्य अडु चँट्य गछुन्य। ओरु योर, यिथ छि अँथ्य डून्य कुलिस वलनु यिवान।" ज़ॉन, देदि त्रोव ज़्यूठ व्वशा। शायद ऑस सोंचान ज़ि दरबाज़ु ति छु अँती तु डून्य कुल ति मगर वैशिमालुय नु कुनि बूद। स्व नियि ज़न शुर्य बॉच ह्यथ हरदु वावन पानस सुत्य डुविथ। अमा कोत सना गँयि तिम सॉरी वैशिमाल, सरवु जुवु, पोशि, रानी, पिचि तु आशू?

ज़ॉनु देदि ज़न लँग्य बंबर स्व वँछ ब्रांदु प्यठ थोद तु गँयि वैशिमालि हुंदिस आंगनस मंज़। अति लँज आंगनस ओरु योर करनि तु ऑखुर आयि तु बीठ डून्य कुलिस तलु कनि बेयि अथ जायि कुन मुदय गँडिथ। तस पैयि पनुन्य प्रॉन्य द्वह याद येलि स्व अथ आंगनस मंज़ माहरेंन्य बँनिथ आयायि तु ग्वडु खार्यायख सरवु जुवनिस मकानस मंज़। खालु रॉथरस ऑस तोताम खामुय जाय ल्याहज़ा अँनिख ऊर्य प्यठ। खालु रॉथरु तु सरवु जुव ऑस्य ल्वकचारुक्य यार। यिकुवटु बडेमुत्य, पलेमुत्य तु वुमरि अख अँकिस हमसायि रुद्य मुत्य। ज़ॉनु देदि ज़ायि ज़िठ्य बागि कोरि जोरा तु तिमन पतु गुलाम अहमद। वैशिमालि ऑस ज़िठ कूर स्वनु बटन्य तु तमि पतु पोशकर नाथ। गुलाम अहमद तु पोशकर नाथ ति ऑस्य लग बग अकी वाँसि। ल्यहाज़ा पकुनोव यिमव ति पनुन्यन माल्यन हुंद रिशतु ब्रॉह कुन। द्वशवय ऑस्य हमसाय गामुकिस सकूलस मंज़ परान येलि पतु अचानक खाल रॉथरु मँरिथ गव तु ज़ॉनु देदि त्रावुनाव्याव गुलाम अहमद पडॉय मगर सरवु जुवन मोनुस नु। तँम्य करनावनोव सु ति पोशस सुत्य मैट्रिक पास। तु द्वशवय लँग्य अकी

वैरियि माशटर । अमि द्रुह मनाव्योव गॉम्य गामन जेशनु । यिम ऑस्य अँथ्य गामस मंज़ ग्वडिनक्य मुलॉज़िम । ज़ॉनु देयद हेकि हे नु सरव जुवस पँज्य पॉठ्य हूरिथ । गुलाम अहमदुन नेथुर ति कोर सरव जुव नुय । पोशस ति आव खांदर करनु । द्वशवनिय ज़ायि शुर्य मुर्य ति सुत्य सुतिय । तथ दमस ताम ओस सोरुय ठीख ठाख चलान येलि अचानक पॉठ्य बदलुय आबा दैरियावस वोथ । ल्याहज़ु मुलाहज़ु रोव बाँय बंदुत गव खतुम हरदु वावन अँन्य सॉरुय रेश्य वॉर गेरस मंज़ु व्वज़ल्य तु नील्य वार खँत्य तु वावु तूफानन कोर सॉरिसुय तलुक प्यठ । अँड्य लँग्य लार तु अँड्य दार । गरन हुंघ गरु गँयि वुजारु । कमु मंदोरि गँयि खॉली । इनसान नियि वावन पानस सुत्य डुविथ तु त्रॉविन बालु अपारि । यि ओस नु वाव बैलिकि कँहरि इजहाल ।

ज़ॉनु दैदि हय चलि हे तु तिमन तबलीग वाल्यन करिहे समु सौतुर, यिम गामु गामु तु शहरु शहरु गँछिथ वारयाह कालु प्यठु यि ज़हर फॉलावान ऑस्य तु मँशीदन क्यो असतानन मंज़ वाज़ पँर्य मज़हबकिस नावस प्यठ लूकन हुंघ जज़बाथ मजरुह करान ऑस्य । यूत काल अँदुर्य अँदुर्य गगर पँट तु न्यँबुर्य युस अपजुय सौथुर ह्युव बोज़नु ओस यिवान सु गव अकी दकु सुत्य छलि छलि ।

तनु ऑस ज़ॉनु द्यद ज़्यादय अथ जायि कुन अँछ दरु कँरिथ रोज़ान तु गंटु वादु वैशिमालि हुंदिस आंगनस मंज़ गुज़ारान यनु सलाम पीरुन्य रँशीदन वोनस ज़ि सरव जुव गव जेमि तापु बुज्य तु वैशिमाल छे फॉतिरु संघ पॉठ्य गरु गरु फेरान तु वति पकुवुन्यन गरुच खबर अतर प्रछान आसान तु पोशि छु पनुन अयाल हथ्य कति ताम खूमस मंज़ रोज़ान । मथ ओसुस गछान ज़ि काव लॉगिथ गछिहे वुफ तलिथ तु वैशिमालु निश वातुहे । वारयाह लटि वन्योन गुलाम अहमदस ज़ि पोशस हैतु खबर मगर सु ओसुस अकोय जवाब दिवान ज़ि काख गछन नाराज़ तु दिन सज़ा ।

ज़ॉनु द्यद ऑस त्र्यन तु त्रुवहन गॉनुच । बुथ ओसुस कालु तमुन ह्युव गोमुत । अँछ आसस अँदरेमचु । कसाबु लोँचि सुत्य याम ओश ह्योतुन व्वथरावुन नसीमुनि क्रेकि सुत्य गँयस दुनन हिश “हये माँजी चु किहे छख अथ बटु आंगनस मंज़ करान ? तलय व्वलु ह्योर खस ।” नसीमस ओस नु ज़ॉनु दैदि हुंद यिथुकँन्य आँतु गछुन ख्वश करान । स्व ऑस तस अथ कथि प्यठ गरि गरि बुथ ख्यवान ।

मगर स्व दिजि हे दब पानस ज़ॉनु देदि ओसुस नु कैह वैचान। वेचिहेस ति क्याह ? तस कति मशि हे यि आंगुन। नसीम, ऑस अथ प्यठ पनुनिस खांदारस बार बार पामु दिवान तु दज़ान दज़ान ऑसुस वनान खबर माजि क्याह छु अथ बटु आंगनस मंज़ अँतलास वाहरॉविथ आसान। गरि छे नु टिकानुय। अनकथ छे ऊर्य वातान। गुलाम अहमदस ऑस नु नसीमुन्य गलथ बयॉनी ख्वश करान मगर वनान ति ओसुस नु कैह मगर खबर अज़ कति अँन्य तँम्य ह्यमथु शायद मा आस माजि हुंद हाल वुछ्थि जानि मनस प्यठ। सु वोथ खँशमु सान खानदारिनि कुन “नसीमा बकवास कर बंदु चै छुय नु कथ करनुक तँमीज़ुय। चै क्या पताह छय यि आंगुन क्या छु सानि बापथ। यि छु नु बटु आंगुन बँलिकि म्योन ल्वकचार देदि हुंदि यावनुक बहार छु अँथ्य आंगनस मंज़ बरजसतु गोमुत। यि छु सानि बाँय बरादरी हुंद गवाह। सोन पथ कालु सोन तॉरीख। चु क्याह ज़ानख अमिच कदुर ? ग्वडु छुवा त्वहि शहुरक्यन पताह तहज़ीब तमदुन क्याह गव ? बाँय बरादरी क्याह गँयि ? तोह्य छिवु फितिनल। सारी फसादक्य जड अँज़िकि फसादुच जड ति छिव तोही। असि गामुक्यन छु प्यतरुन प्यवान।” गुलाम अहमदस ज़न गव अज़ वँरियि वादुक गंड येले। सोरुय बोस लोचरोवुन। मगर नँसीमु ति कति हेयिहे पोत तस लोग ज़्यादय तॉश। तु वँछुस शरारतु सान “ त्वहि छुवु, माजि पोतरन बटु तसरुप गोमुत। खबर चु कथ प्यठ छुख यूत वोलान। मे क्याह वोन यूत। अज़ नु बोय बाँयिस प्रछानु अदु छे नु हमसायि संज़ कथुय। सु ति गॉर दीनुक हमसाय। “नसीमा बकवास कर बंद। मे मु करनाव ज़्यादु कथु। वुछ्थु ना पनुन्यव हमदीनव क्याह सलूक कोर असि सुत्य। अमु मामुन्य बिलु कँरुख गॉबुय। सुलु गाडुन्यन न्वशन कोर्यन क्या हशर कोरुख। सलाम हॉज मोरुख हून्य सुंध पॉठ्य चुवँतिस प्यठ। तुल कर छ्वपु पानस।”

नसीमस गव शायद पननि गलती हुंद ऐहसास। स्व द्रायि मंडवु मंज़ु तीज़ी सान न्यबर। ल्वकुट नैचुव इमरान दोर्योस पतु पतय। तँम्य प्रुछुस, “माँजी बटु क्या गव बटु ?” बटु नाव बूज़िथ आयि स्व बेयि तॉशस लायिनु। स्व वँछुस शरारतु सान “बटु हसॉ गव पानस क्युत त्रट। युस हरदु वावन पानस सुत्य डुविथ न्युव। चोल तु गोल, मगर असि रूद तोति प्यतरुन



देद

- रिक् कोल

“हय हय गॅयि बिजली...यिथिस गरमस मंज़ छिनु यिम अडु चॅट्य दोन
मिनटन ति बिजली थवान... अदु त्रठ पैयि तन तिमन यिमव अँस्य यथ सफरस
लॉग्य। अँस्य हय पनानि गरि हाखा बताह खयवान अँस्य कथ लॉगिक्य यथ
सयेकि शाठस, येति बिचयव तु सरफव कृत्य मॉरिथ छन्य... हय। भगवानु ...
यि पैयितन त्रठ तिमन यिमव अँस्य यथ शहरस लॉग्य ... कम कम सिन्य ऑसुस
पननि वारि मंज़ व्वपदावान तु टासा कॅरिथ खयवान ... अदु त्रठ पैयितन तिमन
यिमव अँस्य योर लॉग्य, येति द्रवगु मोलु सबज़ी हयथ तु छुनु तयुथ मंज़ लगान युथ
तति ओसुम लगान ... कति ब्यम पनुनि वारि हुंद वोसतु हाख, बॅदय हाख, मोनजि
हाख, सोचल, पालक, मीथय, गोगजि बयतरि तु किथु पॉट्य ऑसुस बु अलु हचि,
वांगन हचि, रॉट वांगन हचि होखनावान... कम कम सीन्य अँस्य... अदु वनान ज़न
अँस्य असि दालि बटु मगर तसंजय दर्य छम कुनि रयतु ऑस नु दालि प्यठ वॉरय
वातान ... अदु त्रठ पैयि तन तिमन यिमव अँस्य कॅद्विथ छन्य..." यंबरजल अँस्य
वाय वाय करान तु पांसयु सुत्य रॉव्य मुतिस दरामंस याद करान। बोज़ि हयस कुस ...
कस ऑस फुरसथ यि बोज़नच ... तु बार बार यिमय कथु कस करि बोज़ुन पसंद ...
कुस करि हे हयमथ तु वनि हय यंबरजलि ज़ि यिम कथु पज़न नु दोहरावन्य ... यथ यि
गछुन ओस तथ ति गोव ... बार बार दोहरावनु सुत्य कयह नयरि अमि मंज़ु ... पांसयु
वातय ज़र्यर ... बलड प्रशर छु यिमव कथव सुत्य हुरान ... मगर सु कुस बॉच करि
हय सुह गोंछ मयूठ तु वनि हय यि कथ फोनस प्यठ ददि।

खॉर अकि दव्ह ऑस यंबरजल यिमनयु कथन दोहरावान तु अमी सातु गॅयि
कोचि मंज़ु आवाज “कॉशुर गबु मा हयव ... कॉशुर कॉलीन मा हयव ... कॉशुर

शाल मा हयव ... हय गबु हना ... शालु हना ... कॉलीन हना मा हयव"। यिम कॉशर्य लफ़्ज बूजिथ वेंछ यंबरजल थोद तु कुनी टुकि द्रायि दर्वाजस निश तु कोरुन अँमिस फेरि वॉलिस आलव। फेरि वोल् आव तु खॉर पाठा कॅरिथ चोनुन यजतु सान अंदर। ग्वडु दयुत नस त्रेशि गिलासा तु पतु प्रछनस "चय क्यह छुय नाव?"

“रमज़ान”

“चु कति छुख रोज़ान?”

दैदी बु छुस गंगयालु किरायस प्यठु रोज़ान।”

“हय! बलायि आयि तथ गंगयालस, हथा असली कतयुख छुख?”

“दैदी ... कॉज़्य गोंडुक।”

“हय ... गोव चु छुख मे मालिनुक पोछ।” दैद गँयि कमन ताम गोतन तु पहर्य खँड्य प्रछनस “चु क्याजि बुथि यिहोय शुस हयु बासान ... बतु छुथा खयोमुत... किनु फाकयु छुख फेरि द्रामुत।”

“दैदी ... तोंदरि चर्वचि सुत्य चायि प्यालु जोराह चयथ छुस द्रामुत। शुस आसु अवु मव्खु बासान ज़ि अज कॅरुम नु रातस अख जव्ल ति नयंदुर ... असि ऑस नु रॉत्य रातस बिजली। येति त्तयोव गरम तु सोंचान छुस यिम बचेमुत्य शाल गबु कनु हा तु नयरु वापस गरु।”

“हय! बलाय अयि यिमन बिजली वालय्न ... यिथिस गर्मस मंज़ छि अक्सर बिजली निवान तु यि छिनु सोंचान ज़ि प्वलिकस क्याह बनि ... अदु त्रठ पैयि तन तिमन यिमव अँस्य हय हय हय बु क्यह छस यि वनान ...”

“कमन गँछ त्रठ प्यन दैदी चु कमन हुंज कथ छख करान?”

“हता यिमनयु बिजली वालय्न हुंज बैयि कमन. व्वथ सव् शाव अथु तु बु शयरय बतु ... होकि छुय नलकु।”

“दैदी, चु क्याजि करख म्यनि बापथ तकलीफ मे छु व्वन्य आदत गोमुत यक डं गी खयनस बांगि छुस न्यरान चायि प्यालु जोराह चयथ तु चांगि छुस अचान तु बतु मॉड खय्वान।”

तकलीफ गोयह गजुब्य चु हा छुख मे माल्नुयुक पोछ ... हता अज
लोगुख यपॉर्य फेरि.... ज्ञानि दय बैयि यिखाह ज़ांह कॉल्य यपॉर्य फेरि तु
हयख मे बुजि माजि खबर ति जानि मयोन दय येति छनु न्यचविस माजि
सुंब खबर हयनस फुर्सथ म्यलान तु चु लोगुख अज अलगाँबु यपॉर्य तु युथ मोकु
करयमि व्वन्य ज़ांह ज़ि बु शेरु पनुनि वरॉय बैयि कॉसि ति बतु थाल कोताह काल
वोतुम यिमव अथव फकत पानस कयुथ बतु शेरान यिम देंहन बाँचन शेरान
ऑस्य । व्वथ लगय बलायि सौरशाव अथु तु माजि पोथरु खेम्ब अज यिक्वटु बतु ।"

रमजान्स लोग नु व्वन्य कांह ति चारु तु बडु शरमंदुगी सान वोथ थोद तु अथु
सव्रशॉविथ बयूठ बतु खयनि । सु ओस सोंचान ज़ि यि बुड मोज छा पॅज्य पॉट्य
कुन्य ज़ॅन्य यिथिस बॅडस मकानस मंज़ रोज़ान, यथ मकानस मंज़ हय काँतयाह
बाँच वेप्यन । तु अँम्य यिमन देंहन बाँचन बतु शयरनुच कथ वॅन्य ... अमा तिम
कति छिस ?" सु ओस यिमनुय दव्लाबन मंज़ ज़ि तस वोत बाँह कनि बतु थाल ।

“देदी यि छि चॉन्य मेहर बाँन्य ज़ि चये तुलुथ मयानि बापथ तकलीफ.... बु
छुस बडु माज़रत खाह"

“ यि हबा छि आसान दयि सँज मरजी. यिम बतु मयंड ऑस्य चॉनिस
नसीबस तु वाँती चये बाँह कनि लेहज़ा यि छनु मयॉन्य कांह ति मेहर बाँन्य
बॅल्य कि तस दयि सुंज़ यँम्य ऑस्य बनाँव्य ।"

बतु ख्यवान ख्यवान पुछस रमज़ानन “ देदी तोह्य छिवा कुन्य ज़ॅन्य
येति रोजान ?"

“आहन बा, कुन्य ज़ॅन्य छस रोजान शुर्य छि नफसु हॉरानी हुंदि बापथ
बालन तु छालन लॅग्य मुत्य । फकत छि फोनस प्यठ खबर अतर प्रछान तु यार
यिनचु छख कमयु पहन फुसथ मेलान ।"

“ देदी यि गॅछ नु लोकोटि ऑसु बॅड कथ बुनन्य ज़ि यि छि चॉन्य बद कसमती
ज़ि तिम छिनु चॉनिस सायस तल रूजिथ तु छि फकत पोँस्स पतु रूजिथ ।"

“ हय्यो ! दय रूजनख म्दतस तिहुनज़ सथ रूजिन्य मूजूद सोरुय

केंह छु हम मोयसर थोवमुत अदु बिचॉर्य येलि केंह कमावन छि तेली छुख पनुन तु पनुनयन शुर्यन हुंद गुजारु चलान । येति क्या करु हन येति कति छि नोकरी बनान । खॉर येति ति छि तति रूज़िन सोखु सान तु बजा मयॉन्य छख यिहय ऑही । मे छु तॅमिस सखगु वास सुंद पर्यशन चलान तु छस दव्हा दव्हा कडान ।"

“ देदी ति हय छु पोज़ मगर यथ वॉसि मंज़ गॅछी चये जुर्य तु शुर्य अँद्य पॅख्य नचुन्य. चये कुन्य ज़ॅन्य यथ व्वपर जायि त्रॉविथ छुम पननि कम अकली किन्य वयोठ बासान ।"

खबर क्याज़ि हयोत व्वन्य दैदि पनुन बोस रमजानस निश लोचुरावुन, यॅमिस स्व अज़ बाँह जानि हय नु तु नु ओसुन ज़ांह वुछमुत । खॉलिस मालानिक गामुक आसनु किन्य बास्योव तस यि पनुन हमदर्द, य्यमिस बाँह कनि व्वन्य कांह ति कथ खँटिथ थॅवन नु । अदु रमजानन ति बूज़ु बतु मॉढा ख्यवान ख्यवान तसुंज़ सारये कथु बडु गोरु सान तु मंज़ु मंज़ु ओसुस दिलालु मदारु ति दिवान । बतु ख्यथ लॅज दैद चोकु कामि तु रमजानस वोनुन गॅर खंड आराम करनु बापथ । आराम करान सूंच रमजानन “ कांह ति वय्छय छनु खोदायन दैदि थॅवमुच गरु छुस ओरुथ तु बोरुत सु कुस चीज़ युस नु अँमिस मेयसर छु, मगर दैदि बिचॉरि य्वसय वेय्छय छे सव्य छे.... अज़ कल कॅमिस छि फर्सिथ यिथयन हिवियन लूकन हुंज़ु कथु बोज़नस न येति तु नु तति येतुयक बु छुस । बु क्या वनु दैदि ज़ि चये हिवियन लूकन छु तति ति यवहय हाल मगर यि वॅनिथ फुटरावुन बु तसुंद सु सोंच ज़ि कॅशीरि मंज़ ओस नु यि सपदान ।

पॅहर्य खँड्य हयोत रमजानन दैदि रव्वसथ तु तॅम्य कॅरुस दव्छो दव्छो ऑही । बैयि व्वन्नस गरि कयन तु बाकी मालिन्य गामु कयन वॅन्य ज़ि तसुंज़ सलामा । स्व रूज़ दरवाज़ु हंगस प्यठु तोताम खडा योताम नु सु नज़रि डोलुस । पतु चायि अंदर तु बिजली बैयि नु वुछिथ व्वनुन “ हय ! बलाय आयि यिमन बिजली वालयन यिथिस गरमु गटु कारस मंज़ ति छिनु बिजली थवान सोंचानयु छिनु अमा लूख मा मरन अदु मॅर्यतन तिम यिमव अँस्य यथ गटु कारस लॉग्य"



यिम छि नु तिम

- देबा नज़ीर

बु आँसुस अज़ राँत्य रातस हुशयार । लरि फिरुन्य दिवान । सुबह फवलनस प्रारान तिक्याज़ि अज़ आँस आथवार । मै ओस मातामाल गछुन । अपारि प्यठु लॉय ममी क्रख — जल जल लाग पलव पतु गछि चेर । मै आव नु ज़चन नाल अथि । मै लॉय नॅव्य पलव । आँगुन्य दरवाज़ु येलि द्रॉय नेबुर्य सम्बयोव अख हमसाय । कोत सॉ सुबहॉय सुबहॉय, मै वोनस बडि हटि मातामाल । यि मातामाल छु मोदुर तु म्यूठ पॅज़्य पॉठ्य आसान । अँम्य वोन खोशी सान ।

मै आँस ममी अकसर पनुनि माजि हुंज़ कथु वनान । दपान आँस म्यॉन्य मोज हरगाह बोज़िहे मै छे कोरि कूर ज़ामुच । पतु क्या खानु माजर करिहे स्व । तिक्याज़ि स्व आँस नाहकुय्य शुर्य रछान । सानि गरि ओस मुसॉफिर ति ख्यथ चैथ नेरान । व्वन्य आँस नु पनुन्यन हुंज़ कथुय । स्व आँस हमसायन हुंज़ राजु मासु । वति लॅज मै ममी वनुनि यिनु तति खॅरिल करख । मै वोनस नु बु बेहमु ल्वति पॉठ्य । तति आँस्य मामु सुंद्य शुर्य मै ओस तिमन सुत्य ख्वश गछान गिंदुन ।

तु खॉर वॉत्य । बरस ओस तोर बुथि । मै कोर ज़ोर ठुक ठुक । ओहो ओहो । कुस सॉ छुव ? अति द्रयि म्यॉन्य मामुन्य । वारय छिव । किथु पॉठ्य आयिवु ? यूर्य प्यठ छिवु आमत्य ? अँस्य द्रायि । असि छु चकरस गछुन । यिनु बॉह कॅर्यज़िहे फोन ? ममी वोनस अदु बाकुय छिना ? असि छु सारिनुय गछुन । ग्वडु गछि नु आथवारि दोह कुन गछुन । आथवार छे सारिनुय छुटी दोह आसान । अँम्य न्युव अँक्सुय शहस मंज़ सोरुय वॅनिथ । यि छे नु असि अंदर अचनु बापथ ति वनान । अँस्य चायि पानय बीठ्य ब्रांदस प्यठ । कोड थख । ओरु द्रायि यि कुलुफ हैथ । म्यानि माजि कॅर मै अथस थफ । सडकि प्यठ समखेयि तस हमसायि बाय ।

दोपनस वुन्यय आयख तु द्रायख क्याज़ि ? मयानि माजि वोनस । पनुन मोल मोज
आसान सलाम रुस्तुय गुलाम । अमि सातु तौर नु मे अँम्यसुंद वनुन फिकरि ।
तिव्याज़ि मे ओस नु अम्युक तजरुब ।

वति छि पकान म्याँनिस अथस प्यठ प्यव आबु टयोक । मे दिच हयोर कुन
नज़र अति ऑस म्याँन्य मोज वदान । मे दोपुस चु क्याज़ि वदान ? दोपुन मे ओस
मँशिथ गोमुत यिम छि नु तिम यिम मे पनुन्य ऑस्य ।

ललु वाख

चेतु तुरुग वगि ह्यथ रोदुम,
चेलिथ मिलविथ दशि-नाडि वाव ।
थवै शशिकल व्यगलिथ वँछुम,
शुन्यस शुन्या मील्लिथ गव ।।



यूज़ एण्ड थ्रो

- विजय सागर

“हय हय चे क्या साँ रोवुय, कलम छा कांह दारिथ दिवान।”

पानस ब्रोंह कनि बिहिथ काका जीयस यस पेनस रिफल ऑस म्वकलेमुचु तु युथुय सु रिफल दारि किन्य कश कॅरिथ त्रॉविथ छुनिहे वोन शम्भू नाथन।

“यि माहरा छु यूज़ एण्ड थ्रो”।

शम्भू नाथन आसु ल्वकचारस कलमु सुत्य लीख्य-लीख्य पशपु गाजमचु तस ओस मोल सुबहन न्यँदरि वॅथिथ कलमस बुथ वुछिनावान तु सुय ओस गामुक ग्वडुन्युक लॅडकु येम्य लाहोर यूनिवर्सिटी मंच मैट्रिक पास कोर। तॅम्य ओस फॉसलु कोरमुत - पोज़ वनुन, काँसि हुन्द हक नु मारुन, किफायत शॉरी, वखतुच पाबँदी, तु पनुन्य कॉम फरुच ज़ॉनिथ तु ख्वश असलूबी सान नखु वालुन्य। तु य्वहय वजह ओस रिटायर गॅछिथ ति दौयिम नोकरी करान। जुवु किन्य ति ओस ओर दौर।

रछ्खंड छ्वपु कॅरिथ बिहिथ काका जी यस बास्योव ज़ि तॅम्य मा कॅर तिछ् कांह गलती येमि किन्य शम्भू नाथ य्वहय ग्वतन ह्युव गोव। माहोल तु वखतुच नज़ाकथ वुछिथ बदलोव तॅम्य कथन हुन्द मोजू तु वोननस। शिबन जी यन माहरा छु छुटी हुन्द दरखास सूज़मुत।

“ता क्या ऑस यीचाह एमरजंसी ज़ि दरखास सूज़ुन?”

“अज़ माहरा ओस ना तस अदालतस मंज़ फॉसलु।”

“कम्युक फॉसलु?”

“तॅमिस माहरा छु ना ज़नानि तलाक द्युन।”

“सुय माहरा छु वजह।”

“त्राहि भगवानु ... गव ना तोहय छिवु अज़ यूज़ एनड थ्रो थ्योरी अपनावान।”



कति कोत

- कुन्दन

बाहु वोथ ह्यथ चोल सिरु कथ सोदरुच,
ह्योर खोत तु बौवन वावस यारस ।
वावन कॅन्य तॅल्य वॅन्य हुथ ओबरस ।
ओबरन स्वय वातुनॉव तरफातन,
संगरन बौवन, जंगलन बौवन,
कोहु बालन तय खंगरन बौवन ।
रूदस पय लोग तॅम्य वोद प्यरि प्यरि ।
सिरु कथ फरकाँव तॅम्य शायि शाये ।
आरव व्यछुनॉव स्वय कमि माये ।
क्वलु रादव रॅट नालु तु रॅछरुख ।
शख ह्यु प्यव तमिकुय कुल्य मूलन,
खेतन खलिहानन गॅयि कुनुने ।
आबु ज्वयन, पां छूलन मंज वॅछ,
शहरन गामन आम सपॅन स्वय ।
दिलदारव रॅछ वॉलिंजि पनुने ।
केंचन सिरु कथ पेयि अटुबारे,
सिरु कथ श्रोपरुन्य सहल कथा छा ?
केंचव अटि कॅड, नटिनुय खॉरुख,
केंचव दम द्युत, सोंचस गॅयि तिम ।
अॅथ्य मंज सिरु कथ यीरेयि क्वलि मंज ।
नागन त्रागन पथ आयि त्रॉविथ ।

वातान वॉच बेयि वापस सोदरस ।
 ख्वश गॅयि व्वश त्रॉविथ फ़ख़ त्रोवुन ।
 ब्ययि आव बहा ब्ययि च़ोल ह्यथ सिरु कथ ।
 समयुक च़खुर च़लान रूद कुन्दन ।
 अँथ्य छुख वोनमुत दयि सँज दयि गथ,
 यी सपनान, यी आमुत पतु वथ ।
 यी गव ज़्योन तु मरुन यथ ज़ीवस,
 यी गव शंकर सुन्द सुय अतुगथ ।।



गज़ल

- मोती लाल कौल नाज़

शोक़ शमुहस न सॉ वाव दज़नय दिवान
 पोंपरिस काँसि गथ मा सॉ करनय दिवान ।
 वाँसि हुन्ज़ पूथ्य पॅर्य पॅर्य ति रोज़ान अपॅर
 ज़ॉव्य जारा अम्युक अथ नु परनय दिवान
 राज़ु होंज़न ति मँठ ज़न दौदुच पॉर्य ज़ान
 काह वचन नेन्दरि क्या सा नु वोथनय दिवान ।
 सथ पनुन्य रॉव तिछ़ ज़नति छँम्ब्य छॉर्य लॅज
 कुनि ति कतरस सेक्युल छुय नु दरनय दिवान ।
 बेकला ताब तोहमुल मंगान पारुदिस ।
 बेकरॉरी करारा नु करनय दिवान ।
 कथ नु शिहलिस बेबिस मन्ज़ बैरिथ शोरु छुय
 काँह ति असुवनय कथा छय नु असनय दिवान ।

हाजिथुय अज़ नु ओही शुरेन माजि हुन्ज
छुख थज़र त्युथ जि बोन छुखनु नमनय दिवान
तालि किन्य यिथ ति मा “नाज़” बाज़ुय यिवान
व्वन्य सु चलिहे समय छुसनु चलनय दिवान ।



गज़ल

- मोती लाल कौल ‘नाज़

हेकख अगर चलिथ तु चल पानस निश
यछख अगर फौली स्वनज़ल पानस निश ।
क्वकल छलाँ छि कॉलिबन तानथ
व्यसर म साँ चे छय स्वकल पानस निश ।
जुचन लीखिथ ड्येकस जिपल ताले
यि कयुथ थोवुथ चे गाश गितल पानस निश ।
हेकख तेली अमुरचु मुरचॉविथ
रटख अगर तुलिव्य त्योंगल पानस निश
जुलफन सुत्य अज़लय वरल माने
चु थवतु शानु कृत्य वाशल पानस निश ।
क्रटाँ क्रटाँ कूत छोट्यामुत छुख
कदावॅरी ति छय व्वतल पानस निश ।
वतव थनेयि सीनु वॅथ्य बिलकुल
कदम थॅविथ मगर गॅडल पानस निश
बेग्र्य लयन न साँ छु साज़ ‘नाज़स’ निश
वुजुन्य शरत-छु साज़ लयल पानस निश



- मजरुह रशीद

समयि टैच अख रोटु गॉमच
 शिन्लिय सहरोव्य फिज़हस मंज़
 हेरिथ पेमुच छे यथ मंज़
 वावु रंग ताम
 चे क्या
 चु छख पानस दिवन अँद्य अँद्य
 द्वहय गथ
 समय बासान छुय अख सायि बाना
 मँछयुल शैहजार हनि हनि छुय चे प्रेडान
 चेवान छिय रव्व स्वनहँर्य चॉन्य रुमरुम
 मै कुन वुछ, वारु वुछ, नज़रन तॉर्य मुच़राव
 अतय बासीय बु किथु छुस थानि गोमुत
 अतय चेनख बु किथु छुस लीन गोमुत
 यिथिस वॉरॉन्य फिज़हस मंज़
 अतय बासी बु मा छुस अज़ ति
 प्रॉन्य पॉठय
 स्वन छारान तु ग्वन रावान

रतन लाल जवहर

प्रज़नथ

मे मँशरोव यामथ
 बु कुस छुस
 कत्युक छुस

क्या नाव छुम
क्राम क्वसु छम मे असली
तामथ वुडव नियि शोवूरन
तरफाथ छँडिथ आव

०

स्व फरदुय मे मनसॉव
यथ पेठ दरुज ओस
गुथुर म्योन, अज़ल ता अबुद म्योन
राजरव नसुब आलमुक नॉल्य त्रोवुम
नोवुय ज़नुम प्रोवुम
मगर एतिकादन ब्रोकुस बेयि
दिलस बार त्रॉविथ तु जज़बॉत्य बनाँविथ
ज़ंगल लोरि च़ँड
विह्य कदमुच सपुदय रॉस्य



गज़ल

प्रेम नाथ शाद

ख्यालन मंज़ द्वहय म्यान्यन वज़ान छख
लछन सासन अंदर छम च़ॉरमुच़ अख
कसम हॉविथ वनय चुय छख स्व चुय छख
नेरल नाज़ल तु नोज़ुख नूर पैयकर
नज़र रूज़िथ गँयम यामथ चु वुछमख
चे छुय स्वगाथ हुसनुक बागि आमुत
रुहस राहथ बशाशथ छख बिला शख
यि वथ दुशवार सफर प्राटन स्यठा सख

अमी आशायि प्रारान रोज़ वातख
पेंजिस लिलस ख्दोरी ख्वश दपान तीय
सकूनुक फवलि सहर योद वादु पालख
थवुख फलि फलि चु वहराँविथ वतन शाद
हुरी रवल तेलि पनस येलि म्वखतु तारख

० ० ०



गज़ल

सुनीता रैना पंडित

१

ग्रकु आगरनि रफतार गोछ
येमि आवलुनि मंजु तार गोछ
अख शाम फुरसच हुंद गोछ
बेयि चानि ज़ेवि यकरार गोछ
हरफन नज़ाकथ चॉन्य हिश
सोंथस य्वहय अनुहार गोछ
छस खून हारान अँछ वँटिथ
म्युल नय तु अख दीदार गोछ
मे छु रास युथ आमुत कुन्यर
येमि शोरु शवु ग्वकजार गोछ
येमि नारु यिनु पैयि त्वछ वँसिथ
अमि नारु मंजु गुल गुलज़ार गोछ

० ० ०

२

पेंजि न गरु, नय कांह ठिकाना समखुहव
समखनुक ति नु कांह बहाना समखुहव

बोनि शोहजारुक न गुफतारुक मिज़ाज
 नोट नु हटि क्या खसि तराना समखुहव
 वाव डोल, असुन तसुंद च्युनुम येती
 शोछ थँवुन कुनि जायिजाना समखुहव
 समखनस छा वार वावस रवख छु कूठ
 ज़ेव छे कथि कथि बनि बयाना समखुहव
 पोत नज़र दिथ वुनि जुवान च्युह च्यह अँच्युक
 नार चापान गव ज़माना समखुहव
 दूरि बथ, वतु गथ ति हेनु आमत्य खुर्यव
 छवपु कँरिथ द्यब यिम छि दाना समखुहव

०००



गज़ल

अशोक गवहर

मेहरबानु चोनुय करम यूथ नु राव्यम
 तुलिथ चानि नावुच अलम युथ नु रायम
 स्यठा जितनु कँर्य कँर्य औनुम लयि सु सातय
 चु प्यालन बैरिथ ज़ाम जम युथ नु राव्यम
 अँधव नय वयछुम ज़ाँह मगर खाबु डयूंटुम
 दिलस मंज़ बैसिथ छुम सनम युथ नु रायम
 गुलम मंज़ बख़शान गरन गाशिरावान
 वुठव प्यठ सु इसमे अज़म युथ नु राव्यम
 शहन हुंज़ यि सख वस दिलुक दुब छु तँम्यसुनद
 बैसिथ मंज़ वोजूदस सु दम युथ नु राव्यम
 वुछिथ हुसनि आलम मुदस यिनु मश्यम ज़ाँह
 छु अपजुयिय चम खम कदम युथ नु राव्यम

फुटान दिल अबादथ करान मोम संगदिल
मैहर चॉन्य बरनस हलम यिथ नु राव्यम
अछर गवहरन पर करुस सर बुलंदी
रेंहम कर मै काकुद कलम युथ नु राव्यम

० ० ०



नज़म

- ब्रज नाथ बेताब

तिय छु चोन मरुन
रावान
चु आख तेलि ति मारनि
चु यिख अज़ ति मारनि
चु यिख दोहय मारनि
व्वन्य गो राम यैयि नु
प्रथ विजि
योद करनि चयै सुत्य
यथ यवगस मंज़ छु
राम सुंद युन मुशिकल
यि युग छुना
रावन चोनुय
हालाकि
सीता हरन स्पदिथ ति क्याज़ि छुन
रामस गॉरथ यिवान
ब छुस सोंच्य सोंच्य रावान
ब छुस यि सोंच्य सोंच्य ति रावान

जि अज़ मा छु चानि बदलि सीतायि मरुन
 अज़ मा छु सीतायि बदलु राम हरन सपदुन
 अगर राम हरन सपुद
 लख्मनस मा छु खराद बनुन
 भर्तस मा नीयतस चूर चामुत
 तेलि मा ओस राम तु रावुन
 अज़ छि भरत तु लखमन रोबूद
 अज़ मा छु तहुंदय मरुन तय
 तिम मरन
 तु चु बचखाह रावन
 सवाल छु ति

० ० ०



जु मज़हॉयु नज़मु

- ओमकार नाथ शब्म

१

कुनि किन्य नु दुह बैल्य नार
 कति जौम तु कति गुप्कार
 गरु ओस बोड बब जी
 लारुक्य हसॉ लॅग्य दार
 वुछ तन यि कक्कर मोर
 तलु पत्य छि छटान नार
 थोवुख हु कुनुय ज़व
 गोनि रव्व सव्वु दस्तार
 कति नव्श तु कति शव्वगि कूर
 शब्म ति प्रहेयज़ गार

अमि खोतु कुस गटु कार
 अमि खोतु कुस गटु कार
 यॅति व्वन्य छु रिफूजी
 यिति गव अजब गटु कार
 अँथ्य मंज़ु मँय रव्वु ज़व्वु कौर
 अमि खोतु क्या गटु कार
 नवशि तय नय्ववि कोड बयोन
 अमि खोतु कुस गटु कार
 आशयन्य ति रयूनसि दूर
 अमि खोतु कुस गटु कार

जंग

मालिन्य प्रछनय दपन बतस	दँप्जयख असि कोर रिफारम
दाह त्रह पंचाह गरकी यिमव	तथ क्या करव सो गयि जंग
हयतसि दिलस असि छुनु रोशनी	कनि वाजि कॅटसि पोशयम ना
हव्हवुरुय त्रावन चंदस लछाह	तथ क्या करव सो गयि जंग
सो कति बनान हयन्जय वाजयन्य	सु कति अनव कयनज्य खोस
डिसको डानुस वानुस करव	तथ क्या करव सो गयि जंग
वयशनव बतस प्यठु मा पजय	जिजाजी यस करुन साल
नान वयज्य सन्य हन दह वुह रनव	तथ क्या करव सो गयि जंग
डिमांड विमांड ति मह करव	कोरय मॉलिस पनुन हुब
चकुय हरगह दिचुन रटव	तथ क्या करव सो गयि जंग
तुंबख नारयन प्यठ मा खसय	फलिमी गान्न हुंदुय सोज
असु वुन शन्नम्य शारुय वनव	तथ क्या करव सो गय जंग

० ० ०

स्वय ज़मीन सुय आसमान

शहनाज.रशीद

स्यठा ऑस्य बॅड्य
 सॉन्य पथ कालु वखतुक्य बुज़रुग
 तु दुन्या तिमन ओस आसान स्यठा नेक
 ख्वहय बयॉल्य दानस बराबर
 थवान ऑस्य म्वछि मंज़ बंद दुनियाहस तिम
 नें मिछ गॅर
 नें लबि प्यठ कुलुय कांह तिमन ओस आसान

तवय सुबह ओसुख यिवान सुबह वखतुय
 तु शामुक वखत शामसुय बाँग्य
 तिमन निश गँयाव सोथ
 ग्वंगुल करुन सबज़ारन
 तिमन निश हरुद ओस
 व्वसु द्रवस खलन हुंज़
 तिमन आँस ग्रशमस अंदर बून्य
 मोसूम सुंज़ि माजि हुंद्य पाँठ्य
 हू हू करान
 वंदूक शीन ओसुख रछान आश
 बागन क्वलन नागु रादन
 अजब करनु फयुर गव
 छु अखताबु काँजिस खसान सानि वखतुक
 तु लोसान नेसुब राथ वाँतिथ
 नें सोतस अंदर सोथ समखान
 नें हरदुय अचान हरदु कालन खलन मंज़
 नें शीनुय वंदस मंज़ परान मँहलु किस कुनि—
 गरस मंज़
 तेलिक्य पाँठ्य गुलरेज़

० ० ०

अठ तु अटुहूर

रविंदर रवी

वेथि हुंज़ पॉर्यज़ान
 स्वनहुर्य अछरन हुंद व्यूग
 कलपुश, छँतुर बोन्यन हुंद गुलिम्यूठ

शोज़/शीन यि ज़ूज, रबदुक अनुहार
 च़खुर च़खरी शरुक, परबत हिमालुक
 मुकट तरंगुक, ख़हय बस मेन्य प्रज़नथ
 प्रवु त्रावान तु नपु नपु करुवुनि शीश लाठुक गह
 कशप बुतराँच़ हुंद प्रागाश
 तु ज़ूल आस्तान हुंद
 पूच़, अंग अंग वस्तरव रँछयमित
 वजर डेकुलोन डुपटुच शान
 दूर घोर, वँतरु हौर वज़ान साज़ यँदुरन
 छु मारान छोह हुसुन च़ावँल्य जुच़न त्यूर
 अठन द्वन, डेजि हर्यन, अटु हँर्य हुरान आय
 वेतसतायि गबर द्वशवय सजान जान
 नँव अठ तु अटुहूर लॉगिथ
 मॉज वँशीर आलथ कडान
 नवि आशाये

० ० ०



नज़ुम

(डुबुडास)

- इन्जीनियर विनोद

वारु वारु गँय गॉब

दारैन प्यठ च़ाँग्य

रोखुं शब्दन

प्यठ लोग ठाक

गँय ख़ामोश

ठोकर कुठ्य

लजि हाँकलु दारेन
तु कुलुफ बरन
ब्रांदु पावेन प्यठ
द्रमनुक ज़ाल
कँड्य कुलैव वोल
आँगनन नाल
बुलबुल गाँब
बरनेन नाल
फलपँल्य गाँब
काव पचन पयठ
कँतिजव कोर
यिथ गतुग्यूर
वोल ज़लुरेव नाल
सनिवारय्न
दौन थरि मोच्यौयि
पनुदाव हिशि
बादाम फुलय
गँय करबलाह
दँद्युन दँद्युन
वारैन मंज़
गोव डुबडास
सौनिस वँजूदस



पादि कमलन तल

वेष्णु राजदान

पादि कमलन तल बु आसय	करनि चॉनी असत्वती
मूक्ष दिम बोड़ वर्गु दिम	ही बर्गशेखा भगवती ।
गोम न्यँतरन खून जॉरी	छुस च़े कुन ज़ॉरी करान
बास प्रेत्यक्ष व्वन्य कास खॉरि	अँस्य छि पापव वँल्यमुती ।
चानि आशायि योत बु आसय	नाव्वमेद नेरय नु ज़ांह
या मे वर दिम मूक्ष दामुक	नतु छुसय प्रारान येती ।
लोलु बाग़स पोश फोल्यमुत्य	वेरि चाने च़ॉर्य च़ॉर्य
शेरि लागय बावु कोसम	शोलुवन्य कारेपती ।
कया वनय अँस्य मंदछेमुत्य	चंदु छेन्य सोदा करान
कर दया व्वन्य वुछ मु तथ कुन	शरमि सुत्य अँस्य गँल्यमुती ।
चॉन्य ग्वन वैसतारनुक ताक़थ	अनी कुस कस वनी
छुय च़े जय जय शामु स्वंदरी	जामु शूबान छी छेती ।
ग्यानु दाता मूक्ष दाता	छेख ज़गत माता चु छख
ही भवॉनी कर मे वॉनी	स्यद म्वखस दिम सरस्वती ।
पज़ि मनु युस बँक्ति चॉनी	करि निश्कल राथ द्यन
क्या छु संशय तसुंदि बापथ	मूक्ष दामुक्य बर वँथी ।
चॉन्य ग्वन छुस बो वेच़ारान	पन ओमुक्य खारान बु छुस
अबसनुकय वर दळ कुनुय कर	नतु छु आछुर वँत्य वँती ।
सर्व व्यापख छेख च्वपॉरी	अँस्य छि शॉरी क्या वुछव
व्वन्य च़े रोस कुस बोज़ि ज़ॉरी	हाव म्वख पेठ्य परबँती ।
कर्म हीनन दरमु हीनन	कर्तव्यन सान्यन मु वुछ

डाल स्योद अथु कर्मु लॉनिस
 वीलु ज़ॉरी बोज़ 'वैष्णस'
 छेख चु रोशन छुस बु तोशन
 पादि कमलन तल बु आसय
 मूक्ष दिम बोड़ वर्गु दिम

प्रक्रमस चॉनिस खेंती ।
 रोज़ संतुष्ट सर्वदा
 चुय मे बखशख थेंज़ गेंती ।
 करनि चॉनी असत्वती
 ही बर्गशेखा भगवती ।

० ० ०



लीला

चु माता कासतम गम

वैष्णु राजदान

चु माता कासतम गम
 दितम दर्शुन च़ल्यम ग़म
 मे मॉजी आश चॉन्य छम
 दया दृष्टि मे करतम
 बु मा वोतुस च़े निश ज़ांह
 तवय शरमंदगी मे छम
 चु. दीवी क्याज़ि रूठुख
 दितम दर्शुन च़ल्यम ग़म.
 ग्वडन्य स्यद कर मे वॉनी
 त्रैयिम त्रैयलूकि मंज़ सम
 कोरुथ च़वन वीदनुय अंद
 शेयिम शिव रूप, बासतम
 सेंतिम बासतम मे सतरूप
 च़े डींशिथ दीर च़लि यम
 दज़ान छुय दूप कोफूर
 नगारो साज़ मदहम

बु लागय भावु कोसम
 बु लागय भावु कोसम ।।
 बु लागय भावु कोसम ।।
 बु लागय भावु कोसम ।।
 मे वेंरमय नु पाठ पूज़ाह
 बु लागय भावु कोसम ।।
 खेंटिथ कथ जायि बीठुख
 बु लागय भावु कोसम ।।
 दोयिम दिम पॉर्यज़ॉनी
 बु लागय भावु कोसम ।।
 छु पुंचिम परमु आनंद
 बु लागय भावु कोसम ।।
 दज़्यम अँदरु ग्यानुक दुप
 बु लागय भावु कोसम ।।
 वज़ान छुय साज़ संतूर
 बु लागय भावु कोसम ।।

यिवान छिय ऋश्य इत्यादेक
 बेदर रूजिथ छि सरखम
 नेथुर चॉन् य पदम वेंथुर
 छु तथ निर्वाणुक थम
 चु अष्टा दशब्बजा छख
 चे दीवी क्या गल्ली कम
 छु बोड दरबार चोनुय
 शोलु मारान छु व्यलकम
 वेंहरिथ छु मायायि जाल
 अम्युक व्यस्तार बनतम
 नचान छी चंड तय मंड
 प्यठय त्रावुख निरालम
 चु छख शक्ति शिवस सुत्य
 तम्युक मंत्र छु शम दम
 छु ऑठम द्वह चोनुय
 मे सायस तल चु रछतम
 वनान छुय वैष्णु राजदान
 दया दृष्टि मे करतम
 मे माँजी आश चॉन् य छम
 दितम दर्शुन च़ल्यम गम

करान दर्शुन छि सन्वख
 बु लागय भावु कोसम ॥
 कलस प्यठ म्वखतु छेंथुर
 बु लागय भावु कोसम ॥
 मे तैय भोगा चु सोज़ुहख
 बु लागय भावु कोसम ॥
 वंदहय कबीलु क्रोनुय
 बु लागय भावु कोसम ॥
 मूहन मे वोलमुत नाल
 बु लागय भावु कोसम ॥
 तिमन दितु पानय दंड
 बु लागय भावु कोसम ॥
 छे यिछ अँगनस अंदर ज्यूत्य
 बु लागय भावु कोसम ॥
 बोज़ि फॅर्ययाद म्योनुय
 बु लागय भावु कोसम ॥
 चु माँजय छख दया वान
 बु लागय भावु कोसम ॥
 बु लागय भावु कोसम ॥
 बु लागय भावु कोसम ॥

० ० ०





शहीदन हुंज़ रजिस्टर

- रतन लाल शान्त

स्वखजुवन ऑस अज़ ओरय पानस सुत्य अख बँड बँही हिश अँन्यमुच़, दोपुन “यि छम डयरी थॉवमुच़। क्या पता कर क्या पेयि याद। अँती करान छुस नोट। “यि वँनिथ खूजिन तु ह्योतुन क्याहताम लेखुन।

मे दोप अदु लेखान छु तु लीखिन मे पेयि क्याह ताम कॉम याद तु वोथुस थौद। मगर सु क्युथ? स्वखजुव आसि ब्रॉह कनि बिहिथ तु बु करु पनन्य कांह कॉम, ति छुनु मुमकिनुय। मे छु अलाकु लिहाजु पूर तवज्जू तँस्य कुन द्युन आसान। प्यटय कोरनम आलव— कोत सॉ वोथुख? ग्वडु वन मे टिकुलाल टँपिलिस पतु कुस कयोँख शहीद?

व्वन्य कोत सॉ व्वथुहॉ बु?

मे गँयि कॉम मँशिथुय। सवाल हय ओसनम स्वखजुवन त्रौव मुत। सवाल न बँल्कि वँनिव प्रच़। यि नु इनसान सोंचानुय आसि, येम्युक नु तमि विज़ि अंदाज़य आसि, स्वय कथा पेयि बुथि, तथ वनव नु प्रच़ तु अदु क्याह वनोस?

मे ह्यौच़ यादाश्तस दूँछु दिन्य।

शायद महारा टेलिकाम इंजीनर बालकृष्ण गंजू, युस चोटबाज़रु ड्रमस मंज़ चूरि बेछोव तु हमसायन हुंज़ि निशानदिही प्यट मार्यौव मिलिटंटव तँती। किनु जज नीलकंट गंजू युस हरी सिग हाय स्ट्रीटस मंज़ बबांगि दोहल मार्यौख।

बूजिथ छुम स्वखजुव ओरु तिथु वँन्य वुछान ज़न तु “त्रोश मनीटर” संघ पॉट्य वुन्य व्वथ्यम तु शलख कर्यम।

‘तिथु पॉट्य छुख वनान ज़न तु कांह बोड इनकिशाफ करान छुख। ति क्याह गव-शायद-किनु-- ?यि कुस जवाबुय गव?

मे वोनुस –यि ‘यिनु-कि-फाश’ महारा तौरुम नु फिकरि । त्यूत फारसी मा छुस ज्ञानान ।

‘इनकिशाफ हसॉ . । मतलब नॅन्यरावुन . । रिवेलेशन.. तौरुयि फकिरि ?’

‘हे महारा, बु क्या नॅव कथ वनु ? यिम नाव छि अँकिस अँकिस बटस याद । मे दोप..

स्वखुजुवन चॅट मेन्य कथ मंजय-‘बोज़’:-

तॅम्य हेत्य तमाम कौशिर्यन पँडित शहीदन हुंघ नाव वनुन्य । पज़र गव यि ज़ि मे ओस गुमान ज़ि मे छे खबर । मगर हकीकथ ऑस तथ बर अकुस । मे ति ऑस्य सिरिफ त्रेन चोरन नावन हुंज पय तु बस । मे गव पूर यकीन ज़ि सानि बरादॅरियि हुंघ ज़्यादु तर नफर छि कथय याचु ज़्यादु करान । शहीद शहीद छि सॉरी वनान, मगर अगरय प्रुछनि बेहमव, मुशकिलन नेरन नु कुल तिथ्य नफर अख दरजन यिमन ऑठन दॅहन शहीदन हुंघ नाव च्यतस आसन ।

स्वखुजुवुन लिस्ट बूजिथ गॅयि मे दुनन । तॅम्य आसिहे यि च्यूनमुत । माहोल ओस ग्वब्योमुत, गमगीन गोमुत ।

‘हे पँडिथ ! वॅथिव । चायि दामुक बॉदबस कॅरिव । यिथु वॅन्य मूसिमी वदन सुत्य नेरिनु कैह . । ति कॅरिव येमि सुत्य सोन पगाह बचि । येमि सुत्य सॉन्य मेहनथ बटि लागि ।

चाय बूजिथ गोस बु शरमंदु । यि बुज़र्ग मोहन्युव आव सुबहॉय यथ तुरि कटकारस मंज तु मे गव बुनियॉदी व्यवहार तु व्वथासन, मान तु यज़थ ति मॅशिथ । अँमिस निश छि सॉरी कैह नतु कैह व्वमेद थवान, मगर यि ति मा छु इनसानुय, यि ति मा छु यज़तुक बोछ, ति छु असि मॅश्य मॅश्य गछान । मे मॅज स्वखानंद जीयस मॉफी ।

गरवाजिनि कोरुस बु बेयि ति शरमंदु । म्यानि आलवु ब्रोठय आयि स्व चाय ह्यथ । मे बासान तमि आसिहे स्वखुजुवनि यिनु पतय चाय लॉजमुच ।

मगर अमि पतु गव ब्याख ति वाका । आशि बीठय पथर, असी बोंह कनि ।

चाय फिरन । पानय ऑस नेकरामस द्रामुच, गरुम गरुम लवासु ऑसिन अँन्यमुत्य ।
 तिमन मँछुन थनि रछा रछा तु ख्योविन अँस्य बडु मायि सान । यि नु जि स्व क्या
 छुन स्वखुजुवस मुनोसिब व्वथासन करान । मे छु सु बाजे जरूर ग्वबान, मगर
 तसुंदि ज़ेवि द्राव नु जांह थकनुक या तंग यिनुक अख शबुद ति । गरस मंज पौछ
 यिनस छे स्व हमेशि ख्वश गछान । बाजे मे ति रुडान जि पौछ वुछ्थि क्याजि छुख
 ड्यकस द्रह लदान.. ? मगर वुन्यक्यनस ऑस नु तस बुथिस प्यठ खुशी,
 बँलिकि गमुच छांय हिश जन्न यीरान ।

बु छुस तस बुथ परनुच कूशिश करान ।

स्वखुजुव छु चायि दाम दाम चैवान मगर बोलान नु किहीं । मे बास्यव सु ति छु
 आशुन गंभीर बुथ वुछ्थि रोवमुत ह्यू रँछ्य खँड्य वोथ मे कुन-

“ मे हसौ छु फिकरि तरान सोरुय । चु गोख शहीदन हुंघ लिस्ट बूज्जिथ
 हौरान, ति क्याजि चै ऑसुय इनफारमेशन मगर कमकासुय । चु छुख ना वुछान
 येमिस न्वशि हनि क्याह गँयि ज़न बुथिस वेशचका हिश फीरिथ । वन सौ कोर्या च
 क्याजि गँयख यूताह दिल मलूल ?

आशन वौन नु किंही । स्व ऑस सिरिफ ज़मीनस प्यठ कथ ताम न्वक्तस कुन
 मुदय गँडिथ वुछान । स्वखुजुव ओस आकाश तस ओस सोरुय फिकरि तौरमुत ।
 सु वोथुस — किनु चु ति गँयख येम्य सुंघ पाँठ्य यीत्य नाव बूज्जिथ ख्यूबस ?

व्वन्य ओस आशस ओश ति पशपान । दोति लोचि सुत्य व्वथरावान वँछ-न
 महारा । स्व छुन कथ । मे महारा लोग दिलस जि मिलिटंट ऑस्य तति मारान तु गँजरान
 कस कूत स्कोर आव, मगर अँस्य ति मा छि येति व्वन्य ती करान । फलॉन्य फलॉन्य
 मोरुख । ग्वडु मोरुख हु तु पतु यि । तमि द्रह मॉरिख यँच । तमि पगाह यँच ।..

असि गँयि छ्वपु । स्व रूज बोलान- ऑखुर असि कर छि शहीद याद
 प्यवान ? सिरिफ छु मे बूजमुत अँकिस द्वन शहीदन हुंघ द्रह छि मनावान । बस
 यीचुय छम खबर । बाकियन मा आसन या आसन नु तिहुंघ गरिक्क शायद श्राद
 हावान तु बस । बाकियन क्याह ? वँछ थफ । म्वकलेयि कथ ।

छ्वपु गॅयि। कमरस मंज़ ज़न कुंहय ओस नु। मे फूर नु लफुज़ ति। पँडिथ
 स्वखानंदस ति ऑस छ्वपु गॉमुच। मगर सु ब्यूट नु पथ। पानस सुत्य अँन्यमुच
 रजिस्टर, ख्वसु ख्वनि मंज़ ऑसुस, खूज़िन तु वोनुन आशस— च़े हसॉ वोनुथ नु
 गलथ किहीं। यि रजिस्टर क्याह छे, ख्वसु बु हमेशि बगलस मंज़ थँविथ ललवान
 आसान छुस ? अम्युक मकसद ति छु ती यि च़े वोनुथ। अथ मंज़ छुस बु प्रथ शहीद
 सुंज़ डिटेल मतलब प्रथ कांह तफसील रिकाड कॅरिथ थवान। छि ना अंगरीज़
 पॉट्य वनान ..ब्यटर लेट दैन न्यवर, वुनि ति अगर अँस्य पायस प्यमव, वुनि ति,
 याने त्रुहि वुहुर्य ति अगर अस्य यि अहम रिकाड थवव नु, तेलि कर थवव , तेलि
 छनु बॅड कथ ज़ि बेयि केंचि वुहुर्य मशि असि या सान्यन शुर्यन ज़ि असि कुस गज़ब
 गव तु अँस्य किथु पॉट्य कॅडिख मार दी दी तु मॉर्य मॉर्य कॅशीरि । लूटिथ तु
 मॉरिथ। ... आशि वॅछ थोद। मतलब स्व ऑस मुतमयिन गॉमुच।

सितम लोलुकय बयान कॅरय कॅरय अमारन हुंज़ कथा कॅरयतव
 छि योद सॅहरा दज़ान मजलून यारन हुंज़ कथा कॅरयतव
 गुलन हुंज़ि मायि यिम बेवायि फेरान खारुज़ारन मंज़
 तिमन रंगीन खयालन बेकरारन हुंज़ कथा कॅरयतव



यॉरय कोर बेयि शानु जुलफन वनतु यारस वॅन्यज़ि कया
 दिल दपान थफ लॅज करारस तस बिचारस वॅन्यज़ि कया
 यिमव गमुकिस जुलमातस मंज़ ति हेमतुक च़ोंग दज़वुन थोव
 तिमन रोशन ज़मीरन मह पारन हुंज़ कथा कॅरयतव



ताँज्य बटुन कान

- म.क.रैना, मुम्बई

अज़ आयि शुर्य जल्दुय। काकन्य जिगुर ति ऑस तैयार। शुर्य बीठ्य तस अँद्य अँद्य ऑर कँरिथ। काकन्य जिगरि कँर नँव कथ वनून्य शुरू। अँजिच कथ ऑस 'ताँज्य बटुन कान'।

दपान पथ कालि ओस अँक्य राज़न पनुनि रानि त्युथ अख म्वख्तु हार द्युतमुत, यथ नु कांह म्वल ओस। यि म्वख्तु हार ऑस राज़ बाय खास खास मोकनुय प्यठ नॉल्य छुनान। अकि द्रहु ऑस स्व राज़स सुत्य अँकिस मॉलस मंज़ गॉमुत्त। वापस यिथ चायि राज़ बाय पनुनिस श्रानु कुठिस मंज़। पनुन म्वख्तु हार कोडुन तु लोगुन श्रान करुन। फॉरिग सपदिथ रूदुस नु म्वख्तु हार नॉल्य त्रावनुक कांह खयालय तु यिथु पॉठ्य गोस म्वख्तु हार अति तुलुन मँशिथ।

‘हय हे, सु मा न्यूनस काँसि चूरि?’ पिंकी चँज क्रख नीरिथ।

‘बोज़ान गँछिव, ती वनोव’ वोनस काकन्य जिगरि।

शाम वख्तस वोन राज़न तस जि म्वख्तु हार कति छुय? अमि विज़ि प्यव तस म्वख्तु हार याद। राज़ बाय चायि जल जल श्रानु कुठिस अंदर म्वख्तु हार अनुनि। अमा अति वुछुन नु म्वख्तु हारुय कुनि। पँत्युम शाह गोस पथ कुन तु बूँठ्युम ब्रोंह कुन। वापस यिथ वोनन राज़स जि म्वख्तु हार छुख तुलिथ न्युमुत। यि बूज़िथ गव राज़ सख बेकरार तु राज़ बायि लँज वुठन पँतुर। स्व छे फकत अथ मूरान।

‘ति क्या गव वुठन पँतुर तु अथ मूरन।’ कल्हनन प्रूछ काकन्य जिगरि।

‘वुठन पँतुर लगुन्य गव सख परेशान गछुन तु अथ मूरन गव अफसूस करुन।’

‘अछा, पतु क्या गव?’

राज़न कौर हौकुम। मँहलु खानुक्यन नोकरन चाकरन, दायन, च्वंज़न तु

बाकी मुलॉजिमन आव रजु गज करनु । मेंहलु खानुक अख अख कून आव वुछनु
मगर म्वख्तु हार आव नु कुनि ति अथि । बेयि द्वह लॅग्य दुबार राजु संद्य कारंद
म्वख्तु हार छांडनि । काँसि ह्योत नु मटि । द्वन च्वन द्वहन छांडनु पतु ति आव नु राजु
बायि हुंद यि म्वख्तु हार कुनि ति अथि । यपॉर्य त्रोव राजु बायि ख्योन तु चोन । स्व
लारेयि वुरनि तु वथरनि ।

‘वुरनि तु वथरनि क्याह गव ?’ किशमिशि प्रूछुस ।

‘सु गव ब्यमार गॅयि ।’

ऑखुर आयि अँमीरन वॅज़ीरन सुत्य मशवरु करनु पतु सॉरिसुय सलतनुतस
खास कर राज़दानि अंदर पारय दिनु जि युस अखाह राज़ बायि हुंदि म्वख्तु हारुक
पय दियि, या कुनि जायि लॅबिथ दियि, तस यी बोड बारु यनामु दिनु । मगर यूताह
कॅरिथ ति द्राव नु राज़ बायि हुंदि म्वख्तु हारुक कुनि तर । राज़ संद्य हरकार,
सज़ोवुल, पुलसु अफसर तु सुराग रसान ऑस्य म्वख्तु हार लॅबिथ कडनु खॉतर
जस्तु खॉज करान, मगर सोरुय बे सूद ।

‘तेलि रोवा हारुय ?’, वोन पिंकी ।

‘बोज़ान गॅछिव ब्रॉह कुन क्या सपुद ।’ वोननस काकन्य जिगरि ।

दपान अँथ्य शहरस अंदर ओस अख नादार शख्साह अख तॉज़्य बट नावुक ।
तस ओस नु ज़ांह ति ज़ीनिथ जॅखिथ पूरान । शुर्यन न ओसुस बतु जूरान तु न ज़ॅट ।
अरनि अनुन तु परनि छानुन ओस तस गॅरीब शख्सु सुंद मुक्कदर बन्योमुत, तवय
ओस सु पनुनि ज़िंदुगी निशि ऑजिज़ आमुत तु कुनि नतु कुनि बहानु ओस मरुन
यछान । तँम्य ति ऑस राज़ बायि हुंदि म्वख्तु हार लॅबिथ दिनुच तु यनामु प्रावनुच
पारय बूजमुच, तु तसुंदि कौलु ओस यि तॉज़्य बट सुंदि खॉतर ज़िंदुगी निशि
आज़ाद सपदनुक अख जान मोकु । बादशाह सुंज पारय बूजिथ आवु नु कांह
अखाह ति ब्रॉह कुन जि सु दियि म्वख्तु हार लॅबिथ । अख ज़ु द्वह गछनु पतु द्राव
तॉज़्य बट पनुनि आशेनि पृछनु वरॉयी तु वोत राज़ दरबार । दरबानस वोनन सु छु
राज़स तसुंजि रानि हुंद म्वख्तु हार लॅबिथ दिनु म्वखु तस समखुन यछान । राज़स

आव यि पोंगाम वातुनावनु। तँम्य द्युत होकुम ज़ि फोरन वॅर्यून दरबारस मंज़ हॉज़िर। राज़स निश पेश सपदनु पतु कोरुन तस गुल्य गँडिथ इल्तिमास ज़ि राज़, बु आस तुहँज़ पारय बूज़िथ तु बु छुस वादु करान ज़ि बु दिम राज़ बायि हुंद म्वख्तु हार लॅबिथ। राज़ गव यि बूज़िथ शाद तु दोपुनस तेलि कमिच तॉर छे। शुर्य ऑस्य कन दिथ बोज़ान।

च्वंजव तु दायव वातुनॉव यि ख्वश खबर राज़ बायि निश ति। तॉज़्य बटस आव वननु हरगाह सु राज़ बायि हुंद म्वख्तु हार लबिथ दियि नु, तेलि क्याह सलूक गछि तस सुत्य करनु युन। तस ओस ज़िंदुगी तोस तुलमुत, अव किन्य कोरुन राज़ दरबारस मंज़ यकरार ज़ि अगर सु म्वख्तु हार लॅबिथ दिनस मंज़ सतन द्वहन अंदर अंदर पनुन कौल पूर हैकि नु कॅरिथ, तस गछि गरदन दिनु यिन्य। गरु वॉतिथ वॅनिन सॉरुय दासतान पनुनि आशेनि। स्व वॅछुस ‘शिकस लदु! च़े मा ऑसुय बंगु चेमुच़ ? यिमन शुर्यन क्या बनी ? येलि नु राज़ मॅहलस मंज़ हरकारन तु सज़ोवलन ति म्वख्तु हार अथि आव, च़े शिकस लदस कति यियी अथि। दर असल ओसुय च़े मोत नच़ुनावान। खस तु यिथु तिथु व्वं फासि कूटिस। छुनथमु यथ पूत्य खेलिस वाव ?’

‘पतु क्याह गव ?’ वोन कल्हनन नानि कुन।

‘पतु गव यि ज़ि आशेनि हुंज़ यि पद वननु पतु तौर तॉज़्य बटस काड्यन मंज़ फिकरि ज़ि कोठन छु पॅज़्य पॉठ्य अख त्युथ अतुर कोरमुत येमि निशि कांह बचन पाय छुन। सु लोग व्वं अथु मूरनि तु ऑही तु वॉही करनि। ख्यन वन ति कति ओसुस, सु ति गोस मॅशिथुय। मोयूस गॅछिथ वोथ फुटमुत्यव क्वठ्यव तु च़ाव अॅकिस मॅशीदि अंदर तु ह्योतुन तॅती वदुन तु ब्रछुन। अॅथ्य मंज़ गॅयि यिथय पॉठ्य ज़ु च़ोर द्वह तु वादस ताम यूताह यूताह वक्तु छु कम रोज़ान, त्यूताह छु तॉज़ी बटस क्वठ्यन जुव च़लान नीरिथ। व्वं ओसुस द्वयी दोह्य राज़ दरबारस अंदर वॉतिथ फहि खसुन। अमि हॉबतु सुत्य लोग मॅशीदि अंदर विर्द करनि ज़ि ‘हतय ज़ेवी च़ु नय फरहॅख, पगाह कति लगुहख फहि’ ... ‘हतय ज़ेवी च़ु नय फरहॅख, पगाह

कति लगहख फहि'। अँथ्य अँकिसुय कथि छु तौँज्य बट विर्द करान तु बाकु छटान। मँशीदि नेबुर्य पकन वॉल्य ति छि अँम्यसंज यि कथ बोजान।

‘विर्द करुन क्याह गव?’ राजूहन प्रुछ काकन्य जिगरि।

‘सु गव अकाँय कथ गरि गरि वनून्य’, द्युतुस काकन्य जिगरि जवाब।

‘यि हतय ज़ेवी कस ओस सु वनान?’ कल्हनन प्रुछ नानि।

‘सु ओस वनान पनुनि ज़ेवि, येमि ज़ेवि सु अतुर कँरिथ ओस गोमुत। मतलब अगर नु राजस सु पनुनि ज़ेवि सुत्य गछिहे वँनिथ ज़ि बु दिमय म्वख्तु हार लँबिथ, खोचुन मा ओसुस?’

व्वन्य ओसुस म्वख्तु हार लबुनस तु सु राजस निश वातुनावुनस मंज अकुय द्वह बाकुय। तौँज्य बट रूदु मँशीदि अंदर युतुय योत वनान ‘हतय ज़ेवी चु नय फरहँख, पगाह कति लगहख फहि’।

क्वदरतु सुंद कार अपॉर्य पँच अलु गँब अख ज़नानु अख। स्व ऑस मँहलस अंदर प्रथ द्वह गँछिथ तति डुवन फश दिवान। तमि येलि मँशीदि नेबुर्य किन्य तौँज्य बटून्य वखुनय बूज, तमि ठँहरोव कदम। दितुन कन ज़ि यि क्याह वखुनय छे अँदर गछान। बूजिथ चँज तस ख्वरव तलु मेच नीरिथ। हेरि ब्वनु गोस गुमु श्रान। दोपुन खलास, म्यानि चूरि हुंद पय हय छु कस ताम लोगमुत। तौँज्य बटून्य यि वखुनय बूजिथ चायि खूच्य खूच्य मँशीदि अंदर। अति वुछुन शख्साह अख बडि बडि वनान ‘हतय ज़ेवी चु नय फरहँख, पगाह कति लगहख फहि’। यकदम पेयस परन। दोपुनस ‘हतु जू ख्वदायि सुंदि पासु मतु हैतु म्योन नाव। बु हा जू लगय बलायि। कोठ मतु खारुनावुतन फहि कूटिस। बु वंदय रथ। राजू बायि हुंद म्वख्तु हार दिमय बु छ्वपु कँरिथ यूर्य अँनिथ। अमा म्योन मतु वनतु काँसि ज़ि ज़ेवि ओस यि म्वख्तु हार न्यूमुत।

‘अछा, तस ज़नानि ति ओसा नाव ज़्यव?’ प्रुछुस किशमिशि।

‘आ, अदु क्याह?’ वोनस काकन्य जिगरि।

तौँज्य बट छु अँछ वँटिथुय यि सोरुय कँह बोजान। तस खँच अँदुर्य किन्य

वॉलिंग बोट। क्वथन फ्यूरोस होश। स्युहय गॉज़ कॅरिथ वोथुस 'वोथ गळ दफाह येति वॅल्य वॅल्य तु म्वख्तु हार दि दवान दवान अँनिथ। नतु खारुनावथ पगाह फहि।' 'हतु जू, जुव वंदय। चु कर तु ख्वदायि सुंदि पासु छ्वपु। हमी दमु दिमय म्वख्तु हार यूर्य अँनिथ', ज़ेवि वोनस ओश हारान हारान।

यि वॅनिथ द्रायि ज्यव म्वछि ज़ु वॅटिथ तु गरि जोराह गॅछिथ ओनुन राज़ बायि हुंद म्वख्तु हार तु त्रोवुन तॉज्य बटस ब्रोंह कनि। तॉज्य बटन तुल म्वख्तु हार तु त्रोवुन चंदस। अमा ज़ेवि वोनस 'ग्वड वन चे किथु पॉठ्य ओसुय यि म्वख्तु हार चूरि ओनमुत'। स्व वॅछुस, 'हतु जू वॅछु कोठि लानथ तु यि वशफु गोम। बु हा जू गॅयस राज़ बायि हुंदिस कुठिस डुवन फश दिनु बापथ तु पतु कोरुम तसुंद श्रानु कुठ साफ। तँती वुछुम यि म्वख्तु हार किलिस अवेज़ान। दिलन कॅडनम व्वठ तु शेतान च़ाम नस्ति किन्य। म्योन म्वख्तु हार चूरि न्युन छुन काँसि अँकिस ति चे वरॉय पय।' तॉज्य बटन दोपुस 'अछा तु नेर येति। व्वं छु मे राज़स चु बचावन बापथ अपुज मपुज वनुन।'

सॉरी शुर्य ऑस्य दान दिथ बोज़ान। काकन्य जिगरि वोन ब्रोंह कुन। ज्यव गरु कुन नेरनु पतु छुन तॉज्य बटस पछ यिवान ज़ि यि ति छा पोज़ मे लोब राज़ बायि हुंद सु म्वख्तु हार युस नु राज़ सुंदन सज़ोवलन ति अथि आव। मॅशीदि मंज़ु नीरिथ वोत गरु तु नेबुरय लॉयिन आशेनि बडि हटि क्रख ज़ि 'हतय हये, छुयय केंह ख्यनु खॉतरु तयार कोरमुत। मे हय छे ब्वछि सुत्य अँछन ज़ून लॅजमुच।' स्व वॅछुस 'अव, चे छुय ना पगाह फासि खसुन, तवय छुय यि ताव। तावन ज़दु यिमन शुर्यन हुंदुय सूचिज़िहे!'

तॉज्य बट वोथुस 'अज़ हय गव तॉज्य बटुन कान स्योद। वुछ मे क्याह छु यि अथस मंज़। योहय गव राज़ बायि हुंद म्वख्तु हार।' आशेनि तसुंज़ि येलि पॅज्य किन्य तसुंदिस अथस अंदर म्वख्तु हाराह वुछ, तस आयि नु पछुय ज़ि यि छा पॅज्य किन्य राज़ बायि हुंदुय म्वख्तु हार तु पॅज्य पॉठ्य छा यि म्यॉन्य खानु दारन लॅबिथ ओनमुत। तस खोत ब्वकव पेंठ्य माज़। तॉज्य बट वोथुस 'व्वन्य हय फीर्य सॉन्य ति द्वह।'

‘यि कान स्योद गछुन क्या गव ?’ पृछुस शुर्यव ।

‘ति गव अनि गटि मंजु त्रोवमुत तीर स्योद गछुन’ वोनुख काकन्य जिगरि ।

ताँज्य बट द्राव पगाह राजु दरबारस कुन तलवार हॅलिस गँडिथ तु राजस ब्रोंह कनि वॉतिथ कौरुन राजस अर्जु जि राजु तुहंजि राजु बायि हुंद म्वख्तु हार ओस नु दर अस्ल काँसि ति मनोशन चूरि न्यूमुत बॅल्यकि ओस अँक्य कावन श्रानु कुठिकि रोशन दानु किन्य तुलिथ न्यूमुत । मे किथुक्कन्य कोर यि म्वख्तु हार कावस निशि हॉसिल, ति मतु पृछ्यतव ।’ राजु गव म्वख्तु हार वुछ्थि स्यठाह ख्वश । ताँज्य बटस आव नु सिर्फ वादु मुताँबिक यनामु दिनु, बॅल्यकि आस राजु दरबारस अंदर थोद मनसब ति दिनु ।

‘ताँज्य बट आसि तेलि बडु अँमीर बन्योमुत’ वोन कल्हनन ।

‘आ, आ, बन्यव । तसंजु ज्ञानु तु शुर्य ति बनेयि बँड्य मोहनिय ।’

शुर्य गॅयि कथ बूज्थि ख्वश । काकन्य जिगरि वोनुनख, ‘गँछिव साँ व्वन्य साँरी पनुनिस पनुनिस कुठिस मंजु । पगाह वनोवु ब्याख नॅव ।’





रामजुवस पादि प्रणाम

- रूप कृष्ण भट

मे छु कालेज क्यन दोहन प्रकाश राम कुर्य गॉम्य सुंद 'राम अवतार चॅरित्र' ग्वडनिचि लटि पनुनिस ज़िठिस बाँयिस प्रोफेसर ओमकार कौल सुंजि लेबरयेरी मंज नज़रि गोमुत । व्वन्य येलि मे जी० आर० हसरत गड्डा साँबन प्रकाश राम कुर्य गॉम्य सुंद 'राम अवतार चॅरित्र' प्रूफ रीडिंग करनुच ज़िमवॉरी दिच, मे म्यूल बेयि अकि फिरि यि परनुक मोकु । मंजमि तबकुकि स अँकिस सादुगरस मंज पौदु सपदन वॉलिस प्रकाश रामस छे लोकचारु पानु प्यठय दर्मस कर्मस सुत्य दिलचस्पी ऑसमुच । दपान अँमिस छु दिवी त्रपुर स्वंदरी यसुंद अस्थापन कुर्यगामि नँजदीखुय दिवसर गामस मंज छु, तु योसु रॉग्यायि हुंदि नावु ति मशहूर छे, तसुंजि बँख्ती हुंद आशीवाद हॉसिल ओसमुत । दपान सु ओस बँख्ती मंज अथ हदस ताम लीन गछान ज़ि पननि पानुक होश हवासुय ओसुस नु रोज़ान । दिवी कृपायि किन्य छु तँम्य स्यठाह लोकचि वॉसि मंजुय 'राम अवतार चॅरित्र' ल्यूखमुत । अमि रामायणुच खूबी छे ज़ि अथ छु प्रकाश रामन मुकॉमी रंग बोरमुत । मुकॉमी मंजर कँशी, जगराफिया, कौशुर औंदपोख तु कौशरुय ओसलूब ति वरतोवमुत । वुछतव यिम कैह शार:-

‘दोपुक तँम्य डूरि शंकर पोरि मंजबाग
वँसिथ गँयि बूमि तल साँपुन्य तँती नाग
कुरहा अख ओस तोतताम अज कुर्यगाम
वँसिथ येलि गँयि स्व तैलि बोज़नु मे आम
वुछुम तति डूरि मंज अख नागुरादा
ह्योतुम सीतायि कुन लायुन मे नादा
दोपुम माता सीता नेबर नेर
छु प्रारान रामु जू कोरथस स्यठा च़ेर ।’
(सीता ज़ंमीनस मंज गॉब गछान)

प्रकाश राम छु भगवान रामस, राम जू वॅनिथ मुखॉतिब

सपदान । यिथुकॅन्य छु रामायणस काँशरॉविथ पेश करान, येमि किन्य यि मुकाँमी लूकन मंज स्यठाह मकबूल सपुद । बराबर तिथुकॅन्य यिथुकॅन्य ज़न तुलसी रामायण लूकन मंज मकबूल सपुदमुत छु । लूख ऑस्य यि मुखतलिफ तवहारन तु भजन मंडलियन मंज गेवान । यिथुकॅन्य गव राम ज़रित्र प्रकाश रामायण नावु ति मशहूर तु प्रकाश राम बन्योव कॅशीरि मंज अख व्योद नाव तिथुकॅन्य यिथुकॅन्य ज़न परमानन्द तु कृष्ण जू राजदान छि ।

रामायण क्यन मुखतलिफ कांडन मंज छि तॅम्य काँशिर लुकु अदबुकि तरज़ वारयाह लीलायि तु भजन लुकु बॉतन तु वचनन हुंदि मिज़ाज़ु लीखिथ अथ मंज शॉमिल कॅर्यमुत्य । युस अथ ज़्यादु दिलचस्प बनावान छु तु परन वॉलिस छु पनुन पान राम कथायि हुंदुय अख किरदार बासान तु सु छु अमिच दॅलीलि सुत्य ब्रॉह ब्रॉह पकान ।

कॅरुख ज़गि हुंज रक्षाकॉरी

राम लॅक्ष्मण अवतॉरी आय

,

चौतुर बोज़ वेशनु रूपु नारायणो

प्रारु कोनु छुव ह्यमो छारानो

नरुकुनि नारु तारु तारानो

प्रारु कोनु छुवह्यमो छारानो

,

वदन पम्पोश आसस चेशमु लोस

तॅमिस शमशेर ह्यथ गव लारि सोसन

ग्वलाबस ऑस लायान नाद मसवल

यितम छम तोर कुन रातस दोहस कल

,

बरुयो लोलु मसकी प्यालो

च्यतु मो रामु ज़ॅन्द्रो

परुयो लोलु येछि रामु रामु

मो रोश शामु स्वंदरो

बकोलि रतन तलॉशी 'प्रकाश रामन कोर कॉशरिस मंज़ राम बॅख्ती शारु रिवायेंच हुंद आगाज़। ओहुंद रामायण योदवय 'अध्यात्म रामायणस' नखु छु, ति कॅरिथ ति छु तॅम्य अथ मंज़ अलग रंग खारनुच कूशिश कॅरमुच्च।' (कॉशिर लीला सोम्बरन, 2004 ई०)

कॉशरिस मंज़ लेखनु आमचन राम कथन 'राम कथा कावि' हेंद्य ज़बॉन्य मंज़ लेखनु आमुत्यन रामायणन सुत्य तकाबॅली मुकाबलु करान छु प्रोफेसर ओमकार कौल लेखान 'कॅशीरि मंज़ शिवमतुच ज़ीठ परम्परा आसनु किन्य ह्योक नु अति रामायण ठीक पॉठ्य फॉफलिथ। येति ज़न बाकुय हिन्दोस्तानस मंज़ रामायण सदहॉमि सॅदी मंज़ुय मकबूलि आम सपुद, मगर कॅशीरि मंज़ गव यि अमि पतु लग बग दोयि हतु वुहुर्य याने कुनवुहमि सॅदी मंज़ प्रकाश रामनि कामि सुत्य नोन। नतीजन छु प्रकाश रामनिस रामायणस मंज़ यि हावनु आमुत ज़ि किथुकॅन्य छु भगवान राम लंकायि कुन कूच करनु ब्रॉह त रावनस प्यठ फतेहहॉसिल करनु बापथ शिव जी संज व्वपासना करान।'

प्रकाश रामनिस रामायणस मंज़ छु संस्कृत मूल लफज़न सुत्य सुत्य फारसी तु मुकॉमी लफज़ु वोतरुक बोड खज़ानु। ति कॅरिथ ति छे ज़बान आम फॅहम तु ख्वश यिवुन्य। अमिच मंज़र कॅशी तु शारुत छु वालमिकी रामायनस ह्युवुय मगर ति कॅरिथ ति छु यि अलग। अथ ह्यकव नु कतई कुनि ति रामायणुक तर्जमु वॅनिथ। अथ मंज़ छु कॅशीरि हुंदन तपुवन, जीलन, दॅर्ययावन हुंद ज़िकिर यिम भगवान रामनि यात्रायि दोरान वति यिवान छि। दर्म कर्म, मॅर्यादा, करुना, ग्यान तु बॅख्ती बाव छु कॉशरि समाजकि सॉचनु सरनु हिसाबु दरशावनु आमुत युस अथ अख मखसूस रंग बखशान छु।

राम अवतार चॅरित्रस सुती 'लव क्वश चॅरित्र' अलग पॉठ्य लीखिथ तु अथ सुत्य शॉमिल कॅरिथ छु प्रकाश रामन रामायणुच दॅलील मुकमल पॉठ्य पेश कॅरमुच्च।

बु छुस जी० आर० हसरत गड्डा सॉबस मुबारक बाद दिवान ज़ि तिमव कोर यि नविसरु नागरी लिपी मंज़ शाया। दय दीनस रुमु रेशुन आय युथ तसुंदि दॅस्य बैयि ति कैह रुचु कामि मंज़र आमस प्यठ यिन। मै छि व्वमेद तिहुंज यि रुच कूशिश खसि रथि तु परन वॉल्य करन अथ लोलुमतुलाय तु यि बनि तमाम अदब नवाज़न तु आम कॉशर्यन हुंदि गरुच ज़ीनथ। तथा अस्तू!



अकिस शायर सुन्द जिंदगी नाम

- गौरी शंकर रैणा

वननु छु यिवान जि कांसि शख्सु संजि जिन्दगी होन्द तफसील तु तजकरु ह्येकि न पानु तसन्दि खोतु बेहतर कांह ति करिथ। सु छु ह्येकान पनुन्येन शदीद तजरुबन होंद गॉर-मॉमूली जायजु पेश करिथ। इन्फ़रॉदी नोक्रतु नज़र छु यिच्छि तखलीकि होन्द नुमायाँ गोण आसान तु क़ॉबलि एतेमाद यादाशत ति छु यिच्छन तहरीरन हन्ज़ बुनियाद रोज़ान।

सवानि हयात 'म्यान्य कथि' मन्ज़ छि ओंकार नाथ शबनम सॉब ईमानदॉरी सान तिमन तमाम कथन तु वाक़न असि ब्रोंह कनि थवान यिम तहन्ज़ी जिन्दगी सुत्य तोलुक छि थावान। केन्ह ति छुनु पर्दन छायि तु सुती छु तखलीकार पनुन आत्मविश्लेषण ति पेश करान।

कॉशिरि ज़बान्य मन्ज़ छि शायरी, अफसानु, ड्रामा तु वोन्य नावल ति लेखनु यिवान मगर आत्मकथा लेखनच रेवायथ छुनु तीचाह जान यीचाह ज़न बेयिन जबानन मन्ज़ छि। मिसाले हिन्दी पाठ्य छि गोडनिच सवाने-हयात 1641 ईस्वीयस मंज़ बनारसीदासन लीछिमच, 1876 मंज़ छि बंगॉल्य ज़बान्य मन्ज़ रसुन्दरी दीवी 'अमार जीवन' लीछिमिच। यिथय पॉठ्य छि गुजराती वगॉरु बाकयन जवानन मन्ज़ यिच्छु किताबु लेखनु आमचु यिमन मंज़ मरॉठ्य पॉठ्य तखलीक सपदेमॅच शांताबाई काम्बले हन्ज़ स्यठाह मशहूर किताब 'माजा जल्मची चित्रकथा' ति शामिल छि। वोन्य येलि अस्य पनुनिस मॉरुफ शायिर ओंकार नाथ शबनम सन्ज़ 'म्यॉन्य कथ' छि परान तु एहसास छु स्पदान जि अथ सिन्फ़ि मन्ज़ छु सोन contribution ति थ्येकुन लायख।

तखलीक कारन छि पनॅन्य सवानि हयात 14हन हिसन मंज़ पेश करॅमच यिमन हॅन्द्य अनुवान यिथु पॉठ्य छि:

- 01) ज़ायुत तु ज़ाकाल
- 02) परवरिश
- 03) शॉयरानु माहोल
- 04) शॉयरी होन्द आगाज़
- 05) हसरत गडस सुत्य मुलाक्रात
- 06) फिराक़ सॉबस सुत्य मुलाक्रात
- 07) पिराक़ सॉब बहसियतु म्योन वोस्ताद
- 08) कापर्यनुक खोशगवार शॉयरानु माहोल
- 09) रेडियो कश्मीर क्येन प्रोग्रामन मंज़ शिरकत करनुच शरूआत
- 10) वापस ज़यनु जायि गच्छुन तु अदबी सरगरमियन मंज़ शिरकत
- 11) मज़ाहिया शॉयरी होन्द असल इबतिदा
- 12) अहद ज़रगरस सॉत्य मुलाक्रात
- 13) शारु सोम्बरन
- 14) कशीरि नीरिथ ।

यिमन अनुवानन तहत छुन न सिर्फ़ यिहन्ज़ि जिन्दगी होन्द फलसफ़ ज़ाहिर स्पदान बल्कि छु अकि दौरुक तवॉरीखी नोक्तु-नज़र ति पेश स्पदान ।

मुसुनिफ़ छु पनुनि किताबि हन्ज़ शुरुआत बडु दिलचस्प अंदाज़स मंज़ करान । पनुनि ज़ा-जायि हन्ज़ तफसील दिवान छु तज़करु-नवीस गोडु पनुनिस मॉलिस माजि हन्ज़ कथ वनान तु बयान करान ज़ि किथु पाठ्य ओस युहन्द मोल पंडित निरंजन नाथ बट्ट यिमन तु यिहन्दिस लोकिटस बायिस छुट्टी दोहु पानस सुत्य निवान तु ज़मीनदारी हयेछुनावान, तिव्याज़ि यिहन्दिस खानदानस ऑस कॉफी ऑबी तु खोशक ज़मीन वरासतस मंज़ मीजमॅच । यिहन्दिस मालिस ओस रेडियो बोज़नुक सख शोक्र तु तमि वक्रतुक स्यठाह मक्रबूल फीचर 'ज़ून डब' ओस तिमन जबरदस्त पसन्द । येलि शबनम सॉबन पनुनिस मॉलिस रेडियो बोज़नस मुतलक सवाल प्रुछ तिहन्द मॉल्य दयुत तिमन यि जवाब, “ग्यवन वोल आसि या साजन्दर । अफसानु निगार या शॉयिर । यिम सॉरी छिनु सिर्फ़ पनुनि फनु तु तजरबु

साँत्य सान्य दिल बहलाई करान बल्कि छि पनुनि माजि ज्येवि गोड बरिथ
 काँशिरिस अदबी मीरासस हुयेर करिथ अथ रछरिथ थावान । योत ताम 'जून डबि'
 हन्देयन कलाकारन होन्द तौलुक छु यिमव मंज छुम 'आगु साँब' चोरुय पाहन
 टोठ । मथ छुम गच्छान जि वुफ़ि गच्छहा तु रटहन नालु मति ।"

(page-10)

आगु साँब छु आँखरस पँज्य पॉट्य युहन्द गाम पनुन टीम ह्येथ यिवान ।
 सोरुय गाम छु यिहन्दिस आनंगनस मंज चसिथ यिवान । यिहन्दिस माँत्य सुन्द, याने
 लालु साँबुन ख्वाब छु पूर गच्छान मगर नेरनु वक्तु छु साधू साँब (आगु साँब)
 मोयूस हयू न्येरान तिक्याज़ि तिमन युस कलम, चन्दस मंज छु आसान, सु छु
 रावान । लालु साँब छु राँत्य रातस बेकरार रोज़ान । आँखरस छु दोयमि दोहु कलम
 लबनु यिवान । "दरअसल येलि लालु, साधू साँबस सुत्य कथन मंज मस्त ओस तु
 तथ दौरान म्योन बचु साहिबु (सुशील) तस खोनि खोत, तमी विज़ि छु तैम्य तसन्दि
 कोटु मंज कलम कोड़मुत तु पतु येलि बुडिबबस निश गव तु त्रोवुन तमि सन्दिस
 सदरि चन्दस मंज ।" (page-14)

आँखरस छु यि कलम रेडियो कश्मीर वातनावनु यिवान तु साँर्य दलील वननु
 पतु छु कलम तिमन पिलनावनु यिवान । साधू साँब छि कलम रटिथ स्यठाह ख्वश
 गच्छान तिक्याज़ि यि पैन छु तिमन अव्य दोस्तन बतौर गिफ्ट दयुतमुत आसान ।

यथ दिलचस्प अंदाज़स मंज यि सोरुय बयान छु करनु आमुत सु छु मुसनिफ
 शॉयरि सन्जि नसरी तखलीककाँरी हन्जि महारच होन्द सबूत पेश करान । यूतय
 ओत नु तिमन गोनाथन तु शायरन होन्द जिक्र छु किताबि काँबिलु कदर बनावान
 युहन्द यिहन्दिस मालिस निश, यिहन्दि लोकचार, युन गच्छुन ओसमुत छु रोज़ान ।
 मिसाले - पी.एन पुष्प, अरजुन देव मजबूर तु मोती लाल साक़ी ।

50 हकि दहिल्युक सु वक्रत ति छु काबिलि तवजो येलि 1951 हस मन्ज़
 शबनम साँबस वचिकिस प्राइमरी स्कूलस मंज दाखलु छु गच्छान ।

"यि ओस सु वख येलि प्राइमरी स्कूलन अन्दर परनावनु यिनु वाजिनि
 किताबु काँशिरिस रसमुलखतस मन्ज़ छपावनु आसु आमचु तु बुनियादी तौलीम

ऑस काशिर्य पॉट्य दिनु यिवान । किताबन हन्द्य नाव ऑस्य काशिर्य पॉट्य । मसलन हिस्ट्री किताबि 'हमारी कहानी' ओस 'सॉन्य कथ', तु जोगरफिया किताबि ओस 'सोन दुनिया' नाव । अमि अलावु ऑस ज़बान ह्येछनावनु खॉतरु अलग अख काशिर किताब ति परनावनु यिवान यथ मंज़ जमॉच मुताबिक़ लुकु कथ, लुकु बॉथ, लुकु दलीलु, मंज़िल बॉथ, प्रचु, काशिर्य महावर, काशिर्य ख्यनु चयनक्य चीज़, काशुर पोशाक, काशिर्य रसमो रिवाज, कल्चरस तु सक्राफतस मुतलक़ ज्ञानकारी ऑस दिनु यिवान ।" (page-21)

यि तखलीक छि यिथिवय आगाही मॉलूमातव सुत्य खसूस बनावनु आमुच । परनस दौरान छु, परन वोल् क़ॉरी, तिमन नामवॉफ़िक़ हालातव तु मुख्तलिफ़ ज़ज्बात्य वाक़न होन्द मुक्काबलु करान यिम मुसनफि संज़ि जिन्दगी मन्ज़ आमृत्य छि रूदय्मृत्य । पनुनि माजि दिवकी निशु जुदा गच्छित मंगतु माजि कुदु मालि निश गच्छुन तु गरि निशु दूर स्पदनैच दग छु मुसनफि तमि विज़ि ललुवान येलि सु नैवमि जमॉच परान छु आसान तु तिमनय दोहन छि तिहन्ज़ असली मॉज स्वर्गवास स्पदान । यि वाक्कु छु तिमव यथु पॉट्य बयान कोरमुत:-

“अमि सदमु पतु रूज़ न म्ये पनुन गरु गच्छनुच तीच़ पोत कल यीच़ म्ये गोडु ऑस । अमि पतु कॅर कुदु मालि ज़्यादु ज़्यादु कूशिश ज़ि म्ये गॅच्छ पनैन्त्य मॉज मशिन्य, यिनु म्यानि खॉतरु मुमकिनय ओस । सबरस कॉम हयेनु वरॉय ति ओस नु चारु । तु रूदुस अमि पतु तमिसय निश ज़ानु-पोरि ।" (page-24)

सराफ़ कदलु प्येठु येलि यिम छि वोस्तादु सन्ज़ि हसियेच वापस पनुनिस ज़िलस मन्ज़ ट्रान्सफर गच्छान तमि वक्तु छि कुदु माल, यिहन्ज़ मॉज नाठीक आसान । यिम छि यच्छान ज़ि पनुनिसय गामस मन्ज़ रोज़हन मगर डिस्ट्रिक् एजुक्येशन अफसर छु यिमन 15 मील दूर कापरयेन सोज़ान । कापरन वॉतिथ छि यिम रातस अकिस घरस मंज़ रोज़ान मगर छि परेशान आसान ज़ि मॉज छि बेमार । अम्युक तज़क़रु छि शबनम सॉब पननि सवानि हयाति मंज़ यिथ पॉट्य करान !

“शामन, बतु फोला ख्यथ याम शोन्ननुक वख वोत म्ये गयि सख बेकरॉरी,

म्ये गयि माजि हन्ज परेशानी तिक्वाजि तस ओस न अज तबीयत ठीक । खबर
क्याह आसि करान । यि सोन्वान आयम न नेन्द्रय । थोद वोथुस तु ज़ोलुम लालटीन ।
दारि प्येठ ओस क्याहताम जिल्दु पोटाह तु ह्योतुम अथ्य प्यठु ल्येखुन :

“हो छि बालस प्यठु अज जून अडॅय
बेयि रूजिथ गयि अडु वति जॅच
हुम शुर्य कोत ताम च्छयेयि छोर गिन्दन
म्ये छि आलव-आलव मॉज दिवान" (page 45)

जिन्दगी छि उतार चढावन हन्ज कथ । कुजा ताफ तु कुजा शुहुल । शबनम
सॉबनि अदबी सफरुक अख सोनहरी वख ओस सु युस तिमव सिरीनगरु किस
सराफ़ कदलस मंज गुजोरमुत ओस । येलि यिमन हाइ स्कूल ज्ञानु पोरा प्यठु सराफ
कदल किस मिडल स्कूलस मंज कॉम करनुक आर्डर म्यूल, यिम गयि मोयूस
मगर अख ज़ दोह गछिथय सपॅज यिमन हसरत गढा सॉबस सुत्य मुलाक्रात यिमव
यिम तँति फिराक सॉबस सुत्य मुलाक्रात करनाँव्य ।

गुलाम नबी फिराक सॉबुन गरु ओस नखु तलय । फिराक सॉबन दयुत यिमन
दिलासु जि इनसानस पजि बोड़ दिल थावुन तु प्रथ अज़माइशि होंद मुक्राबलु
करुन । यिमन ति गनेयि तिहन्ज कल तु तोत ताम ओसुख न करारय यिवान योत
ताम न तिमन समखहन । आखरस बनेयि फिराख सॉब यिमन वोस्ताद तु
समझाँविन जि शायरी क्याह गयि । नज़मि तु गज़लि मन्ज क्या फर्क छि । रदीफ़,
काफ़िया, इस्ताँरु तशबिया, अलामत, इबहाम तु वज़न बेतरी तमाम लवाँज़िमाथ
क्याह छि । यिम लॅग्य तिमन पननि नज़्मु हावनि । तिम आस्य शबनम सॉबुन कलाम
बडु लोलु सान बोज़ान तु योसु नज़्म तिमव पसन्द कॅर सो छि :

“पखन मुचरान कडान येलि वाश वायुल
खामोशी मंज गच्छान वॉनाख आलव
कमन जोर्येन प्यवान व्यतरॅन्य जुदाई
गच्छान रतु दाँव्य ओबरस शीन हिश तन,"

(page -38)

सवानेह निगार संजि जन्दगी हेन्दि सफरुक अख अहम पडाव छु कापरेय्न् ।
 अति सपेँज यिहन्ज मुलाक्रात काशिरि जबॉन्य हेन्दि थदि पायिक शॉयिर नाजी
 मुनवर तु बेयि शफ्री शोकस सुत्य । तु यिथु पॉठ्य ओस तति यिमन तिमन सुत्य
 शेरो शायरी तु बेयि अदबी मोज़ूहन प्येठ तबादलु ख्याल स्पदान । यिमनय दोहन
 हयोत यिमव रेडियो कश्मीर क्येन प्रोग्रामन मन्ज शिरकत करनुक संज करुन ।
 रेडियो प्येठ ओस नवजवान शॉयरन 'बहारिया मुशायरस' मन्ज शिरकत करनुक
 ऑलान स्पदमुत । प्रोग्रामकय इनचार्ज ऑस्य फ़ारुक नाज़की । तिमव ओस
 वननोवमुत जि गोड़निचि त्रे बेहतरीन करार दिनु यिनु वाजन्येन नज़मन हन्देयन
 तखलीककारन यियि प्रोग्रामस मन्ज पनुन कलामु पननि ज्येवि बोजनावनु बापथ
 शिरकत करनच दावत दिनु । शबनम सॉबन ति सूज पनँनुय नज़म । योसु
 गोड़निचयेन त्रेयन मंजु चारनु आयि । अमि नज़्मि हेन्द कैह शार :

“सुबहदम डोल ख्वश हवा बेयि ताज़गी फीरम रुहस,
 ताल ज़ोतान हर मोखस, लजमुच दिवय हिश हुथ कोहस ।
 सिरियि प्रजलेव दोह छि सोन्तुक्य, गुलशनन सबज़ार आव
 वज़नि लोग दिलकिस रबाबस साज़ नोव, लोकचार आव ।
 ज़ूनि चजिमँच ज़ांड़ ओबरूच, आव गाशिर्य शाम ह्येथ
 शबनमन कोर म्यूठ बुतराँच, मोख्तु ह्येथ अनहार आव ।”

(page 48)

कापर्येनु प्येठ वापस पननि ज्येनु जायि ट्रानसफर गच्छित ह्येच यिमव अदबी
 सरगरमियन मंज बराहि-रास्त शिरकत करँन्य तु अथ दौरान सपुद खनुबलु किस
 डिगरी कालेजस मन्ज अख मुशायर । तिमन दोहन ऑस्य अति रतन लाल शांत
 बहसति प्रोफेसर तायनात । डिगरी कालिजकिस मुशायरस मंज पॅर यिमव
 मज़ाहिया नज़म योसु स्यठाह मक़बूल गयि तु येति स्पुद यिहन्जि मज़ाहिया शॉयरी
 होन्द इबतिदा । वोन्य आस्य यिम लगातार रेडियोहस प्येठ यिवान तु यिमनय दोहन
 सूज अवतार कृष्ण रहबर सॉबन यिमन हयूमरस poem परनुक अख

contract। यिम समख्येयि रहबर सॉबस तु तिमव वोन यिमन, “योसु सिनफ दरदस रटॅथ तथ कुन कर पनुन तवजोह मरकूज ... च प्रावख ज़रूर पनुन मंज़िल”। मज़ाह वरतावुन छुन सहल कथा। पानु छि शबनम सॉब पननि किताबि मंज़ लेखान, “ अकिस दस्तारु वॉलिथ ब्याख असनावुन गव न मज़ाह। हयेडिथ गील्लिथ या कांसि टसनु चटिथ ब्याख असनावुन गव न मज़ाह हरगिज़ ति। पतु अगर मज़ाह वरताविथ असनावनस सुत्य सुत्य समाजी इसलाह ति स्पदि त्येलि छु मज़ाह निगार ज्यादय मक़बूलियत हासिल ह्येकान करिथ”(page-59)

आत्मकथ लेखन वालिस अमिस शॉयरस छु घर रावनुक त्योल, अख अँकिस निशु च्छेयनु गच्छनँच दग येलि-येलि ति छस छोकन छस त्रुस दिवान त्येलि त्येलि छि यिथय हियव शार थनु प्येवान :

“ प्येवान येलि याद छुम सु साथ बूँठयुम
सो विज़ येलि दौन दिलन सपजेयव यकजाह
चो-पासे सोंथ डेन्शव शोलु मारान
गुलन ग्रख ऑस लजुमँच शायि शाये
वुछिम मसवल अती शबनम हलम हयेथ
गनेयम कल तु च्युनुम ज़न गरी छुस”।

(page 65)

येलि अँस्य पानय लेखन आमच्येन autobiographian प्येठ नज़र छि त्रावान असि छु नसर वार्याहान तरीकन मंज़ लबनु यिवान। गाहे सिर्फ हकीकतस प्येठ मबनी, गाहे गॉर वाबस्तु स्टाइलस मन्ज़ त गाहे दास्तान किस सूरतस मंज़। मगर शबनम सॉबुन असलूब छु अलग तु शोद्ध। यिमव छुन पज़र तख्युल्वयव रंगव सुत्य रोंगमुत। यि छु तु ति छुक ईमानदारी तु इख्लाक़ी तौर पेश कोरमुत। आसान, तु परनस काबिल अन्दाजस मन्ज। गोडन्यिकि प्यठ आखरी पेजस ताम छि अख रवानी। तु पूर सवानि हयात छि शबनम सॉबन्य कथ वनान-वनान अकि दौरच ति कथ वनान। यथ तवारीखी अहमियत छि। इसलिए छि यि तखलीक अख ज़रूरी तु अहम किताब।



बृजकिशोरी; अख बेमिसाल अदाकारा

- गौरीशंकर रैणा

अदब, सक्राफ़त तु ड्रामा छि कॉशिर्यन हंजि
समॉजी जिन्दगी होन्द, शुरू प्येठय, अख अहम हिस्सु
रूद्यम्यित। शायद छु योहय वजह ज़ि अभिनव गुप्तन
लीछ १०हमि सदी मन्ज़ 'अभिनव भारती' नॉवच
अख अहम किताब, योसु भरत मुनि संदि
नाट्यशास्त्रच व्याख्या करान छि। तनु प्येठय तु तॅमि
ब्रोंह ति ऑस फ़नून तु सक्राफ़तस राज़न हन्ज़
सरपरस्ती हॉसिल। शाही दरबारन मंज़ ऑस्य ड्रामा
हावनु यिवान तु मॉलन मंज़ ति ओस लुकु ड्रामा पेश
यिवान करनु। जदीद दौरुक गोडॅन्युक कॉशुर ड्रामा



'सतॅच कॅहवट' ल्यूख नन्दु लाल कौल सॉबन तु यि आव रोगुनाथ मन्दुरकिस
अहातस मंज़ सिरीनगुर गिन्दनु। अमि पतु बन्येयि 'कश्मीर थियेट्रक्ल कंपनी' तु
पतु आव कॅशीरि होन्द 'कला केन्द्र' ति बारसस। शेठुकिस दहिलिस मंज़ ऑस्य
कम से कम नव ड्रामा क्लब कॅशीरि मंज़ सरगर्म तु यिमनय दोहन बन्येव रेडियो
ड्रामा ति मक्रबूल। सु कुस आसि येम नु रेडियो प्येठ बृजकिशोरी हंज़ दिलचस्प तु
खोश यिवन्य आवाज़ बूजमॅच आसि। 'म्यानि जिगरकि दादि वोथ' ड्रामहच
स्अब, 'संतोला' ड्रामहच संतोला या 'ईमानदार' सिलसिलुवारॅच ब्येनि टॉठ, यिम
किरदार कमिस गच्छन मॅशिथ। चाहे रेडियो, स्टेज, टेलीविजन या फ़िल्म सारिनय
मीडियमन मंज़ रूज़ यिहन्ज़ अदाकारी तु किरदार पेश करनॅच कला शानदार तु
बेहतरीन।


जूय लॉन्कर, रैनावारी-किस नखासी परिवारस मंज ज़ामचि अमिस प्रतिभासंपन्न कोरि ऑसु लोकचारु प्येठय ज़बरदस्त सलाहयेचु तु रैनावरीयस मंजय प्रॉव यिमव 'विश्व भारती गर्लज़ हाई स्कूलस' मंज शुरुआती लॉतीम। पतु येलि 1966 मंज यिमव रेडियोहस मंज केजुअल आर्टिस्ट संजि हैसयति कॉम शुरु वॅर कस ऑस पताह जि आर्टिस्ट करि ड्रामाकिस शोबस मंज अख थोद मुक़ाम हॉसिल।

बृजकिशोरी जी रूद्य 'रंगमच,' 'कालाकेन्द्र तु बेयि कॅशीरि हेन्देन बाकयन ड्रामा कल्बन सॉत्य ति वाबस्तु। स्टेजस प्येठ वॅर यिमव, नबाला बेग़म, जय किशोरी तु प्राणा शंगलू, कांत्यायनी गंजू बाक़ायन अदाकारन सुत्य कॉम। तमि दोरॅक्य तिम केन्ह मशहूर ड्रामा यिम यिमव पर्नेनि अदाकारी सुत्य शूबराँव छि, 'कुस लोग दावस', 'बु छुस चूर', नॅव नोश, 'ज़लुर', 'इन्साफ़', 'ग्रेंड रिहर्सल', 'चपाथ' तु हरि कृष्ण कौल सॉबनि दॅस्य लेखनु आमुत 'नाटुक करिव बन्द'। अमि अलावु छि यिमव वार्याहन हिन्दी ड्रामहन मंज ति कॉम वॅरमॅचु मिसाले - 'बिना दीवारों का घर', 'मंगू' वगाँरु। यिमव वॅर वार्यहान टी.वी. सीरियलन मंज ति कॉम मगर शामस साड़ि नॅवि बजि रेडियोहस प्येठ यिनु वाल्येव ड्रामहाव योसु मक़बूलियत यिमन दिचु सो सपॅज नु काँसि ति अदाकारस नसीब, वजह यिहन्ज़ सोनुहॅरी आवाज़। सोय सोनहरी आवाज़ रोज़ि सॉनिस शअूरस मंज मूजूद तिव्याज़ि कलाकार छुनु ज़ांह ति मरान।

बृजकिशोरी जी ऑस्य बेहतरीन अदाकारा आसनस स्अती अख अज़ीम इनसान। येलि ति कांह फ़िल्म, सीरियल या ड्रामा ओस बनान आसान तमि सातु ऑस्य यिम बेयन लोकटेयन क्यहो गॉर तजरुबुकार कलाकारन मदद करान। दौयम्येन मदद करनुक जज़्बु, कुनि ति मुसीबतस मंज बेयिस सहारु दिनुक भाव तु इनसॉनियतॅच भावना योसु यिमन मंज ऑस स्वॅ छि मुश्किलनय यथ दुनियाहस मंज लबनु यिवान। यिथिस जिन्दु दिल इन्सानस तु बॅडिस कलाकारस छि विनम्र श्रद्धांजली।




*Symposium on
Prof Omkar Koul Organised by Sahitya Akademi at Jammu*



*Omkar Nath Shabnam's
Eightieth Anniversary Celebrated at Vaishali*

❖ With best compliments from ❖



SUMO GROUP OF COMPANIES

SUMO INTERNATIONAL PVT. LTD.

425, Gemstar Commercial Complex,
Ramchandra Lane Extn., Kachpada,
Malad (W), Mumbai - 400 064.
Tel.: 0091 22 28449341 / 42
Fax: 0091 22 28819841
E-mail: sumo@sumointl.com
Web: www.sumointl.com

SUMO HI-TECH MARKETING PVT. LTD.

422-424, Gemstar Commercial Complex,
Ramchandra Lane Extn., Kachpada,
Malad (W), Mumbai - 400 064.
Tel.: 0091 22 42108888
Fax: 0091 22 42108899
E-mail: admin@sumohightech.com
Web: www.sumohitech.com

PCI-SUMO AIR TECHNOLOGY PVT. LTD.

425, Gemstar Commercial Complex,
Ramchandra Lane Extn., Kachpada,
Malad (W), Mumbai - 400 064.
Tel.: 0091 22 32108578 / 32107242
Fax: 0091 22 28819841
E-mail: info@pclsumo.com
Web: www.pclsumo.com

Printed & Published by All India Kashmiri Samaj

from AIKS Camp Office : B-36, Samavar Premises, GK-1, New Delhi - 110048

Ph. : 011-26107431 E-mail : hqaiks@gmail.com

Printed by : Print Orbit Ph. : 9810625082 Email : pranavkoul@gmail.com

Editor : Roop Krishen Bhat

Price : ₹ 150/-